



BIBLIOTECA NAZ.

Vittorio Emanuele III

XXX

A

17

ABOLI




XXX

A

17

NAZ.





MARCELLI
MALPIGHII

PHILOSOPHI ET MEDICI

Bononiensis, in Messanenſi Aca-
demiâ Medicinæ Prof. Primarij

EXERCITATIONES

DE

STRUCTURA
VISCERVM,

Nominatim

HEPATIS, CEREBRI, CORTICIS,
RENUM, LIENIS,

CVM DISSERTATIONE

DE

POLYPO CORDIS:

*Quibus acceſſerunt ob materia vicinitatem
Ejuſdem Malpighii Epistolæ duæ*

DE


PVL'MONIBVS,


Ad J. ALPHONSUM BORELLIUM
prescripta.

TOLOSÆ,

Typis GUILLELMI-LUDOVICI COLOMERII
& HIERONYMI POSUEL, 1682.







SOLERTISSIMIS ANATO-
micæ Sectionis Cultoribus,
ejus in dies gloriâ cumulan-
tibus, cæterisque seipso nos-
cere cupientibus, rudes hæc
Investigationes commenda-
bat MARCELLUS MALPIGHII.

PRÆFATIO.



*Linianum illud elo-
gium, quo naturæ arti-
ficiû in architectan-
dis minimis animalium
moleculis celebratur, jure merito maxi-
mis etiam partibus adaptari posse
censendum, cum una eademque sit,
& constans naturæ operandi norma in
minimis, æquè ac in maximis, &*

PRÆFATIO.

tantus videatur eorum in natura usus, & delectus, ut ingentes etiam moles sola minimorum compage erigantur: quin & tota laborat natura in minimarum nostri corporis partium coagmentatione, ita ut singula quæque quantumvis diversa, quibus viventium structura coalescit; compendio quodam ipsas construant juxta illud de loc. in homine: Corpus porro ipsum sibi ipsi idem, ac simile est, similiter autem habet, & parvas & magnas partes, & si quis minimam corporis partem acceptam male accipere velit, totum corpus affectionem sentiet qualiscunque tandem ea fuerit, propterea quod minima corporis pars omnia habet quæcunque & maxima.

Nec natura inopiæ imputandum dum minimorum ope utitur, sed solerti ejusdem artificio adjudicandum; generare enim & corrumpere præci-

PRÆFATIO.

pua , magisque universalia naturæ munera videntur , quæ significantius expressit Hipp. Generari idem est quod commisceri : Perire , corrumpique, ac minui idem est, quod fecerni : unumquodque ad omnia, & omnia ad unumquodque , idem sunt. Et quoniam miscere , & separare sunt minime organizationis effectus , idè in magnis , insignibusque visceribus compingendis , minimorum usum necessario usurpavit. Notum optimè , vetusque est apud naturæ Mystas , quamcunque miscellam, exclusionemque minimis fieri meatibus, ita ut in urina, saliva, seminis, & aliorum cribratione, sensus, opticus etiam adjutus instrumentis , nequaquam eorum rudem etiam structuram ob exiguitatem attingat : nec mirum, nam si ex sanguine, vel alio consimili humore, veluti ex fecunda rerum materia, excitantur omnia, quæ

PRÆFATIO.

gigni , vel deficere dicuntur , dum hæc , ad minima usque intercedente solutione , aliqualem jam adepta sunt libertatem , soloque motu , & figura vim suam exeritura , aliis tamen confusa adhuc , commixtæque remanent , sola ope consimilis meatus , vel minimi cribri separari possunt ; quare pluribus , hisque similibus segregatione prævia inde coacervatis manifestantur res , vel communi verbo generantur : Nec minori utitur minimorum operâ in miscella sagax natura , dum fermentationes , minimis in motum actis , mutuo occurso , & tandem unione celebrantur , vel in parvulis , etiam reticularibus vasis , vel saltem carniū exiguis meatibus ita intimè adaptantur , & uniuntur , ut nova excitata compage in recentem emergant naturam .

Minimarum etiam nostri corporis partium necessariam existentiam di-

PRÆFATIO.

ligens exploratio, & miræ inde emanantes actiones deprædicant; tantumque fuit naturæ studium in his compingendis, ut aquâ lance, tam exiguis quam ingentibus suæ micrologiæ munera contulerit: cum enim minima sui incrementum quandoque exigant, quandoque decrementum patiantur, & circa appulsa, & contingentia corpora hoc ostendant, ut incongrua non excipiant, proxima verò, ac consentientia admittant, & tandem peculiari alicui muneri demandentur, ideo necesse est, ut pro alimonia vasa ad sui etiam structuram exigant, nervorum pariter, & proprii vasis ut plurimum excretorii, complicatione conglobentur. Horum igitur continuatione toti, præcipuisque visceribus colligantur, & uniuntur, unde contactis minimis tota animalis hæc harmonia concutitur, & emanantes inde doloris, vel volup-

PRÆFATIO.

*tatis motus universum corpus qua-
tiunt, sicut etiam affectis insignibus
præcipuisque visceribus minima com-
pati necesse est, ita ut antiquum il-
lud, alias in scholis decantatum non
perperam forte de minimo liceat
usurpare, est totum in toto, & to-
tum in qualibet parte.*

*Horum minimorum opificium non
adeò naturæ arduum contingit, ut
nostræ intellectiōni accidit; diffici-
lius enim eorum legem mente conci-
pimus, quàm reipsa à natura pera-
gantur; simplex, una & facilis vide-
tur in conflandis viventium corpori-
bus naturæ norma, quam visus est
Hippocrates de more lib. de car.
adumbrasse: evidentius eandem viam
calcat in plantis, ac animalibus, dum
pro nutritione organa fabrefecit; fi-
stulas namque cum interpositis val-
vulis in utrisque apposuit, alimenti,
& humorum adscensum, viscerum,*

PRÆFATIO.

vel muscutorum pressione in animalibus molita est : in plantis autem externo frigore , vel maxis solarium radiorum vibratione sursum abigit.

Germanam igitur hanc naturæ operandi regulam , his ruditer de quorundam viscerum structura exaratis , evidenter deprehendes , ubi minimorum ministerio perpetuò naturam uti hisque ingentia excitari , & precipuum illius studium esse separationem & interdum miscellam , constabit.

Nec miraberis , novum me de cerebro , hepate , & renibus assumfisse laborem post doctissimorum Vvillis, Glissonii, Fracassati, & Bellini absolutissimas exercitationes : tantorum enim virorum placita temporis beneficio novis observationibus firmata volui , ut verificetur Hippocratis illud effatum : Tempus porro etiam artem facilem , & perviam facit, aut in consimilem viam incident.

PRÆFATIO:

tibus processus manifestos facit ;
ita ut concludere possim cum eodem ali-
bi : redarguere ea quæ non rectè
dicta sunt minimè institui : Verùm
his , quæ sufficienter cognita sunt
testimonium præbere animus est.





D · E ·

HEPATE

CAPVT I.

*Compendio exponuntur quæ
hucusque de substantiâ He-
patis dicta sunt.*

HEPATIS historiam apud anti-
quos, & neotericos abundè exa-
ratam habemus, & novissimè
celeberrimi *Glissonii* opera tam
copiosis & dilucidis inventis elucubra-
vit, ut nihil ampliùs optandum videatur.
Quoniam tamen ferax est naturæ penu,
& variis subsequentiũ literatorum pla-
citis, quandoque jam denudata veritas
iterum obvelatur, ideo non abs re erit,
ut quæ repetitis observationibus ad cla-
riorem dictorum lucem collegimus, bre-
vibus addamus.

Dimissis igitur membranis, & vasorum propaginibus, quibus coagmentatur hepatis moles, dicendum occurrit de ejus carne, quam omnium consensu, medica schola ex *Erasistrato*, Parenchyma appellare consuevit, penè ac sit circa vasa determinati corporis affusio. Plures præeunte *Hipp.* in *lib. de car.* Sanguineis fibris, frigido scilicet, atque viscoso, & pingui concreto corpore, hoc ministerium assignavere; & videbatur sua observatione hoc firmare *Harveius* in *Cervis*, docens in primordiis suæ generationis jecur rude esse & propemodum informe, viderique solum rubicundam & sanguinolentam affusionem: *Glissonius* autem inter parenchymata recenset, cordi, pulmonibus, & renibus annumerat; addit tamen bilis aliqualem requiri miscellam ex actuali ipsius, & continua separatione. *Ruffus* perfervidum, igneumque jecur plurimum ad se alimenti attrahens existimat, unde, hujus robore dexteris animalis partes, sinistris præstare infert. Accuratissimus *Joh. Theod. Schenckius*, hepatis substantiam minime spermaticam esse ex communi Medicorum placito asserit, sui que gene-

ris agnoscit , cui similis non reperitur in reliquo corpore , & ideo partem corporis principem creditam fuisse , deducit ; hujus substantiæ tantam esse friabilitatem docuit præcipuè *Glissonius* , ut ablata investiente tunica , & vasorum implicitis nexibus , de facili effluere possit. *Galenus* densissimum licet hoc viscus appellet , friabile tamen statuit ; in ipso autem substantiæ continuitatem tam necessariam crediderunt Medici , & Anatomici , ut hac vel vulnere , vel erosione sublata , præcipuum hepatis munus impediatur , tumoresque , & morbosæ collectiones excitentur , impedito diversorum humorum motu extra vasa , & extra consuétos carnis meatus. *Hipp. de vet. med.* tenerum , floridum , sanguineum & densum prædicat jecur , quare ex diversis suæ substantiæ conditionibus , quibuscunque occurrantibus resistere monet , ob sanguineam autem naturam , ejusque molliem doloribus , & tuberculis obnoxium fatetur.

Quare ex ambiente externâ hepatis membranâ configurationem subortam fatentur Anatomici : tam variè tamen in brutis configuratur hepar , ut nulla sit in

hoc naturæ operandi statuta norma. In hominibus ipsis quatuor lobos propriis insignitos nominibus Antiqui enumerabant, referente enim Ruffo portas, mensam, gladium & unguem appellabant, & Protospatarius novis distinxit nominibus, unde dicti sunt focus, mensa, culter & auriga: Galenus quem plures sequuntur, quinque exponit lobulos; Columbus tamen indivisum asserit, & Glissonius pluribus formam ejus individuum in hominibus firmat: perfectissima enim omnium figura homini perfectissimo consentientibus cæteris commodis, & utilitatibus necessario compete-
tebat; in avibus autem & quibusdam brutis in multiplices findi lobos, ut contiguis partibus, corporisque trunco suam præstet operam, & situm, docet, unde observat in Cuniculorum jecoribus fibram dexteram reni dextro locum præbere, sinuque amplo excavari, ut ipsum admittat: in avibus sinistro lobo (eodem docente, jecur amplexatur, & suprema loborum cavitate cor cum investiente capsulâ, excipit.



CAPUT II.

Hepatis accurata sectio , ejusque observatio , & divisio.

Detractò membranoso hepatis involucri quo circumambitur tota jecoris moles , sese considerata objicit ejusdem substantia ; & quoniam in perfectioribus sanguineis animalibus hoc solenne est ; ut ipsorum simplicitas multis obscuritatibus implicetur , hinc necesse est , ut imperfectorum animantium observatione gradum nobis faciamus. In cochleis igitur , ubi imi ventris viscera evidentiora patent , conglomerata quædam insignis , si ad totius corporis molem referatur , glandula conspicitur , fusci coloris , in insignes fibras divisa , intestinorum longum excurrens , quæ ex situ , ex vasorum connexione , evidenter hepatis naturam , & munus explet , hæc in quamplurimos lobulos dividitur non sphericâ , sed conicâ potius figurâ donatos ; nec sat est naturæ hanc parasse

divisionem, sed minimorum, valde amica ulteriorem, soloque microscopio conspicuam, molita est; nam singuli mox expositi lobuli, velut exigui uvæ racemi conglobatis, subrotundis corporibus, acinorum instar conflantur, quæ cum toto lobulo mediis vasis connexionem habent; singula tamen proprio describuntur termino. In lacertis idem elucubrat, quibus hepar in multiplices oblongos, & quandoque graciles dividitur lobos; in his ita evidenter conspiciuntur hujusmodi lobuli, ut absque microscopio conspici possint; quin etiam interstitia, & eorum fines punctis quandoque atris designantur, in his quoque eadem consueta subdivisio observatur in singulis lobulis, qui glandulosis acinis constant. Nec unicus est naturæ mos in solis insectis, sed eadem methodo in componendo perfectorum hepate visa est incessisse: in piscibus enim, & præcipuè in Galeo (licet ejus jecur in duas conspicuas fibras, & oblongos lobos dividatur, veluti insignes quasdam linguas abdominis longum percurrentes) idem observatur; constat enim quod usu microscopii, quin & solis ipsis oculis conspici

pici potest, lobulis, quales in pulmonibus jam descripsimus, fere innumeris membranosis nexibus continuatis, quorum figura trifolium ruditer æmulatur. In aliis etiam piscibus, quibus continuari videtur hepatis substantia idem observatur evidenter, ut in anguillis, in quibus omnibus etiam glandulosi acini deprehenduntur.

Subsequuntur medii ordinis animalia, quorum hepar ab exarata piscium structura non valdè distat, ut in mure, &c. Severinus in *Zootom*: in Marte masculo observavit hepar septem fibris constans, quarum infima quædam trifida veluti pes galli erat; probabile enim est idem accidere, ac in pulmone, in quo, licet evidens illa, & rudis divisio quatuor tantum lobos efformet, quandoque tamen si vasorum rami ultra protrahantur, ex adnatis hinc inde lobulis appendices illæ excitantur, quibus pulmones connectuntur pleuræ, vel saltem inæquales illæ apophyses versus septum transversum pendentes constituuntur; & quoniam vasorum rami hinc inde bifurcantur, accidit, ut appensi lobuli, ni adinvicem nectantur, de facili solutas, & trifidas

efforment, ex conglobatis externis lobulis fibras.

In Sciuro elegans & clara est jecoris compositio : primo namque in multiplices dividitur fibras , quas interstitiorum diversus color in plures lobulos divisas indicat , & tamen emergunt glandulosi illi acini extrà assurgentes , ut quid distinctiùs vix conspici possit. In sanguineorum autem perfectorum indagine lucem afferre possunt , quæ ab Anatomicis cursim, & veluti in umbrâ observata fuerent, inter quæ extat illud , à prædecessore meo doctissimo Cortesio exaratum; Hinc enim foramina quædam, seu rimulas in jecoris carne deprehendit : Glissonius etiam in laudata hepatis anatome, continuitatem hepatis debilem, infirmam, atque friabilem exhibet hæc subdens. *Nisi enim membrana à peritoneo orta ipsum arctè complecteretur, vasæque per totam illius substantiam disseminata mutuis passim nexibus invicem copulata idem firmiter constringerent ; facile profectò levi aliunde vi illata non modo rimas ageret, sed & frustillatim dispergeretur: & inferiùs habet: Vidi aliquando in gibba quorundam jecinorum parte rimas, &*

hiatus majusculos , qui forte à partium extremarum violentiore complicatione ortum duxerant , quemadmodum & panis frustum nimia incurvatione diffringitur. rimis istis , sive fissuris (quo tempore mihi eas videre contigit) natura medelam attulerat , non quidem facta agglutinatione , aut cicatrice , sed tenuis pellicula superinductione , quâ utrumque fissura latus obduxerat , manentibus tamen labris se junctis , licet illa se mutuò attingerent. Quibus omnibus liquet , continuitatem parenchymatis hepatis in accuratissimo viro tam altas habuisse radices , ut licet natura contrarium in exigua aliquâ portione obtulerit conspiciendum , fortis tamen imaginatio , ut quid morbosum , externisque causis excitatum dijudicavit & rejecit. Fernelius rimulas in hepatis parenchymate observavit ; hasque sponte ortas sola nativæ humiditatis privatione , & nimia siccitate excitas putavit , quod quidem velut incredibile quoddam à Mœbio rejicitur , eò quia licet corpus & viscera marasmo quodam contabescant læsa nutritione , & inducta sicca intemperie , quia tamen sensim procedit marcor , & tantus subrogatur ex potu , &

10 *Cap. II. M. Malpighii*
sanguine humor, ut totalis arceatur siccitas, ideo impossibilis videtur tantus siccitatis excessus, ut scissuræ emergant; si tamen ambo gravissimi vici iteratis sectionibus, variisque animalium jecoribus explorassent has rimulas, ut perpetuas, easque naturæ filias admisissent. His igitur præmunitus liber animus de facili sensuum germanis impressionibus assentietur, & rerum compagem, qualem paravit natura, dijudicabit.

In bovis itaque jecore, ablatâ tunicâ, interstitia, & contermini lobulorum fines observantur, in majoribus præcipuè vasorum bifurcationibus, ubi dum hepatis compages vi distrumpuntur ex solidis vasorum ramis ita custodiuntur intercepti loculi, ut eorum exterior structura & nexus conspici possit. Hoc etiam feliciùs accidet, si leviter jecur maceretur, & postremò elixatione mediâ, licet enim necientes & investientes, corrumpantur membranæ, evidentiores tamen lobuli redduntur.

Hoc totum mihi primò sese videndum facillimo negotio obrulit in animalibus nuperrimè natis, & præcipuè in felle, in quo ab extimâ hepatis superficie, ita di-

stincti emergunt lobuli , ut repræsentent Anaglypta , suis intercapedinibus , & spatiis. Tandem in homine , diluto præcipue sanguine , immissâ aquâ , jecoris omnem substantiam lobulis contextam observabis , qui & ipsi cum cæteris perfectioribus brutis racemorum congeriem exhibent , quod ut pateat , diversa perquirenda sunt jecinora , à quibus coctis unguium ope exterior membrana leviter abradatur ; ita ut concludere possimus hoc perpetuum extare in singulis animalibus.

In compingendo itaque hepate talis videtur firma naturæ methodus. Vasa in jecore , medio involucro communi , à Glissonio observato , ita in ramos hinc inde disperguntur , eâ inquam proportionali viâ , quam in pulmonibus intuemur ; ad singulas autem vasorum propagines , licet etiam exiles , lobuli appenduntur , conicam , ut plurimum servantes figuram , non ab similem à descriptâ jam in pulmonum divisione , consimilem etiam passim in pancreate , cæterisque conglomeratis glandulis observamus. Lobuli hi propriâ circumambiente membranâ vestiuntur , & conti-

nuatis per transversum membranosis nexibus firmantur, ita ut intermedia spacia, & rimulæ, minimæ tamen inter lobulorum latera emergant, & taliter sibi adinvicem adaptentur, ut nec major nec minor inde intercapedo suboriat, mutata scilicet conorum magnitudine; situ & adaptatione, ut evidentius in pulmonibus demonstravimus. Observandum tamen non eandem non omnino in omnium animalium jecoribus similem esse lobulorum figuram, sed ut plurimum variari; in piscibus enim superius expositis trifolium referre videtur: Ex hoc emergit præter eorundem substantiæ laxitatem molliæ, & flexibilitatis non incongrua causa; quò enim majores sunt lobuli, nec ita intimè adinvicem adaptantur, ita ut insignes rimulæ suboriantur, eò magis tota moles flectitur, ut in quibusdam piscibus accidit, qui flectuose incedunt, quibus etiam in insignes fibras dividitur. In aliis animalibus lobulorum figura pisum æmulatur, & in fele sex, aliquando plura latera observantur, in homine idem ad amussim reperies, unde Moebius in humano hepate lapides tesserarum figuram æmulantes vi-

dit: erant autem proculdubio hepatis lobuli concluso, & concreto tartaro petrificati.

Glandulosi acini, quibus lobulis componitur, cum peculiarem circumscriptionem habeant, necessariò propria & ipsi constant figura, quæ ut plurimum exagona, vel plurium laterum est: hinc etiam necesse est ut ad invicem præter vasorum ramos peculiaribus membranosis vinculis nectantur, & interstitia aliqua emergant, quæ in piscibus, & imperfectioribus magis conspicua sunt, in perfectioribus autem obscurantur.

Ad singulos autem, hosque minimos lobulos, prout experiri licet, & ex pluribus etiam colligere, multiplices vasorum rami derivantur; nam furculi venæ cavae, & portæ, porique biliarii indeficienter per totum hepatis corpus ramificantur, ut luculenter etiam Glissonius in nondum satis laudato hepatis opere, nobis indicat, & sanguineum vas in lobulis extimam hepatis superficiem constituentibus è centro ejusdem erumpens, hinc inde ramificatur per totam periferiam, bifidos promens ramos, à quo totus lobulus irrigatur, quod etiam de pe-

nitioribus dubitari potest ; & licet sensus , in perfectioribus præcipuè , non attingat extremas vasorum propagines ad glandulosos acinos hiantes , ratione tamen id sufficienter assequi videmur ; tota enim jecoris moles his duobus coalescit glandulosis scilicet acinis , & diversis vasorum propaginibus ; quare , ut aliquod ab his commune opus emanet , necesse est , ut inter glandulas , & vasa commercium intercedat. Ulterius in hepate cum servat natura morem , ut venæ portæ propagines arteriarum vices gerant , quod tunicarum multiplicitate indicavit , & tanta est societas , & nexus portæ cum poro biliario , ut arcte amborum rumuli eodem contineantur involucrio , & acutissimus Thomas Cornelius vermium multitudine interdum ita repletos eodem pori ramos fatetur , ut hac potissimum ratione distinctionem à sanguineis vasis collegerit.

Apud antiquos certus videbatur in hepate statutus limes pro vasorum divaricationibus : cavum enim hepatis solis portæ ramis irrigari creditum est , residuum autem cavæ furculis demandabatur , & Spigelius addebat , majorem esse portæ

portæ portionem, quam cavæ, quod utrumque falsum deprehenditur, ut per optimè probat Glissonius, & sæpiùs in recenter natis brutis expertus sum, in quibus facili abrasione propriæ carnis, vasorum in universum propagines observantur æquali numero & mole, ita ut singuli lobuli, & glandulosi acini gibbam, & cavam hepatis regionem constituentes, iisdem polleant vasis. Illud tamen mihi nunquam observare licuit, quod à nervoso Bachio scribitur, ramos portæ cavæ propaginibus uniri, & sibi invicem adnasci, ita ut una videatur vena quod abraso jecoris parenchymate clarè se vidisse fatetur: quin immixta fistula turgente flatu in cava & porta, conjunctiones hasce confpexisse addit. Plures sæpè à Glissonio descriptas conjunctiones vidi, & quoniam innumeri sunt hepatis lobuli hinc inde vasis appensi, inde est ut necessario in quamcunque partem diramentur Surculi, & ita superequitationes, incruciationes, & consimiles contingant conjunctiones; succedit etiam apertis vasis, crebra foramina conspici, quæ nil aliud sunt, quam vasculorum

origines, & hiatus, qui anastomosis specie multis imposuere, sicut in pulmonum vasis accidit, ita ut cordati etiam viri decepti sint. Illud etiam à Glissonio additum infirmare videtur, cavæ & portæ anastomoses, cum immisso liquore per portam tota hepatis caro, deterso sanguine & bile, colorem immutet; unde concludi potius potest, glandulosos acinos, quibus hepatis moles excitatur, medium esse inter asportantia, & deferentia vasa.



CAPVT III.

Hepar glandulam esse conglomeratam.

SUb quonam genere carnis exarata huc usque hepatis structura repouenda sit, non est fortè ita difficile, ut ex dictis non eruamus. Configuratio externa, substantiæ modus, connexio, hiantium vasorum varia genera, indeque emergentes morbi, humanæ sufficiunt conjecturæ, ut partes sub fictis

quibusdam universalibus naturis, & generibus reponantur; ratum autem apud omnes est, pancreas, parotides thymum veras esse glandulas, quas Clarissimus Vvarthonus descripsit, parenchimata esse spermatica una comuni membrana universim, & frequenter frustulatim inclusa, nervosa potius quam sanguinea, nervis, arteriis & venis, alioque peculiari vase donata. Et Hippocrates libro peculiari monebat, glandularum substantiam talem esse, qualis in reliquo corpore non reperitur, raram scilicet & pinguem, friabilem, multis vasis, quibus humor in eas confluit, & reflectitur irrigatam, expositam autem structuram cum pancreate, cæterisque manifestis glandulis jecur evidenter habet: configuratio enim extima, licet quoad universam molem varia sit, lobulorum tamen aggregatione, & compage consonat: contingit vero variatio ex diversa vasorum bifurcatione, hepatis situ, abdominis figura & animalis incessu: quin & in ipso etiam pancreate non ubique, sibi similes sunt contermini fines: nam aliquando totam æmulatur linguam,

quandoque bifurcatur , & diversas recipit lacinationes ; in jecore etiam substantiæ modus , nexus , & color , prout cœcutientibus nōstris permittitur oculis , omnimodam sortiuntur cum glandulis rationem , nec urget consuetus hepatis color : si enim sanguis exhauriatur , albicat , quin & in fœtu hoc observatum legimus ; in piscibus etiam modo albescit , modo flavescit ; ita ut variis cribratorum humorum coloribus inficiatur. Vasa item , quæ glandularum ministerio inservire solent in hepate , ut superius retulimus , insignia sunt , venæ scilicet , arteriæ , nervi , propriumque vas , porus videlicet biliaris. Enati etiam morbi utrique videntur communes , & penitus similes ; in glandulis enim ex concretis succis , ex tartarea , gypsea , & quandoque aquea excitari solent materia , ut passim in parotidibus colli glandulis & aliis cum animalis detrimento observamus , quod & in hepate contingere docent plurium virorum observationes. In hepatis pariter lobulis vermium frequens generatio conspicitur , ut testantur Bauhinus , Montuus , & Schenckius , quod in cæ-

teris glandulis facillimè excitatum quotidie deprehendimus, in canum præcipuè conglobatis glandulis. Accedat etiam in interstitiis lobulos dividentibus, aqueos assurgere tumores, quales in pulmonum spatiis aliàs fieri indicavimus; & tandem tam est signorum & accidentium, quibus glandularum naturam designamus, firmus in hepate consensus, ut magni alioquin Viri, nolentes etiàm, sola sensuum vi, hepatis frustula, glandulas appellare cogantur. Hoc accidit Règemortero apud Glissonium, qui in cujusdam cadaveris sectione hepar interius & exterius infinitis penè glandulis pisi instar scatens se observasse fatetur: nec credibile est eas adventitias fuisse à morboso ægri statu inductas, ut censuit observator, sed quæ in omnibus ob exiguitatem latent, ex aucta magnitudine, & soliditate concreto gypseo succo manifestas apparuisse, & ut evidentius nobis innotesceret, inter glandularum genus reponendas esse, consimilem affectionem in glandulis colli ejusdem ægri per multum temporis exhibuit natura, vel saltem morbus, eadem enim materia ad

B.iiij.

concretionem prona , in consimilibus glandulis excitaverat tumores.

Hepatis etiam primæva generatio ab Harvejo graphicè descripta. *lib. de gener. animal.* hoc totum innuere, digitoque indicare videtur. Habet enim die 7. & 10. propaginibus umbilicalium vasorum jecoris parenchima accrescere, quemadmodum uvæ racemus, germina virgultis, incipiens spica gramini, nam apposita est uvæ similitudo; sicuti enim singulis racemi fibris, & vasorum finibus conglobata quædam moles appenditur, quæ ab excurrentibus per racemum vasis sibi que continuis humorem recipit, cribrat, & per alia diversa novaque vasa contento semini, seu plantulæ communicat, ita omnibus venæ portæ extremis ramulis glandulosos acinos addidisse naturam, probabile est, ut appulso humori subservirent; & sic totus uvæ racemus exiguis quasi botris, vasorum communione, & nexu conflatur, qui & ipsi appensis acinis conglobantur, ita totum jecur constat multiplicibus lobulis, qui coagmantur glandulosis globulis.

Insignium Glissonii, Vvarthoni, Sil-

vii, Stenonis, & aliorum circa glandulas elucubrationibus duplex ipsarum genus nobis hucusque innotuit, unde divisio illa conglobatarum, & conglomeratarum circumfertur; differunt autem internâ structurâ, quæ licet nos ob exiguitatem adhuc lateat, de ea tamen aliàs nonnulla promemus, externa item configuratione, appensis insuper vasis liquoribusque inde separatis: nam conglomeratæ, ut pancreatis & thymi exemplo firmari potest, in frustula exiguasque portiunculas dividuntur, quæ & ipsæ glandulosis acinis componuntur, ut in bovis thymo observavi, à quibus insigne quoddam vas originem trahit, cujus ope determinatus humor minima glandularum structura separata, in peculiarem cavitatem specifico usui eructatur, quæ omnia non ita ad amissim in conglobatis observata videbis; nequaquam enim in frustula dividuntur, sed irregularem figuram omnimoda suarum partium continuitate, vel saltem contiguitate habent, ita ut firmior videatur earum caro, & compositio; & licet adhuc dubitetur, quodnam vas è conglobatis erumpat, illud

tamen valde probabile videtur, lymphatica ab his exoriri; vel saltem non hucusque innotuit, an separatus humor diversis usibus inserviat, ut de conglomeratis accidit, sed in unicum conspirare ministerium apud plerosque evulgatum est.

His itaque probabiliter statutis non incongruè determinare possumus, hepar conglomeratam esse glandulam, cum in diversa frustula & acinos dividatur, unico excretorio polleat vase, & determinatum separet succum in cavitatem intestinorum eructandum. Et si solus intuitus, exteriorque species ad ferendum judicium sufficerent, solo piscium jecore conspecto lis dirimeretur, nam omnimodam undequaque cum pancreate, & thymo similitudinem exterius habet, si præcipuè contentus sanguis effluat.





CAP. V T. IV.

*Proponuntur Vvarthoni rationes,
& solvuntur.*

HEpar inter glandularum genus, rationibus hucusque allatis reposuimus; & hoc placitum Clariss. Vvarthoni urgent allatæ rationes libro de glandulis exaratæ; his insistendum duxi: nec mihi cum Viro de re medica bene merenti congruere est in animo, sed ut ei potissimum uberior philosophandi campus, ex his, quæ menti oculisque meis occurrere, aperiatur,

Præmissis igitur communitatibus, quibus viscera (inter quæ locat jecur) & glandulæ conveniunt, quod scilicet omnes hæ partes à cæteris quodammodo discretæ, velut insulæ, in corpore locentur, sui generis parenchymate polleant, & ad officiale, publicumque munus destinentur præcipuas insignesque differentias, quibus à viscerum natura arcentur, subdit, inter quas primò exa-

ratur, omnia scilicet viscera partes esse quâvis glandulâ majores, quod tamen non ita urgere videtur, nam major, vel minor magnitudo non arcet ab unitate ejusdem generis & naturæ, sicuti glandulæ miliares in extima cute, in palato & aliis etiam partibus locatæ, si pancreati comparentur, exiguæ, & minimæ licet appareant, non tamen extraglandularum genus locantur: postremò sit parvitas constitutiva glandulosæ naturæ, vel saltem necessariò consequens, lobuli minores & glandulosi acini, qui singuli completæ glandulæ substantiam & munus habent, in hepate occurrent. Additur secundò omnibus glandulis (excepto solo liene) nobilius esse jecur, & ad vitam maximè necessarium. De partium nobilitate parum sollicitos video magis sensatos viros, & nostro sæculo corporis Monarcham cor ipsum bajuli, quin & molaris Afini ignominiis onerasse; sanguinem vero transactis temporibus nec anima ipsa dignum supremam nostri corporis partem dijudicasse. Circa verò necessariam operam, & ministerium pro conservatione vitæ, consimilem in-

utrisque reperio necessitatem & usum ;
deficiente enim in pancreate continua
succii illius separatione , vel saltem vi-
tiata ejus natura , labefactatur totius
corporis œconomia , chyli , sanguinis
& aliorum coctionum symmetria , &
quandoque etiam animalis facultatis vis
obtunditur , ut in Hypochondriacis ac-
cidit , & evidentem , ingentem , & fere
incurabilem subsequi læsionem quoti-
diè observamus , cum mitior fortè noxa ,
& mortis timor contingat in jecoris
abcessibus , tumoribusque dum & hu-
jus abscissa etiam parte sanantur ægri ,
sicuti in pulmonum erosione per plures
adhuc annos superstes manet animal.
Pancreatis ad vitam necessarium usum
idem Vvarthonus binis hisque cele-
bratissimis historiis firmat : & ego bis
vidi insignem hujus tumorem , labe-
factata prima coctione , tandem chyli
distributionem , angustato inferiori ven-
triculi orificio , ultimam necem intue-
lisse.

Objicit tertio viscera , & hepar ip-
sum , venas habent & arterias amplio-
res , & licet in jecore exigua sit arteria ,
porta tamen quæ ejus munus explet ,

amplissimo trunco, insignibusque racemis per ipsius substantiam diffusis superbit, glandulæ autem ex opposito exilibus venis, atque arteriis pollent. Ad hoc autem illud sufficiat, ampliora quidem vasa in tota jecoris compage observari, & si eorum propagines ad lobulos extensas rimemur, ejusdem magnitudinis & forte etiam minoris, ac in glandulis præcipuè conglobatis, reperiemus; cogitur autem natura insignes ramos, & truncum per hepar dispartiri, quia cum per plurimos lobulos, & inde ad glandulosos acinos insignis spatium occupantes dispergere necessario cogatur, & mos sit in vasorum productione, ut sensim decrescat, ideò insignis truncus exigitur. His accedat, sanguinis copiam requiri, quæ ut facilius accedat, & recedat, insignes hosce tubulos sibi postulat.

Huic affinis succedit objectio ex vasorum in visceribus magis conspicua distributione, quæ ob exilitatem in glandulis, & parenchymatis inseparabilem substantiam, obscura omnino existit, cui sat est dixisse, ramorum propagines, quæ abrafa hepatis carne mi-

ris plexibus conspiciuntur , non penetrare carnem , cum ipsa in acinos divisa minimis propaginibus appendatur, & adnascatur. Deinde in pancreate, in parotidibus ramorum bifurcationes, & divaricationes æquè conspicuæ sunt, ac in visceribus appellatis, si insignes ramos lobulorum spatia excurrentes perscrutemur. Et si libet consuetam naturæ methodum rimari in quacumque corporis particula , vel maxima, vel minima, utitur perpetuò exili, & exigua vasorum propagine, quæ nec instrumentis opticis, fortè attingi potest.

His duas alias addit differentias, hepar scilicet cum corde, pulmonibus, liene, & renibus magis sanguineum esse: est enim rubicundius, calidius & vitalius; glandulas autem potius spermaticas, pituitosasque esse, unde ultimò concludit viscera sanguini quoquomodo ministrare, glandulas autem & sanguini & cerebro famulari. Primæva autem patrum ex uno colliquamento productio, & earum dealbatio absterfo sanguine identitatem evincunt; nec unde quaque verum est glandulas perpetuò albescere, nam dantur aliquæ,

quæ interiùs omnes rubent , vel saltem in aliquibus conglobatæ portionibus ex affuso sanguine impensè etiam rubent, quod in glandulis ad inguina observavi. Et postremò nondum certum est, an omnes glandulæ succo nutritivo , vel ejusdem depurationi, nervorumque ministerio incumbant , cum salivæ materia probabiliter ab arteriis effluat, quod idem in pancreate , & in aliis dubitari potest. Quare satius credere omnem depurationem , secretionemque succi sive excrementitii , sive proficui è sanguinis massa , solis glandulis deberi.





CAPUT V.

Porus biliaris est hepatis excretorium vas.

Conglomeratam glandulam jecur esse, rationibus, & autopsia hucusque prout licuit, firmavimus; & quoniam conglomeratis glandulis hoc est solenne, ut proprio excretorio vase polleant, quod inductione ducibus claris. Viris Sylvio, & Stenone, firmare possumus, dum naturæ consuetum hoc opus in parotidibus, pancreate, salivæ, udoris & lachrymarum glandulis, aliisque in quibus dispersum per propriam substantiam, peculiare aliquod vas conspicitur præter communia vasa, venas scilicet, arterias & nervos: ideo in hepatis structura hujusmodi inquirendum venit.

Quodnam autem hujusmodi sit hepatis excretorium vas, indicare videtur ejus compages, non accurata tantum. sed rudi etiam observatione tentata; in-

eo enim radicatur cum cæteris aliis communibus ductibus biliaribus porus, ita ut quemcumque lobulum, & appensos glandulosos acinos tum in centro, tum in extremitate locatos attingat, & in conspicuum truncum faciens ad duodenum tandem deducatur, cui etiam additur felleæ vesicæ truncus cum propagatis radicibus in aliquos hepatis lobulos. Quod autem biliaris porus, velut peculiare vas hepati inserviat, demonstrat contenta materia, quæ certè à nullo alio vase transmittitur, & effluit; & licet adhuc dubium sit, an bilis à cysti in jecur effundatur, an verò ab hoc in cystim, & duodenum demandetur; constat tamen porum biliarium, radicesque cystis, solas esse vias, quibus bilis commeatus habetur; quare ex conglomeratarum natura, ex vase nullibi in cæteris partibus observato, & tam copiosè per jecur disperso; & peculiari humore; transducta scilicet bile, concludere possumus, porum biliarium excretorium, seu saltem peculiare hepatis vas esse.

Sed ætdua, multique momenti sese offert difficultas; nam videtur incon-

eussum apud omnes à jecore propagari lymphatica vasa à famigeratiss. Bartholino detecta, in quibus ligaturis medijs turgentia inducta versus hepar ab ipso lympham emanare, & ad centrum dirigi ostendit, licet nobiliss. Bilsius dimisso vinculo contrarium ostendere conetur, acriterque tueatur: quare illo admissio, videbitur natura multiplicasse excretoria vasa, & dubii hærebimus, quodnam sit germanum ipsius vas, simulque corrueat illud à laudato Stenone expositum, lymphatica à conglobatis oriri, & ab his in alias propagari, à conglomeratis autem excretorium tantum vas erumpere. Ut huic difficultati quantum expedit negotio nostro, satisfaciamus, sufficit innuere initium lymphaticorum à penitioribus hepatis partibus ab Anatomicis hucusque desiderari; quin Bilsius ipse fatetur, ramis tantum portæ hære, & ad moschum earum membranis contentum hiare; & Glissonius, licet ea ad capsulam portæ ingressa videat, tamen ulteriorem in parenchyma progressum nec vidit, nec admittere videtur, eò quia ipso docente, rectà pertranscunt partem illam he-

patis , dum capsulam adeunt , quod non accideret, si in singulas jecoris partes essent propaganda , quod fatetur etiam Charleton.

His omnibus accedat ratio, si ab hepatis substantia primum exortum traherent lymphatica , non esset major ratio, cur ab uno lobulo , quàm ab alio emanarent : quare cum ferè innumeri sint, tot etiam necessario essent lymphatica, quæ tamen circa hepar paucò comprehensa numero observantur ; & quoniam videtur multorum observatio, hæc ortum trahere à conglobatis glandulis, idèò satiùs est credere , cum in cavo jecoris sub involucro , ubi vasa sanguinea & porus biliaris ipsum intrant , conspicuæ glandulæ conglobatæ reperiuntur , ab his lymphatica erumpere : has in vituli jecore sæpissimè observavi ; nec inconsuetus est naturæ mos , colligandi scilicet conglobatas cum conglomeratis ; laudatus etenim Steno in parotidum icone contiguam describit conglobatam glandulam cum appensis lymphaticis : idèò ex his omnibus valdè probabile est germanum hepatis excretorium vas esse porum biliarium,

lymphatica verò adnatīs glandulis inferi, nullumque intimum commercium cum jecore sapere.



CAPVT VI.

De Hepatis usu, & an sanguificet.

Tanta est humanarum rerum vicissitudo, ingeniorumque varietas, ut nec uno momento eadem persistat res, quas quidem ærumnas in solo jecore ita cumulatās vidimus, ut multarum tragoediarum extiterit theatrum.

Antiquissimum viguit apud Rationales dogma, hepatis munus esse sanguinem ex chylo conficere, ita ut apud Græcos & Arabes nil notius & certius existat, eo quia excrementa sanguinis circa jecur locentur, in quod chylosa sanguinis materia devehitur; ab hoc, veluti primo principio, venæ exorta in truncum assurgunt, ut ibidem genitum sanguinem universo corpori communicent, & tandem oblato jecore lan-

guet corpus , & animalis œconomia vitiatur : & licet inconcussa fuerit multis sæculis opinio , soli hepatis sanguificationis opus deberi , quâ tamen particulâ peragatur , controversum extitit : Bauhinus, Piccol. & alii sanguinem esse formari solis venarum tunicis docuerunt , parenchyma autem vasorum diramationem tantum fulcire crediderunt. Vesalius autem hepatis carnem primariam sanguinis effectricem credidit ex ingenta vi producentis sibi simile ; nec minor dissensus in viarum assignatione , quibus vehatur chylus in sanguinem mutandus : constans enim fuit priscis temporibus venis meseraicis , vel unâ cum sanguine , vel diverso tempore ab intestinis in cavum hepatis deferri : mox felici hoc sæculo detecta Asselliana vasa ob contentum chylum , & ab intestinis evidentem radicationem muneri huic destinata fuere ; paulò post tamen novus ipsorum innotuit terminus , & semita , unde qui pro focis & aris ad tuendam jecoris dignitatem dimicabant , antiquam chyli semitam novo sanguinis circuitu strâtam , & rectam assumpserunt , inter quos Nobil. Bil-

fius, quem sequuntur Deusingius, Riolanus, la Noble, & alii; hujus autem renovatæ assertionis Achillem molitus est Bilsius famigeratissimo illo experimento, canis adhuc viventis secti, in cujus mesenterio arterias nodo vincit, & iterum cutim consuit, ut rursus post quinque horas aperiat, in quo vacuæ arteriæ, venæ autem repletæ succo quodam subobscuro, & cineraceoprehenduntur: cum autem hujusmodi nequeat propagari ab arteriis ob injectum vinculum, necesse est fateri ab intestinis per continuatas radices ascendere.


Hoc experimentum multorum torfit ingenia, multisque etiam oppugnatur, vel saltem ejus inefficacitas ad inferendam sanguinis in jecore productionem arguitur, & demonstratur; felicissimus enim Thomas Barthol. negat meseraicas venas hoc succo ab intestinorum cavitate hausto turgere, quia aliunde venas ebibisse credit, cum vasa absolute in ipsam non hient: quare succum hunc ex refluo sanguine à liene partibus inferioribus derivat, & licet ejusdem succi congelatio à Bilσιο ad evincendum chyli naturam usurpetur, contrarium

tamen ex ea elicit Barthol. cum hæc nequaquam chylo accīdat, sed sanguini tantum.

Ingeniosiss. Stenon in respons. ad vindic. hepatis redivivi narrat, se hujusmodi experimentum tentasse binis in canibus, & post quatuor horas eductum è vena porta succum, sanguinemque è vena cava, & porta aëri exposuisse, omniaque æque concrefcere, & splendescere, observavit, unde ex hoc verum sanguinem censet. Hoc totum verissimum reperi in canibus, tùm diu jejunis, tùm cibo copioso reſectis post abdominis sectionem, venarumque vinculum diù adhuc super-viventibus; nam in utrisque turget insigniter mesentericis interceptus, & contentus sanguis, aërique expositus eundem colorem, substantiæque modum exhibet, qualem in majoribus venis observamus; quòd autem injecto vinculo in mesenterii arteriis turgeant comites venæ detumefcentibus arteriis; difficilem fidem assequi videtur ex legibus circularis sanguinis motus: quoniam tamen singulæ mesenterii portiones, quæ hinc inde insignibus vasis continentur, ad

Intestina derivatis , minimo sanguineorum vasorum rete ab iisdem emanante irrigantur non absimili forma , ac videmus in arborum foliis , ideò sanguis ab arteriis citra ligaturam in hos continuatos retis ramos , nudis oculis inconspicuos , totumque membranæ amplum spatium excurrentes ., derivari potest, & ex his consueta naturæ via paratur in comites propagines reticularis venæ, & tandem in ramum venæ arteriam ligatam concomitantis : videmus enim tam facilem esse progressum ab extremis arteriis , meatibusque carniū in venas, ut post obitum tota ferè sanguinis massa undique confluens in venis maioribus recolligatur.





CAPVT VII.

*An bilis in jecore misceatur , an
separetur.*

EX coctionis legibus , visa est anti-
quis necessaria in hepate , peractâ
sanguinis elaboratione , bilis , ut præ-
cipui excrementi separatio , & in pro-
prium emunctorium , cystim scilicet,
eliminatio ; hoc in Medicorum schola
inconcussum diù vigit placitum, donec
noviter nervosi Bachii ingeniosa medi-
tatio dubium reddidit: Is enim demon-
straturus nequaquam hepatis excre-
mentum esse , nec naturæ inimicum per
arterias cysticas , medio membranco
corpore , eiusque textura in cystim de-
ferri & deponi , velut in promptua-
tium & penû docuit , à quâ expressâ
per proprios ductus sanguini in iecore
superaddatur , & affundatur faciliorem
hæmatosim. Ut firmet igitur novum
hoc inventum , brevem præmittit fel-
leæ cystis descriptionem, in cuius com-
positione

positione membranarum contractilem, & extensilem observat substantiam, cuius idiosyncrasia, vel saltem poris pertransudantiam à cœliacis arteriis bilis unà cum sanguine delata, ab eodem separatur, & deponitur in cavitatem, à qua partim per porum choledochum in intestina, partim per porum biliarium in singulas jecoris partes delata chymo in pancreate alterato, & sanguini è liene, hæmorrhoidibus, cæterisque ab lo ninis visceribus refluo, ut dilutior fiat, exquisitè commixta, medio hepatis parenchymate supplementum coctioni hepatis impertit, similemque hunc sanguinem cæteri massæ reddit. Huius separationis argumentum ex unico foramine, quo cystis fellea pollet, deducit, per quod nequaquam ingreditur bilis, cum valvulis semilunaribus firmetur, & cum à cysti expressa bilis, licet digitis, nequeat ullo studio in eam iterum repelli. Percolationis huiusmodi modum naturæ etiam familiarem inductione probat ex salivæ separatione in ore, ex humore exudante à ventriculi tunicis, ex urinæ in renibus percolatione, & ex pelliculis, in quibus ex diversâ materiâ abscessus coæcervatur. Tandem hu-

iūs recollectæ bilis necessitatem ostendere conatur ex perpetua eiusdem existentia in singulis animalibus itaut quælibet etiam formica , iuxta adagium, suâ pollëat bile.

Ingeniosum quidem placitum , in quo saltem laudandum venit illud, quo bilis discussa excrementi natura, coctionis condimentum , peculiareque fermentum statuitur : ad edendum enim perfectè coctionem , saltem eam , quæ in intestinis perficitur , eius necessitatem sufficienter probant observationes eorum , quibus obstructo vehementer hepate , vel eius poro, ventris turbationes , cruditates , & inde totius corporis marasmus cum interitu succedunt.

An verò excogitatum illud Bachii, quo bilis generatio per transudantiam è cystis membranis ponitur, naturæ operibus , simulque rationibus consonet, discutiendum ; præcipua igitur ratio à simili deducitur ex urinæ collectione, salivæ eruptione , & menstrualis succi ad chylicationem peragendum , quorum causam in solos meatus continentium , vel saltem ambientium paniculorum resolvit. Illud tamen ani-

adverto in assignatis locis pro hujusmodi cribrandis succis, non sat fuisse turæ membranarum porulos apposuisse, sed ultra hæc peculiaria corpora, andulas scilicet, huic muneri ex natura suâ perpetuò destinatas, propriis excretoriis vasis addidisse, ut in exaratis articulis evidenter conspicitur; quare hæc ratio à consimilibus deducta in eo robore vigeat, cum hepatis structura tota sit glandulosa compages, proprio excretorio vase ditata, & in appendicem, continuatamque vesiculam partim congestam, & eructatam observemus item, necessario fatebimur, hanc, non cysti, sed in hepate glandulosæ substantiæ, artificio, separari: deinde duodeno, & vesicula, ut accidit in ventriculo, & urinaria vesica, recollectam ad tempus servari.

Hoc idem placitum magis illustraturus doctissimus, & famigeratiss. Franciscus Deleboe Sylvius, novissimè in disput. medicis acriter urget bilis separationem in hepate, eò quia liquores d invicem commixti, ut plurimum destillatione, aliquando præcipitatione separentur: destillationi autem ana-

logum in hepate nequaquam reperiri posse opinatur ; idem de præcipitatione eò quia non adsit tertium , quod in jecore utrique se jungat ; ineptam etiam colaturam huic muneri censet , aqueus enim liquor , aut cerofus à pinguiori, vel magis consistente hac via separantur , bilem autem cùm sanguini sit intimè commixta , nequaquam percolari posse censet:undè probabiliùs putat, bilẽ ex maximè similibus sanguineis particulis per cysticas arterias ad biliariã vesiculam delatis , mutatione quadam intercedente , vi copiosæ bilis contentæ, gigni. Dubitandi tandem mihi præbet ansam, liquorum & salium continua, variaque separatio in diversis nostri corporis partibus omnium consensu , sensuque probata , quæ solo glandularum apparatu celebratur , ut quotidie experimur , & ut patet in parotidibus , palatinis , sudorificis , glandulis , & pancreate ipso , in quibus omnibus tanta est naturæ industria, ut non unica communisque natura liquoris , vel salis separaretur in singulis exaratis organis , sed determinata, cum hac tamen conditione, ut licet unam videatur sapere natu-

am excretus liquor, diversorum tamen
ontinet miscellam, ut liquet in saliva,
i quâ eodem docente præstantissimo
ylvio multum aquæ, parum spiritus
olarilis, & minimum salis lixiviosi cum
lei spiritusque acidi tantillo mixti,
ontinetur. In urinâ item parum spiri-
us vinosi, latex aquosus, salisque &
alphuris portio existunt; arduum ideò
st credere solâ membranarum biliaræ
yftis structura consimiles ab arteriis
eparari bilis particulas, & admissâ si-
militudine novam subsequi posse gene-
ationem, & feraci naturæ opificio non
cere novis modis intimè commixta
eparare, hæcque etiam diversa mecha-
icis longè facilioribus iis, quæ mens
usus humanus fingit.

Nec necessarius fortè est suctionis
pus, ut bilis per porum ad intestina
esiculam demandetur, nam valida &
ontinuata glandulosi jecoris compres-
o ex perenni respiratione, sanguinis-
ue advenientis per arterias, & portæ
amos impulsus, bilis separationem in
landulosis acinis, ejusque propulsio-
em per pori ramos celebrant, sicuti in
xteris conglomeratis, conglobatisque

glandulis accidit , & parotidibus , & similibus.

Ad dirimendum hanc litem , naturalemque bilis semitam ostendendum, facile hoc tentandum duxi experimentum , quod tamen juxtà præconcepta successit : in fele enim paucorum mensium , ubi insigniter prominet bilis vesica , huius cystis collum filo innodavi , eamque vulnere medio exinanivi , mox ligatura extremum coledochi , ubi in intestinum hiat , coercui , deinde , supervivente adhuc per insigne aliquod temporis spatium eodem animali turgentem reperi ; interceptum biliarium porum portionemque coledochi , vel communis ductus ; & ut spem omnem à cystis opere in separandâ bile eximerem , facto in eius collo arcto vinculo cystim ipsam recisam projeci , & tamen eandem subsequi in exaratis poris ab affluente bile turgentiam expertus sum ; contentam insuper in huiusmodi turgentibus ductibus bilem digito , vel alio sursum abigere tentavi , & illicò impetù eò rediit , undè , nisi summâ cum vi , repulsa est.

Nec satisfacit doctissimus Sylvius.

um in postremis thesibus idem experimentum ab aliis tentatum, & sibi bjectum propriâ hacque contrariâ bservatione infirmare, ejusque contrarium deducere conatur; nam certum est ex multoties repetita observatione, gatâ extremitate cystici meatus, ita t ne minimum quidem substantiæ cy- is, ejusque colli remaneat ultra ligaturam, sed solus ductus communis, & iliarius rectâ excurrat viâ versus intestina, factâ insuper ligaturâ prope jejunum, insignem bilis quantitatem recolligi, & evacuari medio inflicto vulnere ultra ligaturam, quæ pluriès & pluriès, laxari potest, ut affatim repleus biliarius porus exinaniatur; quare cum auferimus vesicam, ejusque columnum, præter ejus exiguam portionem modo coercitam, satius est credere tantam bilis copiam, quæ excernitur communis ductus vulnere medio, à glanduloso hepate, ex consueto naturæ ordine in consimilibus derivari. Idem tibi accidet devincto vesicæ collo, & ligata intestini hinc inde ab hiatu biliarii poro conspicuâ portione, nam brevi ex affluente bile à solo poro ita turgere

conspicies intestinum , ut inflatam æmuletur vesicam. Illud etiam , quod additur à laudato viro , in ligatis scilicet biliariis poris per jecoris lobos dispersis nequaquam versus hepar tumorem assurgere , non adeò firmum videtur , oppositum enim sæpiùs observavi, quin & non rarò in canibus geminos pori biliarii ramos è distinctis lobis emergentes rectâ ferri viâ versus communem ductum , in eumque hiare ultra biliaræ cystis insertionem, & quandoque prope duodenum, ita ut nullam immediatam communionem habeant cum cysti, sed tantùm cùm communi ductu , vel solùm cum duodeno : in his igitur vinculum factum turgentiam versus jecur efficit , pennatorum etiam structura evidentiùs hoc probat , vesicula enim fellea altero quidem capite exortum trahit à cavo hepatis , à quo bilem recipit , alterâ autem extremitate oblongum collum promit , quod in duodenum inseritur , ita ut cystis in intestina exinaniatur : in iisdem pennatis biliarius porus ab hepate exortus , nullo habito immediato cùm cysti felleâ commercio , ad intestina excurrit;

it plurimùm suprà colli cystis insertio-
nem , pancreatis substantiam pertrans-
iens. Quare ex his omnibus sufficien-
ter probata videtur bilis regiâ viâ à
ecore ad intestina , indéque patet, cy-
stim ipsam à jecore derivatam bilem
intestina eructare.





CAPVT VIII.

Solvuntur diversa instantia.

Vulgata Ortellii sectio, quæ multorum torfit ingenia, pluribusque imposuit, si ad trutinam esset revocanda, vel saltem levibus conjecturis daretur locus, utique pateret non defuisse jecur, & hoc in opportuniori forte situ locatum extitisse, ut secreta bilis in intestinum derivaretur: in hoc enim intestina carnosæ observata fuere, ita fortasse dicta ab observatore ob substantiæ modum consimilem carni, & rubrum colorem, cum etiam solidiora & compactiora muscutorum carne deprehensa sint; oblongæ itaque glandulæ circa intestina accubantis rudem nobis exhibet speciem, nec vasorum indè enata propago conjecturam destruit, cava enim vena à carnosis hujusmodi intestinis emergebat.

Exercitatissimos audio Viros negantes bilem in sanguine ad jecur appell-

lente, eò quia totum inficeret sanguinem, seque proderet sapore illo amaro, ut in ictericis accidit, qui affluentem cum salivâ ferientem bilem perferunt, separatâ urinâ ejus colorem redolet, totusque corporis extrinsecus habitus flavo tingitur colore: undè probabiliùs censet alimentarem bilem in hepate ulteriùs coctam, peculiari cystis fermento disponi, ut abeat in bilem, vel saltem sanguinis exiguam portionem folliculo receptam copiosæ bilis mixturâ & actione, in similem verti bilem, sicuti perpetuari videmus acetum pauci vini infusione.

Huic propositioni obstat in sanguine adesse ferè omnia, & præcipuè bilem, eâ tamen lege, ut ex naturali compage non tanta adsit libertas in singulis coercitis, ac commixtis particulis, ut ubique vires suas exerant, sed organorum, & præcipuè glandularum ministerio separatæ, & liberiores redditæ, veluti de novo exorientes, activitate proprias essentias manifestent, hoc in salivâ, urinâ, aliisque secretis succis probatum videmus, quorum præexistencia in sanguine, licet perpetuò non

se prodat, est tamen omnibus nota: nemo enim negat urinam præexistere in sanguine per arterias in renes propulso; & sicut in consimilibus succis natura non expectat novam alterationem à consimili inductam liquore (saliva enim non talis efficitur ex sanguinis portione alteratâ, & immutatâ ad hujusmodi naturam, à coacervatâ, & commixtâ salivâ, sed talis à sanguine cribratur solâ organorum structurâ, & implicatione) ita etiam censendum videtur de germanâ bilis in jecore generatione, ubi glandulosa substantia cùm appensis vasis observatur. Et licet rationi congruum videatur solâ miscellâ in affinibus unam eandemque naturam excitari, ut de vino & aceto commixto verificatur, quoniam tamen non omnes bilis particulæ, quæ in duodenum abeunt, quæ necessariò bilis naturam omnimodam, & efficientiam sapiunt, felleam cystim attingunt, sed ut plurimum rectâ incedunt viâ, ideò probabiliter censendum, naturam solâ separatione bilem recolligere.


An verò inexistens in sanguine bilis vi tractivâ similari hepatis bilisque affi-

nis in cysti , biliario poro contentæ ,
rapiatur per arteriam cæliacam , & me-
sentericam à grandioribus vasis , ita ut
quidquid biliosi in arteriis , & præcor-
diis continetur similari attractione dire-
ctum , inclinationem illam recipiat , se-
que dirigi & trahi sinat versus hepatis ,
ut consimilibus consocietur , quod de
cæteris etiam succis philosophatur Glis-
sonius , censens serosiores sanguinis
partes ad renes , & vesicam ire , ubi ea-
rum uberior copia coacervatur , idem
de lacte , ventriculi acido contingere
putans , apud me valdè dubium est ;
obscurissimum , namque existit illud de
tractione vique trahente à præclarissi-
mo viro exposita , quâ etiam datâ , pro-
miscuè semper , & indiscriminatim , im-
petu quodam per angusta quædam va-
sa sanguis , qui rerum omnium confu-
sam congeriem dicit , per singulas cor-
poris partes demandatur , & perpetuò
in ipso celebratur intestina fermenta-
tio , quæ minimæ particulæ confuso
quodam motu sese invicem impediunt ,
& mutuis occurribus novos pariunt
nexus , ita ut omnis tollatur , vel saltem
deturbetur inclinatio , & continuatio

motus in designatum terminum : & quoniam continuò circularis iste motus perficitur, bilisque perenniter separatur, ideò ex reiteratis vicibus tota sanguinis massa à serosis excrementis, & similibus depurari potest, absque eo quod simul coeuntes urinæ particulæ, tentato concursu in renes irruant, vel trahantur.

Nec urget illud de menstruo, hæmorroidalique sanguine, eandem enim omnimodamque naturam cum residuo sanguinariæ massæ sapere, ex colore, & substantiæ modo undequaque simili; deducere possumus; & licet in ulceribus, tumoribus, fonticulis, & aliis emissariis, peculiaria sanguinis inquinamenta excerni credantur, eò quia horum evacuatione suppressâ, novi suboriantur morbi, dubium tamen apud me est, an corruptela, quæ in ulceribus, & consimilibus quandòque observatur, an, inquam, à fermento peculiari jam coerciti humoris in tumore, appellentem sanguinem corrumpente, contingat; & fortè etiam dubitari potest, talem in ulceratâ parte vel aliter affectâ, ex morbo excitari

partium constitutionem, & meatuum positionem, ut ex sincero, puroque etiam sanguine appulso, venenati & feroces humores separentur. Accedat insuper, peculiare partium nostri corporis structuras præ cæteris subjici humorum injuriis, ut de cute contingit, quæ ultra nervorum rete, & implicationem mucoso quodam pingui, veluti stoebe repletur: idcirco appulsi cum sanguine illuc ex consueto naturæ ordine sales, & impetuosiores sanguinis particulæ ipsam lacerant, & de facili irretiti intercipiuntur, quod fortè in aliis partibus, quas pertranseunt, non ità feliciter contingit, undè incongruum est censere, huiusmodi salines particulas, veluti inquinamenta, in cutem, ut in commune emunctorium, determinato naturæ fine, propelli; quoniam tamen casuali congestione exoneratur sanguinis massa, aliquæ inde emanantes succi defæcationes redduntur, ideò fortassè aliorum morborum antevertitur ortus..



CAP V T. IX.

De Bilis usu.

INter alia , quæ ex hoc invento-
essent elicienda , illa duo præcipuè
occurrunt ; quânam arte bilis in glan-
dulosi hepatis acinis separetur , & tan-
dem in quem usum. Circa primum
plura ex mechanicis deduxit celebra-
tissimus Pecquetus ; quoniam tamen
tam minima est acinorum structura , ut
nec exquisito quidem microscopio de-
tegi possit , idè solæ hypotheses , &
consimilium machinarum moles nobis
ad hæc exponenda occurrere possunt.

De postremo autem , illud certum
videtur ex hucusque dictis , totum he-
patis viscus , quod glandulosi acinis
excitatur , ad hoc unum esse fabrefa-
ctum , ut bilem separet , eamque in in-
testina medio biliario poro eliminet ; &
licet aliqualis ejus portio in vesicam de-
rivetur , ipsius tamen semita est ab hac
in intestina , & cum in quibusdam pen-

natis aliisque etiam brutis desideretur fellea cystis, videtur natura in his veluti peculiare penu parasse.

Bilis usus tantus est, ut ejus absentia ex jecoris tumore, vel contumaci obstructione, ut in scirrho, icteritia accidit, prima vitietur coctio in cavitate intestinorum peracta, indeque totius corporis œconomia labefactetur, & tandem subsequatur interitus: succedit inter alios morbos ut plurimum ascites quem antecedere solet icteritia, ut firmat famosa illa Dodonei observatio, qui jecinora eorum, qui ab ictero in ascitem delapsi erant; dura; lapillisque ubique plena, ut novacula præcindi non possent, reperit: excitatur autem in his plurimum hydrops, eo quia vitiata sanguinis compositione, & compage hepatis glandulosum corpus eodem tempore tartaro, vel consimili succo primo infarcitur, dum hydrops deinde manifestatur eodem sanguinis vitio, veluti communi causâ excitatus: vel satius dubitare possumus aliquando impedita bilis à jecore transmissione, particulas chyli, quæ mox Aselliana vasa subituræ sunt, non defæcari, atte-

uari, novâque adaptatione variari, ita ut hæc materia, debitâ ammiffâ formâ crudiorē minus fermentabilem, & ad motum vegetem reddat sanguinem, & indè etiam cribratam lympham minùs efficacem; quare vitiatâ particularum sanguinis figurâ, probabile est ferosum sanguinis laticem novas sibi vias parare, veteres disrumpere, & tandem occurrentibus capacitatibus recolligi, ut passim ex diversis incongruisque immixtis liquoribus in pulmonum, & viscerum vasa videamus; & in hujus confirmationem referre possem sectiones hydropicorum, in quibus recollecta in abdomine, & aliis capacitatibus aqua eandem omninè cum sero sanguinis naturam habet, & igni apposita, dum penes supremam partem concrevit, ovi naturam redolet, reliqua autem salium, & aquosæ substantiæ proventum exhibet: in his etiam ut plurimùm hepar scirrho, vel contumaci obstructione insigniter laborat: undè ex his omnibus suspicari possumus, bile à jecore transmissa in naturæ statu, non tantùm præcipitari in opportunas particulas, sed

motu novas excitari recenti solutione & adaptatione, cùm sit plurium observatio, diversos successivè gigni in chylò saponos. Probabile enim est, triturato jam cibo ab hepatis glandulis, & insuper à pancreatis dissimiles affundi succos, non diversâ inquàm ratione, ac in ciborum conditurâ accidit, cùm ex acidis, dulcibus, falsisque immixtis substantiæ modus, novusque sapor emergat. Potiora sagax aliorum industria addet, nobis sufficiet interim nudam, & rudem hepatis descripsisse structuram.





D E

CEREBRI CORTICE.

CAPVT I.

*Quid sit corticis cerebri
substantia.*

ITerùm Palladis arcem lustraturi, cerebrum examinandum assumimus : & si in eruendis sacrorum mysteriis non unico satis est obtutu, ut magnarum abdita rerum pateant, sed iteratis opus est conatibus, idem etiam in cerebri indagine, veluti in re sacrâ, accidit, circâ quam plures insudasse comperimus, & tamen

ex ejus intimis penetralibus adhuc ignota mortalibus , eruenda latent.

Corticis substantiam examinavit novissimè Vvillis famoso libro de cerebri anatome , ubi peculiare , sui que generis corpus esse docet , in quod ex angustioribus vasorum plexibus , veluti serpentinis alembici canalibus , liquor instillatur , qui proprio fermento , & sale volatili inspiratus in animales spiritus facescit , & mox cerebri , & cerebelli corpus subintrans , quasi in publico diversatus emporio , circulatione continuâ magis depuratus evadit , & varios motus per fornicem , callosum corpus , anteriorem , & posteriorem cerebri partem peragrando , mirabiles internos sensus promovere censet. In eodem etiam cortice , quorundam spirituum vario motu , memoriæ actus elici putat , unde multiplicibus plicis ; & circumvolutionibus sulcatum esse docet. Doctissimus Fracassatus in epistolâ quam typis editam ad me , non minùs humaniter , quàm eleganter conscriptam transmittere voluit , quæsitum solvens à quam materiâ progignatur cerebri cortex , statuere videtur corticem ip-

sum ortum trahere à sero concrescibili, ita tamen, ut etiam à sero aqueo, ac bile simul per arterias affluentibus, mediâ salinâ naturâ friabilis illa compages excitetur; medullam autem gigni ex deciduis purioribus salibus putat, hancque exquisito microscopio; castigatâ luce, lustrasse fatetur, & implicitam à me descriptam fibrarum propaginem, spongiæ assimilât, ex cujus eleganti similitudine spirituum animalium generationem ingeniosè deducit. Aliàs in epistolâ quam ipse ejus nomini inscripseram, difficillimam substantiæ corticis indaginem innui, cùm nequaquam ex concreto sanguine ortam sensus agnoscat, sed eam esse veluti peculiare parenchyma, minimis pollens meatibus, quibus, quasi per incerniculum, à sanguine seri concrescibilis portio cribretur, probabiliter deduxi; repetitis tamen sectionibus, longâque indagine, ulteriorem hujus substantiæ cognitionem mihi licuit acquirere: & licet atomâ illâ minimâque structurâ, cujus ope maxima molitur natura, adhuc nos lateat, attamen quæ mox exponenda venient viam nobis ad ul-

teriora sternent, nec incongruè de hùc-
usque dictis latum dubitandi nobis
campum aperient.

In sanguineorum igitur perfectorum
animalium cerebro corticem affusum
minimarum glandularum proventum,
& congeriem esse deprehendi; hæ in
cerebri gyris, & protractis veluti in-
testinulis ad quæ desinunt albæ nervo-
rum radices; vel indè, si mavis, oriun-
tur, ita ad invicem adaptantur, ut ex-
terior cerebri superficies harum con-
gerie efformetur. Figuram habent ova-
lem, quæ tamen ab adjacentibus un-
dique invicem comprimitur, undè ob-
tusi quidam suboriuntur anguli, ita ut
intermedia plurima spatia ferè æqualia
sint. Harum exterior portio contegitur
piâ matre, ejusque sanguineis vasis,
quæ altè penetrant ipsarum substan-
tiam; pars interior à se promit fibræ
albam, nerveam, veluti proprium vas,
prout videre nobis permittunt corpo-
rum horum luciditas, & albedo, ita
ut ex multiplicium fibrularum con-
nexu & fasciculo, alba medullaris ce-
rebri substantia emergat: & si exem-
plo familiari esset exponenda corticis

natura, mali punici structura peropportuna occurreret : in granorum enim symmetricâ compage glandularum cerebri proventus , quibus cortex excitatur , species elucescit , fibræ autem à singulo grano erumpentes, & per membranam deductæ rudem cerebri medullæ iconem exhibent ; & memini me teneros adhuc palmæ dactylos conspexisse , qui hinc indè appensi cerebri glandulas referebant , & vasa seu fibrosa corpora , quibus singuli appendebantur , in fasciculum relecta , alterum , quasi callosum , & medullare corpus æmulabantur.

Deprehenduntur autem hujusmodi glandulæ cerebri difficulter in crudo, licet ingenti animalium perfectorum cerebro , eò quia piæ matris avulsione lacerantur , & luciditate eorum termini, fines & enata spatia ob molitiem non ità facilè distinguuntur ; faciliùs autem in cocto cerebro apparent, quia ipsarum substantia , dùm coctione crassescit , patentiora reddit intermedia spatia , in lateribus præcipuè lirarum , quin & meningis piæ detractione evidentiora fiunt, si præsertim adhuc
calentes

calentes explorentur. Harum glandularum distinctionem, affuso atramento, & leviter gossypio deterfo, videbis; intercepta enim spatia ita denigrantur, ut circumscriptas glandulas facilis exhibeant; easdem glandulas in piscium & pennatorum cerebro; cocto tamen, facile deprehendes, ita ut eadem sit omnium animalium structura. Huic invento praeluisse videtur Joan. Pfeil. apud Joan. Kentmannum, lapidis observatione in cerebro reperti, qui mori fructus instar minimis subrotundis veluti acinis, cineri coloris conglobatus erat: hunc probabile est ex petrificato corpore excitatum fuisse, & naturalem ejusdem glandularum retinuisse figuram. Corticales hæ glandulæ tortuose locatæ exteriores cerebri gyros component, & exorientibus inde medullaribus fibris, seu vasculis appenduntur, ita ut ubicumque per transversum secantur gyri, determinata & firma semper glandularum congeries medullæ affundatur, quod idem in cerebello evidentiùs conspicitur: Ejusdem etiam naturæ est, corticis substantia in cerebri ventriculis, ad principium iten

spinalis medullæ locata , nam coctione mediâ formam , & substantiæ modum glandularum proprium , & undequaque in exteriori cerebri regione locatis similem redolet , cùm hoc tamen, ut hujusmodi glandulæ inter excurrentia nervosa corpora locentur , ita ut ventriculorum pro tuberantiæ nerveis conflentur vasculis , & intermediis glandulis corticalibus ; in interiori etiam totius ferè spinalis medullæ parte cortex aliàs à me descriptus eandem glandulosam naturam retinet , & sanguineis vasis ubique irrigatur , & in eâ spinæ parte , quæ è cerebello , & cerebro elabitur , sub Varolii ponte , ad imaginatum cerebelli ventriculum diversis in locis disperguntur hujusmodi corticales glandulæ , nam sub extimâ superficie , quæ fibrosa & nervosa est , insignis ipsarum portio latitat , & præcipuè sub ponte ipso , mox earundem glandularum etiam particulæ interiùs , medullæ commixtæ conduntur.

An cerebrum sit instar hepatis jam expositi , quod totum quandoque in multiplices lobos divisum coagmentatur exiguis aliis minoribus, veluti glan-

glandulis portionibus, quæ & ipsæ ulterius in minimos acinos subdividuntur, in quos ultimò desinunt vasa, dubitari potest: etenim totum cerebrum, & cerebellum, si demas nerveas fibrillas, quibus coalescit medullaris substantia, solas glandulas exhibent, quæ suis terminis circumscriptæ corticis molem construunt, & fortè lobulorum hepatis structuræ correspondent; an verò cerebri glandulosa hæc exposita corpora minimis conglobentur portionibus, ut in hepate evidenter observatur, esset inquirendum. Quoniam tamen cerebri luciditas, albedo, substantiæ mucositas, & glandularum exiguitas aciem microscopii subterfugiunt, idèd nil sensuum ope determinare possumus, vel saltem sagacioribus, forte potius quàm studio, rimandum relinquimus, non improbabile interim putantes, iisdem etiam acinis, has cerebri glandulas conglobari posse.



CAPVT II.

Solvuntur Vvarthoni objectiones.

EXperientissimus Vvarthonus in eleganti de glandulis libello, cerebri substantiam à glandularum naturâ diversam censet, cò quia cerebrum mollius, tenerius, purius & magis friabile ipsis glandulis existat, & lubricum item, & candidum observetur. Harum differentiarum momenta non ità tamen fortasse urgent, ut nos determinatis arceant: etenim glandularum aliquæ molles sunt, ut thymus in recenter editis, pancreas, & inter ipsas major etiam adest mollities: conglomeratæ autem molliores sunt ipsis conglobatis, fortè ob divisionem: & licet intima meatuum in ipsis raritas teneriores ipsas reddere possit, non tamen extrà glandularum naturam constituere valet, ut passim in jecore etiam observamus, quod in quadrupedibus solidius est, ac sit, in piscibus, & tamen in his

omnibus veri hepatis notæ habentur; In nervis etiam, licet eadem diversitas, quoad colorem, mollitiem, & friabilitatem contingat, dùm exorti à glandulis, & per cerebri corpus protracti mollissimi sunt, & gratissimo pollent sapore, è cerebro autem erumpentes solidissimi funes, nec pro gustu opportuni redduntur, & tamen nervosa natura non immutatur.

Nec fortasse difficile erit alia quæ ab eodem præclarissimo Viro adduntur, solvere: nullum scilicet nervum cerebri substantiam penetrare, sed ab eâ oriri, secus glandulas dispensari ministrationis gratiâ; nam licet verum sit, nervum, ut cerebri proprium vas, ab ipso emanare, & dùm glandulas subintrat, in ipsas liquorem eructare, non tamen indè tollitur à cerebro glandularum conditio, quæ in determinatâ quadam structurâ consistit, quâ mediante ex diversis liquidis appulsis, ope variorum etiam vasorum, determinatus humor ad peculiare opus secernatur; quare cùm necesse sit fortasse, ut aliqua succi portio, quæ in cerebro separatur, & per nervos deferatur etiam

ad glandulas demandetur, ut peculiatis succi sigillatim in singulis glandulis separandi miscellam ingrediatur, vel saltem ejus ope glandularum meatus ritè pro indigentia pateant, vel claudantur, ideò non est mirum, à cerebro, velut à fonte universali, in determinatas & privatas glandulas derivari cerebri succum nervorum ope; nec ex hoc tollitur separationis opus, quod perpetuò glandularum naturam subsequi solet. Illud verò, quod in confirmationem additur, valdè dubium est, glandulas uniformi constare parenchymate, cerebrum autem medullâ, & cortice: si enim glandularum attingeremus atomam structuram, utique multa nobis fortasse imponi specie carnis deprehenderemus, quæ reverà sunt vasa, ut contingit in renibus & in cerebro ipso, cujus medulla nervis propaginibus constituitur, & tamen hucusque pro parenchymatosa carne, vel saltem sui generis; passim asseritur.

Nec postremò urgent allatæ cerebri proprietates, quas in glandulis desiderari putat: cerebri scilicet medullam;

nihil sanguinis admittere , sed peculiarem succum pro sensu , & motu universo largiri , undè ob eximiam ejusdem dignitatem , velut animæ regiam , ossibus undique circumseptam fuisse : etenim cerebri portio , quæ glandulosa est , cortex scilicet , sanguinea vasa in se admittit , ut in cæteris glandulis accidit ; & sicuti singulæ quæque glandulæ , præsertim conglomeratæ , specificum separant liquorem , ut multoties expositum est , ità cùm hoc in cerebro pateat , tantùm abest , ut glandularum tollatur substantia , quin potius sufficienter manifestetur ejus congrua natura. De dignitate sufficiat addidisse , nondum certos nos esse de excreti succi usu ; quo etiam concessio , nobilis erit præ cæteris hæc glandula , non tamen suâ dignitate extrâ glandularum genus assurget.





CAPVT III.

*Exponuntur cerebri vasa, eorumque
progressus.*

Glandulæ in cerebro, cerebello, & in elongatâ medullâ existentes, sanguineorum vasorum opem exigunt, ut in cæteris nostri corporis tum conglobatis, tum conglomeratis accidit, aliisque particulis ad vitam, vel sensum destinatis. In cerebri, & cerebelli igitur mole, arteriarum venarumque insignes, & copiosas propagines deprehendimus, quales certè in reliquo non invenimus, eâ lege tamen, ut non ubique associati perpetuò cum venis reddantur arteriarum trunci, ut in piscibus præcipuè collegimus, in quorum interiori ventriculorum superficie unicum excurrit sanguineum vas; hoc tamen externum est, ut corticis singula quæque glandula utrorumque vasorum extremis finibus irroretur. Imperfectioribus itaque constat mediis, me-

ningibus sanguinea vasa extremas corticis glandulas, quibus cerebri gyri conflantur, irrigare, ita ut in piâ matre reticulatè vasorum opus conspiciatur, cujus emanantes surculi corticis harum glandularum intima penetrant, undè avulsâ piâ matre, non leviter glandularum mollis structura laceratur, vel iisdem sectis, rubra adhuc puncta à vasculis erumpentia emergunt.

Nec fortassè diù cogitandum crit de proprio, excretorioque vase, ut firmam, perpetuamque naturæ operandi normam sequamur; cerebri enim, & cerebelli albæ fibræ occurrunt, quarum ope eorundem medullam excitari aliàs observavimus, & vehendo nervoso succo destinatam credidimus, nec incongruâ fortè plantarum similitudine exposuimus, putantes corticis molem agri, seu flôralis testæ vicem gerere, ubi arbores, aut minores plantæ radican-
tur, & suam indè alimoniam trahunt. Intima autem continuatio, & nexus inter corticales has glandulas, & nerveas fibras observatur in cœclo cerebro, si portio fibrarum, quibus ventriculo-

rum superficies constituitur, laceratione factâ per transversum divellatur, nam continuatarum fibrarum congeries cum appensâ glandularum portione finditur, quod etiam in aliis cerebri cocti partibus accidit.

Inter vasorum genus reponendas esse hujusmodi nerveas fibras vulgatum illud indicare videtur: his scilicet se-ctis copiosum quendam succum ovi albumen referentem igneque concre-
scibilem emanare, ut in secto brachii nervo observavi; nec exterior horum vasculorum figura, & propagatio obest, nam spinalis medulla rectarum fistularum fasciculum exhibet: & licet singuli quique insignes nervi pluribus veluti funiculis coagmententur, non tamen indè elici potest levis etiam conjectura, quâ mediâ è vasorum coetu ar-
teantur, cum in plantis quælibet fibra nudis oculis conspicua pluribus fistulis, frequentibus vasculis ditata, compo-
natur.

¶ Fibrarum item implicatio, seu nerveorum vasculorum laxum & rude quoddam rete repræsentans hoc idem firmare videtur; consuetus enim natu-

ræ mos est, vasorum præcipuè finibus rete efformandi, ut in arteriarum, & venarum extremis propaginibus accidit : & si licet analogo plantarum exemplo confirmare non desunt consimiles ad amussim structuræ in fibris, vitis aliarumque arborum & plantarum corticem componentibus, in bulbosis item plantis, & in rapis, & similibus, in caudice pariter, & foliis opuntiae ficus, reticularis fibrarum propagatio undequaque, nervearum fibrarum in cerebro, & spina implicationi similis observatur. Et quoniam certum procul dubio est, plantarum fibras hunc reticularem plexum efformantes vasorum naturam sortiri, cum & succum emittant, & perforata sint, ideo consequenter philosophandum erit in nostris nerveis fibrulis, seu vasculis, quorum propaginem consimili methodo natura molitur.

Exaratae implicationis causas exponere difficillimum est : si enim in superequitatione ad invicem hiantia vasa sensu attingeremus, nobis plura speculandi ansa exhiberetur, locusque dubitandi esset hoc factum ad intimio-

rem miscellam , & novam adaptionem in delato succo ; quoniam tamen sensus suppetias ferre nequit , ideò solerioribus aliorum speculationibus ista committimus ; unum brevissimè aliàs expositum firmantes , totam albam cerebri & cerebelli substantiam , vulgariter medullam dictam , congeriem esse fibrarum , seu vasculorum , quæ à caudice spinalis medullæ hinc inde tortuossè veluti reflexa folia circumducta , cavitates , & anfractus efformant , & tandem in propriis glandulis cerebri , & cerebelli corticem , & gyros constituentes , altis radicibus implantantur.

Nervearum fibrarum plexus , & coagmentatio in cerebello ramosas arbores referunt , à Cartesio & aliis descriptas , quod etiam ad amissim in cerebro à naturâ tentatum reperio : si enim cerebri gyri in contento cortice per transversum secantur , vel lacerantur , consimilis arboris figura cum continuatis ramis , appensoque cortice deprehenditur ; hoc facillimè tibi occurreret secto toto cerebro per transversum , vel ejus singulis partibus.

Tanta est fibrarum, seu nerveorum vasculorum distinctio in toto cerebri & cerebelli tractu, & præcipuè in ventriculis piscium, pennatorum & terrestrium etiam perfectorum animalium, ut nulla major excogitari possit, cum intermediæ adsint conspicuæ intercapedines, & vasa etiam sanguinea suis ramis ulterius productis, veluti indice demonstrent ipsarum intervalla; ex quibus omnibus elici potest conjectura ad infirmandam Velthusii opinionem, qui ex chymicorum operibus cerebrum spongiæ assimilat, ut spirituum animalium defæcatio in eodem contingat: nam licet in cerebro reticularis adsit fibrarum implicatio, non tamen deferendus humor horum filamentorum externâ adhæsiōne, mediaque implicatione attenuatur, & aliena relinquit, ut in spongiis accidit, totum enim separandi, deputandique ministerium intimâ glandularum corticalium structurâ perficitur, & cavas fistulosasque fibras: mox è glandulis egressus subit humor ut in subiectas partes, pro diversis muneribus exequendis, continuato tramite deman-

detur , sicut in stirpium fistulis accide-
re superiùs innuimus ; ita ut reticularis
illa fibrarum implicatio sit necessaria
quædam vasorum proprietas , quate-
nùs ferunt alimoniam , vel aliud confi-
mile principium , non verò alterius
superioris corporis extrà ductuum na-
turam constituti .

Diù disputatum est de germano
spinalis medullæ & consequenter ner-
vorum exortu : antiquitùs enim à nu-
cha , mox à cerebello , tandem à cere-
bro , & cerebello penitiorẽ detexit
Varolius noster originem , celebratã
primò capitis inversã sectione . Ab in-
teriori hoc principio plures nervorum
propagines deductæ sunt , cæteræ verò
ab eadem medullâ ulteriùs descenden-
te ; & jam dictis tamen primæva spina-
lis medullæ , nervorumque origo suf-
ficienter haberi potest : etenim cum
spinalis medulla sit nervorum fascicu-
lùs , qui dùm cerebrum progignit , in
duas geminatur partes quarum circum-
volutione latera ventriculorum exci-
tantur , tandem in corticem desinit , in
quo extremæ nervorum radices im-
plantantur in minimis , videlicet glan-

dularum ejusdem racemis, quod idem etiam in cerebello accidit: quin nervi è Varolii ponte erumpentes, cùm ulterius in cerebellum progrediantur, à corticis etiam ibi inexistens glandulis ortum trahent; & quoniam in ventriculis, & ad principium spinalis medullæ copiosus cortex observatur, ubi prominentiæ interiores assurgunt, hisque sectis nervorum continuatæ fibræ observantur, necessario censendum, nervos etiam ab interioribus hisce glandulis promi; quare nervorum opticorum fibræ, licet ulteriorem in cerebrum & cerebellum progressum habere videantur; attamen quia fortiter adhærent corticalibus ventriculorum eminentiis, ideò fortassè in his etiam aliquo modo radican-
tur.





CAPVT. IV.

De Corticis usu.

E Sset loco coronidis addendum aliquid de cerebri usu : & ut verum fatear , quò magis manifesta mihi elucescit cerebri structura , eò magis tot mirabilium operationum explicandi methodum spes excidit ; dùm enim religione quadam ejus ventriculos , reiformem & mirabilem plexum venerabamur , imaginationis , memoriæ , cæterorumque sensuum distinctas sedes habere credebamus : ablegatis postremo ad emunctiora , exauctoratisque ab hoc præcipuo munere ventriculis , veluti excrementorum cloacis , occurrebat medullaris cerebri sinuosa substantia , cujus imaginata mirabilia , & sinuosa macula expectationem nostram implebant ; simpliciorẽ tandem dùm agnosco cerebri structuram ineptam omninò ad exponenda sensuum , & tam nobilium operationum phænomena reor , ità ut hoc probabiliter tantummodò determinare possim , à cerebri &

cerebelli glandulis in continuatos nervos separari succum quendam sicut in cæteris glandulis proprio excretorio vase ditatis accidit, tantamque esse harum glandularum exquisitam structuram, ut vitiato, vel immutato etiam leviter aere, ut invehat Hipp. de morb. fac. cerebrum inter cæteras corporis partes primùm consentiat, & diversum à se ipso reddatur, quod etiam sequitur, dùm humores arteriis contenti externorum incongruam miscellam admittunt, vel saltem debitâ compage appulsus sanguis non gaudet, turbationes enim capitis excitantur ab Hipp. de gland. descriptæ; & quoniam glandularum hæc est conditio, quemadmodum in palatinis, & parotidibus evidenter experimur, ut ex irruentis per arterias sanguinis impetu, & acrioribus particulis tenellæ ipsarum structuræ vis inferatur, & consequenter copiosior plus justo, vel saltem acrior per excretorium vas cribrati humoris contingat derivatio, seu quandoque remisso motu, coercitaque quodammodò internâ sanguinis fermentatione, crassiores, vel saltem proni ad concretionem humores

in propriis meatibus fixentur, indeque impediuntur subsequenti sanguinis motus, idcirco apoplexiæ, aphonix, nervorum fluxiones, & tabes dorsales ex glandularum cerebri consimili affectione contingunt, aliaque infinita, quorum humana mens adhuc ideam non habet. Contumaciores autem sunt cerebri morbi cæteris aliis, quos vulgò humorales dicimus, à venosis succis ortos, juxtà illud de loc. in hom. & quicumque morbus à venis oritur, levior est, quam qui à nervis, diffluit enim una cum humore qui in venis inest & non quiescit: angusta enim ut probabiliter censeo, mollisque est cerebri & cerebelli glandularum structura; arcti pariter vasorum, seu nervorum meatus; facilem patitur delatus succus concretionem; sua insuper simplicitas, & compages quocunque commixto, & appulso succo inficitur; accedit etiam talem fortè requiri rythmum in delato humore, ut si citius irruat, vel retardato gradu consistat, de facili contumaces morbi progignantur ad quos profligandos difficulter fermentatio seu concitatus motus suscitari potest, ut in

cæteris venosis contingit, in quibus quandoque morbus ipse medellæ vias aperit.

Exulcerantur interdum, ut à Chirurgis animadvertitur, externis vulneribus corticales hæ glandulæ, & insignes affurgunt excreſcentiæ, quæ à ſimilitudine fungi appellantur, producuntur autem fortasſè ab extravasato nervo ſucco, qui, vel plus iuſto fractis glandulæ meatibus in nervos non excernitur continuata ſemita, vel ſaltem non revehitur per venas, quare liberior redditus huiusmodi ſuccus, à ſuo vehiculo, cæterisque ſolutus, facillimè concreſcit, ut paſſim etiam in aliis partibus ex irruentibus copioſioribus determinatæ naturæ particulis diverſi contingunt tumores.

Dubitandi adhuc reſtat anſa, an cerebrum ſit ſapientiæ domicilium juxta illud de morb. ſac. *cerebro ſapimus maximè, ac intelligimus, & videmus, & cognoſcimus*: an verò probabiliùs ſit aliud quod additur: *cerebrum intelligentia, ac prudentia internuncius, ac interpres eſt*, nam ſuſpicari poſſumus minimis hiſce glandulis ex delato ſan-

guine separari, recolligique particulas illas à naturâ ad promendum instrumentaliter sensum destinatas, quibus per nervorum tubulos delatis continuatæ partes imbibantur, & turgcant: constat etenim, quotiescunque nervosi hujus succi collectio, & turgentia ex impedito ejus ulteriori motu per proprios ductus contingit in appensis partibus, vehementissimum excitat sensum, in languidis præcipuè, & impedito pariter ejus transitu ex ligaturâ, vel compressione, ut in luxatis dorsi vertebriis accidit, laxitate in ulterioribus nervorum propaginibus inducta, sensum, & motum auferri. An verò conjectari liceat tensionem quandam in nervorum fidibus ex contento hujusmodi succo subsequi, ut levibus etiam motionibus resiliant, aliudque universaliùs & superiùs concutiant, & à suo perenni motu dimoveant, lubens omitto.


Ex his num ea quæ à solertissimo Vvilli de sensuum interiorum generatione vi cerebrii structuræ deducuntur, sensibus rationique consonent, quærant alii, de hoc uno, tantum le-

viter ambigerem in tantâ rerum cæcitate, spirituum motum ab externis partibus, etiam ipsius cerebri, in internas ejusdem difficilem quidem esse, cum natura non assuescat per eundem ductum oppositos promere unius corporis motus: & cum animalis ille liquor, quo sensus eduntur per nervorum vascula necessario feratur, idè dato etiam quòd sursum reflecteretur usque ad glandulas corticis à quibus primò effluit, utique impossibile videtur ut corpus, striatum, callosum, aliaque perpetuò attingat, in quibus imaginationis, sensus communis, memoriæ distinxit sedes.

Aliud etiam, quod additur ab ingeniosissimo Viro, striata scilicet & radiosa corpora duplici constare texturâ, quarum altera ascendat, altera verò descendat, ut sensibilibus impressiones ascendentes percipiantur, & deorsum motuum instinctus peragantur, dubium; nam parallelæ in ventriculis deductæ nervorum fibræ, in principio autem elongatæ medullæ concurrentes non diversas exhibent vias, ita ut aliæ in superas, aliæ in inferas desti-

nentur partes, sed omnes æquè, prout mihi videre licuit, à corticalibus glandulis exportæ deorsum tandem protrahuntur: idem etiam dubitari potest de medullæ elongatæ structurâ, quâ mediâ, mutua spirituum animalium commercia, aliaque mira sensus communis, & motus localis, primos impulsus haberi censet.

Nervei succi materiam à mesenterii glandulis accuratissimus Glissonius per nervos in cerebrum derivavit, ab ore autem & intestinis eandem in caput deferri credidit Fortius: quoniam tamen cerebri molem solo glanduloso cortice, & enatis fibris conflata observavimus, accedentibus sanguineis vasculis, nec cavitates ad chylum recipiendum, simulque in singulas cerebri particulas demandandum adhuc deprehendimus, ideò omnes nervos è cerebro & cerebello enasci putamus, in eum tantum finem, ut separatum in propriis glandulis succum deorsum deferant, cum non desint sanguinea vasa, à quibus ferax materia suppeditetur, & residuum cribrati succi, ut in cæteris contingit glandulis, venarum ope revehatur ad inferiores partes.



PROOEMIUM.

DE

RENIBUS.

TAM variam longâ temporum successione passi sunt renes fortunam, ut etiam superflui & frustranei non sine naturæ convicio reputati sint: mox tandem solâ structurâ mirabiles, usuique valdè necessario addicti inter conspicuas corporis partes sortiti sunt sedem. Horum compositio ità diversa apud Anatomicos exaratur, ut inter paucos conveniat: imaginati namque cribri species antiquis imposuit, modumque separanda urinae secundum ipsos exhi-

buit. Solo parenchymatis nomine plures contenti acquievere. Fibrarum interim idea ad attrahendum serum pluribus arrisit, & hæc consimili cordis structurâ firmabatur. Apud subsequentes dubia vanaque extitit fibrarum in renibus existentia, undè canaliculos quosdam in eorum scissâ substantiâ excitatos evulgarunt. Postremò multiplici substantiâ parenchymatosâ scilicet, & fibrosâ coagmentatos renes propugnarunt nonnulli; & novissimè unicâ tantum constare naturâ; hacque fibrosâ, meatibus perviâ, percrebuit elegantissimâ elucubratione, ita ut ex inductis sectionibus secundùm hanc sententiam concludatur, exclusâ quacumque substantiâ, præter vasa, renum corpus nihil aliud esse, quàm canaliculorum, seu meatuum congeriem, qui continuati ab extimâ superficie ad centrum usque propagantur.

propagantur. Hæc & similia variis ætatibus circà renes mens humana meditans, animum meum ad ulteriorem indaginem, vel saltem ab hucusque dictorum confirmationem excitabat. Pauca igitur, ut conformis in singulis visceribus operandi naturæ norma, à me in hepate, & aliis detecta, ulterius firmetur, in solius veritatis studium habeas. hoc etenim structuræ etiam rerum additamentum rebus, quæ meditor, non infeliciter lucem fortè accommodabit: nec hæreas, an nova vel vetera sint, sed an naturæ consonent prudentius quæras, illud unum tibi spondens, me hanc renum structuram librorum ministerio nequaquam assequutum, sed patienti, longo & vario usu microscopii; cetera verò inde deducta ingenii, ut mei moris est, tarditate, animoque remisso parasse.



D E

RENIBUS.

CAPVT I.

De Renum extrema superficiei divisione.

UT brevior, clariorque renum structura innotescat, cùm fusè de eorum situ, figura & involucris habeatur passim apud Anatomicos, peculiaria tantùm, quibus renes coalescunt, referam; exordio sumpto ab exteriori ipsorum superficie, quæ in quibusdam, ut in bobus, testudinibus, & pennatis non undequaque levis est & continuata, sed in plura insignia multiplicium laterum corpora ut plurimùm exa-

gona ex fulcis , & foveis renum periferiam excavantibus secatur , quæ ab antiquioribus quasi glandulæ , seu coagulationes appellatæ sunt ; in urio enim , ut à pluribus describuntur , appensa quasi ceraforum congeries videtur , & suborta spatia adipe intimè hærente replentur. In homine , aliisque consimilibus levis undequaque ab omnibus licet describatur ren : attamen aliquando in adultis , & sæpè in foetibus manifestò ejusdem compositio elucescit , cùm exiguis portionibus altis rimulis sejunctis conglobetur , & in adulto etiam perpetuò interiùs. hujus divisionis permanent indicia ; diligenti etiam indagine asperam , & ulteriùs semidivisam observavi hujus superficiem , quod tamen , ut clariùs pateat , animalium nuperrimè natorum renes sunt excutiendi ; in his enim lobuli quidam multiplicium laterum emergunt rimulis circumscripti , quæ auctà , & proVectà animalis ætate licet ferè obliterari videantur , earum tamen vestigia adhuc supersunt , varioque distinguuntur colore , nam rubedinem , vel saltem immissi liquoris per arterias , vel


venas colorem referunt, & ita contenti lobuli, seu renum exiguæ portiones, quæ carnis colorem remissiorem retinent, ab his circumambiuntur. Hæ renum subdivisiones non in solâ superficie excitantur, sed intimè etiam penetrantes, carnis aliqualem distinctionem efficiunt; in bobus enim, & exaratis superius brutis, & in ipso etiam homine collectiones illæ insignes conspicuis foveis in aliquibus brutis circumscriptæ, tandem interiùs peculiarem figuram, & exactam distinctionem habent, videnturque referre plurium laterum pyramidem, quod præ cæteris pater in testudinum renibus, & interiùs in ipso etiam homine, in his igitur collectionibus easdem omninò subdivisiones in homine, cane, & fele descriptas reperies, quæ interiùs etiam per renum intimam substantiam repunt; hanc divisionem juvant, & foveant sanguineorum vasorum partim per exteriorum ambitum perreptantium rami, ut evidenter in fele observantur ab ingressu emulgentium exorti, & insignibus propaginibus rimulas hæc excurrentes, intimèque subdivisiones hæc am-

plexantes ; interna etiam propagata vasa , dùm extimam superficiem attingunt reflexa eadem spatia finiunt : quare non incongruè concludere possumus in quibusdam brutis renes exiguis quasi distinctis aliis minoribus evidenter conglobari , & in homine adulto licet unicus videatur ren : subobscurè tamen interiùs distinctis , quasi exiguis renibus constare , qui ulteriorem etiam exterius patiuntur divisionem. Horum renalium portionum variâ ad invicem adaptatione , & nexu extima renum configuratio gignitur , quæ de facili in monstruosam elabitur formam ; ita ut quandoque racemum , quandoque zonam , vel consimilia æmuletur , ut passim apud Anatomicos observatum legimus de monstruosis renum observationibus. Nec subsistit hic renum in extimâ superficie discontinuatâ compages , nam de recenti ablatâ membranâ , dùm adhuc mollis est renum substantia , rotunda quædam & brevissima corpora ad instar exiguorum vermium circumvoluta observantur parum dissimilia illis quæ in testium substantiâ , ablatis involucris ; vel ipsis per me-

E. iiij.

dium sectis, reperiuntur: hoc totum atramento exterius affuso; mox leviter deterfo, exquisito microscopio detegitur, cujus etiam usu quandoque miri vasorum rami cum appensis globulis, de quibus inferius, sub extimâ superficie latitantes, & interdum interstitiis comprehensis conspiciuntur. In canum, & similibus renibus, ubi in concava parte sulcum promunt, ut subintrantibus vasis dent locum, hæ vermiculares vasorum productiones evidenter observantur, quæ post excitas breves illas reflexiones, & circumvolutiones recto tramite per renis dorsum subsequendo extimam superficiem versus pelvim propagantur: hoc quandoque etiam videndum se mihi obtulit dissecâ solis manibus renum extimâ superficie; evidentiùs tamen præ cæteris in gibbo renum avium deprehenduntur sanguineis vasculis circumscriptæ: undè ex his demonstratur, connexionem vermiculorum horum vasorum extimam renum superficiem componentem eandem esse cum descenditibus vasis usque ad pelvim. Illud hic fateor, me ob visus fortè hebetu-

dinem, vel instrumentorum ruditatem, nunquam attingere potuisse scilicet quod continuata quædam, nuperrimâ observatione firmatâ, per totam extimam renum superficiem excurrant tortuosa spatia & sinuli, quos injectus ater humor per emulgentia vasa designet, & ratio & sensus perspicillorum ope confirmet; nam immisso atramento, vel consimili ex illata vi plures emergunt irregulares maculæ ex affuso liquore vias sibi è vasis faciente, & quandoque exagonæ. maculæ renum minores lobulos amplexantesprehenduntur, & ut plurimum describuntur vasorum diversi rami hinc indè bifurcati, variusque color ex immisso liquore, & propulso etiam sanguine excitatur; quare in humanorum cadaverû sectione exercitati asserunt, renum colorem facilè immutatum iri; etenim rubor frequentissimè clarior, & splendens ab ipsis est observatus, interdum obscurus & niger, & non rarò subalbidus, quorum omnium varietatem diversus sanguinis proventus, vel ejus carentia excitaverat.



CAPUT II.

*De exteriori Renum substantiâ à sectione
per gibbum occurrente.*

HUc usque exarata evidentiora reddentur, simulque renum artificiosa pandetur compages, si secto per dorsum rene interiora signatim rimabimur; hac etenim methodo in boum, canum & similibus renibus, qui facile occurrunt, extima ipsorum substantia, quæ semi-digitali ferè est peculiaritantum colore à cæteris renalibus partibus primo intuitu discriminata, considerata sese offert: hæc enim portio à flexis in arcum vasorum ramis usque ad extimam peripheriam suffusci-coloris est, propè faciem tamen saturatior redditur, & varias hinc indè exiguas cicatriculas alterius coloris exhibet; subsequens verò substantia renum infra arcum versus centrum progressa in bratis subrubra est, & tandem quæ velut in papillam defluit, partim alba,

partim subrubra in extremitate videtur; in homine etiam varius videtur color, nam in exteriori renum confinio subrubra est ejus substantia, & sensim versus pelvim diluitur ejus color.

Omisso progressu vasorum, & aliarum partium descendantium ad pelvim de priori tantum renum portione quæ immediatè sub investientibus membranis latitat, sermonem instituam. De hac itaque varii extitere in ejus assignandâ naturâ Anatomici, à concreto enim sanguine, vel parenchymate multi ortam credidere, alii peculiarem substantiam carneam tamen, rimulis distinctam putarunt; & aliqui colorum varietate moti, divisâ renum substantiâ in duplicem naturam, externam, hanc hepatis similem, velut peculiare parenchyma compararunt; inferiorem autem, & continuatam usque ad pelvim carneam, sed fibrosam censuere. Diversas has Auctorum sententias expensas vidimus, simulque placito determinatum extimam hanc renum substantiam fibrosam tantum esse consimilem reliquis particulis renum ad pelvim usque prout iconibus elegantissimis con-

stat, in quibus à papillari corpore continua, & rectæ omnes fibræ usque ad extimam superficiem protractæ describuntur, ex quâ positione urinæ separationis norma nobis insinuatur, quæ tamen sensus nobis longa, & multiplici exercitatione obtulit, non eandem omninò mihi suadent sententiam; nam certum quidem est in hac extimâ parte adesse canaliculos aliàs observatos penè innumeros, qui nequaquam carnei sunt sed membranosi, & cùm cæteris excretoriis vasis, ut salivalibus, poroque biliario, tùm substantiâ, tùm usu convenire videntur. Hi licet suâ præcipuè aggerie renum hanc substantiam componant, & propriâ mollietie, & intimâ adhæsiōe carnis determinatæ speciem oculis exhibeant, constat tamen si leviter in macerato rene manibus hinc inde deducto in extimâ superficie altè penetrans scissura excitetur, omnes ferè portiones quæ nobis carnis seu fibrosæ, seu parenchymatosæ speciem exhibent, excretoria, membranosaque esse vasa, quod etiam, ut faciliùs constet, secetur per dorsum ren, & maximè cures, ut secundùm fibrarum rectitudi-

rem sectio subsequatur, vel sorte id contingat, affundas atramentum, mox sensim summis digitis detergas; ita enim horum omnium ferè vasorum veros habebis progressus & inclinationes. An verò rectà procedant hæc omnia urinæ vasa usque ad extimam renum superficiem, hoc apud me valdè diù dubium extitit, multisque aggressionibus examinatum: tandem certum istud collegi, non omnia urinæ vasa ad superficiem usque ferri, sed superatis vasorum ramis in modum arcus extensis hinc indè ad latera finem sortiri, quin & eorum insignem portionem, quæ extimam membranam attingit, ut superius innuï, reflecti intrò ibique ultimum suæ productionis finem attingere; quare non est mirum si perpetuò factâ sectione, etiam ab interioribus partibus, scilicet à papillari corpore incoata laceratione secundum horum vasorum rectitudinem, licet integra ulterius remaneant, propè confinium tamen gibbæ, talis contingat irregularis laceratio, ut quid novum videatur id quod emergit, reflexa enim hæc ad latera vasa disrumpuntur, quæ novam

partium apparentiam exhibent.

Aliud etiam, quod additur totam renum hanc portionem absolutè fibrosam esse, nihilque præter hanc, exceptis sanguineis vasis, adesse multum difficultatis habet: nam in singulis renibus, quos hucusque ad manus habere potui, glandularum minimarum proventum deprehendi, hoc in quadrupedibus, in testudinibus, & in homine ipso semper mihi accidit observare. Ut autem hæc facillimè innotescant, injiciendus est niger liquor spiritui vini commixtus per arteriam emulgentem, ita ut totus turgeat ren, & exterius denigretur; nam nudis etiam oculis, ablata renum membranâ, illicò occurrunt bifurcatis hinc indè arteriis appendicæ nigro & ipsæ colore infectæ glandulæ; & secto per longum eodem rene, inter vasorum urinæ fasciculos, & enata etiam interstitia innumeras ferè easdem observabis, quæ sanguineis vasis atro liquore turgidis in speciosæ arboris formam productis, veluti poma appenduntur: vulgata circumfertur in hujus confirmationem historia, in quâ viscebatur in rene lapillus tot particulis

constans, quot in rene venularum erant ramuli, quarum particularum lapilli extremum velut caput marmoris rotundi, & candidi frustulum referebat, vel margaritæ majusculæ figuram & splendorem; quare hæc tertia renum pars superius expositis circumscripta terminis, glandulis, venarum, & arteriarum rivulis (quibus addere poteris fortasse nervos) & tandem excretoriis urinæ ramulis, constat.



cæres habere vasorum extremas propa-
gines, instar serpentium capreolorum
incedentes, ut coronatæ quasi appa-
reant, cùm hac tamen conditione, ut
præcipua pars, quæ arteriæ ramo ap-
penditur, denigrescat, residuum verò
proprium retineat colorem. Connexio-
nem talem habent cum arteriarum ra-
mis, ut ab interioribus, & quandoque
ab exterioribus partibus intrò reflexis,
& in multiplices furculos propagatis
adnascantur, & ipsis appendantur: hoc
evidenter demonstratur immisso colo-
rato liquore per arteriam emulgentem,
nam eodem inficiuntur colore glandu-
læ, ac continuatæ arteriæ, ita ut ocu-
lus facillimè cohærentiam ipsarum evi-
denter attingat.

Cum venis etiam, quæ arteriarum
expansionem subsequuntur, societatem
habent glandulæ: etenim dùm injecto
atro liquore inflantur venæ, licet con-
tinuatæ glandulæ non eodem turgant
humore, eò tamen videtur insinuari
color, ut inter glandulas, & extrema
venarum infectorum nihil mediet, est
enim probabile injectum per venas vi
liquorem, superatis ipsarum valvulis.

ad ostia glandularum hæreere, & diffimilibus ipsarum meatibus excludi. His accedat glandulas modò albas, & ferè diaphanas esse, modò rubras, quòd certè ex arteriarum affuso sanguine contingit: constat autem ex consuetu naturæ usu ab eadem parte ortum trahere venarum radices, in quam desinunt extremæ arteriæ, undè, quanquam sensus hanc continuitatem non attingat, ratio tamen sufficienter evincit.


De nervis, nec fortè etiam erit difficultas: hos etenim ferri per intima renum communiter observatur, undè ad glandulas cùm cæteris vasis, ut in consimilibus conspicitur, deduci probabile est. Aliud etiam quæri potest, an ureteris portio in sanguineis glandulas attingat, nam pelvis, ut infra patebit, sinu suo fovet venas, & arterias usque ad capillares propagines; quare vereri etiam possumus suis fibrulis glandulis necti.

Remanet aliud vas urinae excretorium, cujus ramis extimam præcipuè renum molem conflare, superius innuimus. Dùm laboravi, ut oculis evi-

dentem hanc continuationem subijcerem, quam ratio sufficienter attingebat, nam infusi liquores per arterias, etsi glandulas repleant, non tamen urinæ vasa penetrantes unquam observare potui, quod etiam de venis mihi accidit eâdem institutâ methodo, per ureteres immixtus liquor nonnullas tantùm pelvis productiones suo colore infecit, nunquam tamen excretorium hoc urinæ vas, quod alii fibras dixere, & inde glandulas denigrare valuit, quapropter multis (incaſsum tamen.) tentatis machinamentis, glandularum, & urinæ vaſorum connexionem non intrueri potui; poſtremò tamen hoc mihi tentandum occurrit in animali adhuc vivente, quod ſæpiùs in cane molitus ſum: venas etenim emulgentes vinculo ligavi, & ſimul etiam ureterem deinde, cùm diù ſupervixiſſet animal, ex appulſo ſanguine ingenter turgentem abſtuli renem, qui per longum in dorſo ſectus diſtinctas urinæ vaſorum, ſeu fibrarum propagines cum glandulis mihi exhibuit videndas, inter quas in aliquibus portionibus, ubi magis ab intercepto ſanguine rarefacta erat extima

renum pars, & successivè vasorum urinæ magis extendebatur fasciculus, aliqualem connexionem, & continuitatem mihi visus sum videre, non talem tamen, ut sensus omninò acquiescat: ratio tamen suppetias ferre potest, nam si in hepate, cerebro, aliisque glandulis hoc est perpetuum, ut singuli quique glandularum acini, seu globuli proprium ramum excretorium, præter arterias, & venas, promant, idem etiam erit dicendum de hujusmodi glandulosi corporibus; cum autem hæc oblonga corpora sint, glandulis saltem contigua & ex naturâ suâ sint determinati humoris excretoria, compressa enim fundunt urinam, ideò probabilissimum videtur intimam cum glandulis hisce connexionem habere. His accedat, si verum, (ut probabiliter in confesso apud omnes est) urinæ materiam ab arteriis derivari, cum constet ex superius allatis extrema arteriatum in has copiosissimas glandulas haurire, & urinam per renum fibras, velut per propria excretoria vasa, eliminari in pelvîm, necessariò fatendum erit, inter hæc contiguitatem & communio-

nem intercedere , aliàs ab arteriis in pelvim nullus excerneretur secretus humor.



CAPVT IV.

De residuo substantia Renum usque ad pelvim.

EXtimam gibbi renum partem copiosis excitatam glandulis , vasorum sanguineorum propaginibus , & tandem multiplici urinæ vasorum fasciculo superiùs exposuimus , & quoniam continuatam urinæ , & sanguinis vasorum productionem , usque ad renum centrum , vel pelvim in perfectioribus animantibus observamus , in pennatis etiam usque ad ureteris bifurcationem , & dilatationem , ideò necesse est hujus partis historiam pròsequi. Urinæ igitur vasa à gibbo & extremitate renum exortà , superato vasorum arcu , rectà versus centrum petunt , & in quibusdam , velut in fasciculum collecta , in formam papillæ

definunt, ita ut tota fibrarum harum, seu vasculorum compages pyramidem plurium laterum referre videatur; in aliquibus cum in unam tantum continuatam regionem, & veluti extensam papillam conspirent, à totâ renis peripheriâ exorta urinæ vasa versus medium definunt, ubi per oblonga quædam foramina in pelviam exsudat urina à singulis oscillis vasorum interiùs hiantium, ut in bovis, canibus, felibus, & aliis observavi. Hæc pars vasorum concursu, & finibus excitata antiquitus nascenti lunæ, vel peponis parti à naturâ secundum ipsius longitudinem divisæ comparabatur, & sicuti in pepone cortex à penitiori ejus substantiâ differt, quæ infimam lineam definit, sic etiam in caninis renibus evenire credebatur, ut ejus substantiæ pars, quæ gibbam regionem spectat, rubra sit, altera verò, quæ cavum respicit, alba, & nonnihil in medio sinuata, & excavata. In consimilibus renibus, licet omnia urinæ vasa ad medium concurrentia elongatum hoc semilunare corpus efforment, indeque eruant urinam, ex exterso tamen pelvi collectio-

nes quædam dictorum vasorum subrotundæ excitantur, sicut in renibus qui in papillas dividuntur: quæ ulterius versus centrum protractæ uniuntur, & in descriptum semilunare corpus desinunt; in aliis autem renibus, in quorum extimâ superficie insignes lobuli foveis circumscripti observantur, vel eorum obscura adsunt vestigia, ut in homine urinæ vasorum concursus in coalescentes quasi papillas conspiciuntur, quæ multiplices sunt, & numero etiam variæ: & quamvis in his portiones carnis, seu vasorum urinæ adhæreant pluribus in locis expanso pelvi, certum tamen est, omnia hæc vasa in solam papillam tendere, & nequaquam hiare in portiones superextensi pelvis, itaut urinæ portio per porulos pelvis, & non per papillas excernatur, quod etiam in homine accidere certò scio, nam ex diligenti & sæpè repetitâ sectione collegi in humano rene, urinæ vasa, quæ fibras carneas solidas & compactas repræsentant, desinere in evidentes & distinctas papillas, quæ in pelvim protuberantes hiant, & à tot ejusdem tubulis excipiuntur, & ut pluri-

nūm ad duodēcimum usque numerum adscensu complent ; horum vasorum propagines à papillâ deductæ producuntur velut à centro quodam in renum circumferentiam , & quandoque cū aliis contiguis fibris implicantur, ex quibus concludere possumus omnem urinam per papillas , quæ interdū rotundæ sunt , interdū oblongæ excerni , & nequaquam per poros in pelvi excitatos his per aliud tortuosum corpus ; & licet aperto pelvi appareant continuatæ quædam protuberantiæ ex urinæ vasis excitatæ , pelvi arctè hærentes ; certum tamen est , non esse vasorum extrema ora , sed latera in papillam tendentia.

Apud quosdam dubitatum est an in papillarum extremitatibus caruncula quædam diversi generis, quam verrucam aliqui dixere , vel saltem glandulosa quædam substantia appendatur , per quam veluti in mamillis accidit, urina excernatur , vasorum fines custodiantur , vel saltem urinæ cameræ stabiliantur. Firmiter tamen est ex his, quæ diū observavi , in animalibus præcipue : ubi distinctæ emergunt hujus-

modi papillæ, nullum diversæ naturæ appendi corpus nec protracta vasa alienam acquirere naturam, sed ingeniosum sortiri hiatum; etenim singula quæque urinæ vasa à glandulis exorta, & ad papillare corpus producta, non eundem omninò terminum assequuntur, sed ab excicatâ in apice papillaris corporis fissurâ emanat urina, ita ut hac diductâ cultro, singulorum urinæ vasorum inæqualiter elongata extrema ora deprehendantur; aliquando autem urinæ, & sanguinis vasa usque ad apicem deducta reflectuntur ad latera, ubi non longè ab extremitate papillæ foramen quoddam cavernosum observatur, in quod singula vasa & reflexa, & recta desinunt, undè compressâ papillâ urinam totam indè promit.


Nec urget id, quod novissimè objicitur, per papillas hasce urinam nequaquam excerni, cùm arenulæ & lapilli quandoque è renum substantiâ decidant, qui cùm mole polleant, videtur impossibile quodammodo capillares canaliculos, quibus papillæ coagmentantur, permeare possint.; quin & sensum in testimonium afferunt contra

urinæ vias in papillaribus meatibus affertur ; etenim licet verum absolutè sit , urinam nequaquam papillari corpore , ut cribro separari à vasis sanguineis , negari tamen non potest per hoc , veluti per extrema urinæ secretoria vasa excerni , cum sit ipsorum tantum coagmentatio , & hiatus , cum evidenter perforati pateant fines ; exiguas autem arenulas , & calculos excerni ab hujusmodi vasis , admitti potest , dummodò ipsorum exigua sit moles , cum urinæ vasa membranosa sint , & consequenter extensilia ; accidit tamen & frequenter , calculos in hujusmodi urinæ ductibus detineri , & adveniente tartaro augeri , ita ut vasorum tenuem corrodat membranam , & ita corrupta non rarò renum caro observatur.

Tota enarrata hucusque renum portio sua habet sanguinea vasa , quæ ab incurvatis ramis propagata , & deorsum protracta hederæ instar , urinæ vasa amplexantur : & in animalibus adhuc viventibus , ubi emulgens vena jam ligata est , ita turgent sanguine , ut major coerciti sanguinis copia hic subsit ,
quàm

quàm in cæteris vasculis. Hæc autem vasa oblitterantur propè finem versus papillare corpus. Undè ex horum gracilitate, & vasorum densitate membranæ, seu nervosum corpus videtur, & sæpius etiam dubitavi, an reflexi pelvis tunica investiatur, cum arctè ejusdem amplexantis sinibus annectatur; in capris autem cum nullam observem inter pelvim, & urinæ vasorum collectionem, hoc nequaquam in singulis perpetuum censeo.





CAPVT V.

De vasorum propagine, & pelvi.

ARteriarum, venarumque ramis totam renū substantiā irrigari, apud omnes notum extitit, emulgentes etenim arteriæ & venæ cavum renum subintrantes in plures surculos, hosque insignes distributæ, extensum ureterem, qui pelvis dicitur, inter adipis molem excurrentes, tandem ubi appendices quædam, quas tubulos dixere, quæ circa papillas à pelvi elongantur versus gibbum, eodemque veluti sacculo contentæ in arcum curvantur, aliisque ramis obviam eunt, & anastomosi uniuntur, ab hoc arcu versus renis gibbum & extremitatem propagantur plures, & plures propagines, quæ & ipsæ implicationem quandam reticularem promunt, & inter lobulos, quibus urinæ vasorum congeries subdividitur, excurrunt usque ad extimam superficiem, à quâ aliquantulum ad latera re-

flexæ tandem interiùs terminantur , & harum speciosam sobolem immissum atramentum perbellè describit ; desinunt horum extremi surculi ad glandulas superiùs descriptas. Et quoniam ab extensi pelvis tubulis , & à vasorum arcu subrotundum quoddam spatium describitur , quod ab urinæ vasis in papillare corpus coagmentatis repletur , ideò hinc indè emergunt rami in arcum sub gibbo ducti mutuâ , anastomosi unici , quorum descripta spatia ex nonnullorum observatione favos referunt. Horum etiam vasorum propagines ab arcu infrâ circà urinæ vasa feruntur , quæ contento sanguine manifestantur. In quibusdam brutis , & præcipuè in fœtibus , per renis exteriorem portionem sanguineum vas excurrere sæpiùs observavi , cujus crebris ramorum flexibus renum minores divisiones in lobulos ambiuntur , & interiores etiam lobulorum rimulæ pervaduntur , his tandem desinentibus in glandulas. Hîc omitto sanguineorum vasorum expansionem in cavitatem à veteribus imaginatam , quàm plures nervosè oppugnarunt.

Inter renum vasa non infimum locum habere videntur utereres, de quorum quidem exortu, & ultimâ insertione litigent alii; illud unum hîc adnotabo: quatenûs quidem sub pelvis specie per renum corpus cùm cæteris vasis diffeminantur, esse pelvim extensionem ureteris iisdem constantem membranis, nerveisque fibris, quibus ureter componitur; in brutis, in quibus urinæ vasa in papillare corpus desinunt, insignis quædam ureteris per medium renis, 'quasi ovalis expansio, observatur, quæ è regione hiatus papillarum appendices quasdam tubulosas promit, quæ versûs gibbum ulterius protractæ latiores redditæ, quasi infundibulum efformantes, quod pro secundâ cavitate, vel pro cribro acceptum à plerisque est, admissam intrâ se unam vel alteram papillam arctè amplexatur; ab his posteriores propagines promuntur, quæ subsequentes contentorum sanguinis vasorum ramificationem, easdem omninò implicationes alveolorum edunt, quas ab arteriis & venis excitatas diximus; à pelvis etiam appendicibus in arcum productis mem-

branosa, nisi mavis nervea, fibrae innumeræ ferè versùs gibbum producuntur, cujus extremos fines nunquam attingere potui. In cæteris animalibus, ut in pecude, cane, &c. in quibus papillarum loco extensum quoddam corpus semilunæ simile observatur, pelvis expansiones habet, quæ fibrarum fasciculos in hujusmodi continuatum semilunare corpus desinentes amplexantur: & quoniam extrema urinæ vasorum ad pelvis cavitatem desinunt, ideo secundæ antiquorum cavitates superius descriptæ infundibuli formam æmulantes non deprehenduntur, sed pelvis istæ portiones, velut extensa vasa, eadem methodo paulò antè descripta per totam renum peripheriam disseminantur. In homine pelvis arctioris est latitudinis, totusque continuus est. præter rotunda foramina, quibus necitur, seu admittit papillas urinæ vasis conglobatas: aliquando ureter humanus ante ingressum dividitur, veluti sanguineum vas in plures fistulas, quibus expansis sit pelvis, à quo propagati tubuli occurrentes recipiunt papillas, quod etiam insue non rarò conspexi;

ex hac ureretur extensione lapides renum frequenter cum protuberantiis tuberosis observantur ex tartaro in pelvi, ejusque appendicibus concreto, & configurato: propagines etiam pelvis versus gibbum, & interiores reticulari plexu, vasorum urinæ fasciculos in papillas detinentes colligant, & expansis etiam sanguineis vasis aliquale involucrium præbent, non quale tamen in brutis quibusdam observatur.

Pennatorum ureteris, seu pelvis elegans est forma, etenim per totam renum concavam longitudinem subalbum quoddam excurrit vas, à quo hinc inde rami promuntur, qui sensim latiores, tubæ instar, facti, innumeras alborum vasorum collectiones admittunt à peripheriâ progressas, ita ut hæreas, an hæc candida vasa à lancinato pelvi, & veluti exeuntes digiti à divisa manu promantur, an verò hæc latiores pelvis portiones sint instar infundibuli, in quod copiosa illa alba urinæ vasa seorsitates exonerent; hæc in exiguum corpus implicatione conglobantur, quod cum renalibus in bove, & ursi lobis proportionem habet: ex harum

observatione interdum dubitavi , an excretoria urinæ vasa essent propagines ureteris.



CAPUT VI.

De Renum usu.

EXstillans perpetuò urinæ serum à renibus per ureteres , indeque in vesicam delatum , & statò tempore excernendum , renum usum sufficienter indicat ; quam arte id contingat , obscurissimum ; licet enim glandularum ministerio totum hoc subsequi rationi sit consonum , quoniam tamen minima illa , simplexque meatuum in glandulis structura nos latet , idèò quædam tantum meditari possumus , ut huic quæsito probabiliter satisfaciamus : necesse est hanc machinam internâ configuratione separationis opus peragere ; an verò his , quæ ad humanos usus passim usurpamus , quibus ferè consimilia effingimus , consonet , dubium : licet enim occurrant analogæ spongiæ ,

incerniculi fistularum, cribrorumque structuræ, cui tamen ex his confimilis undequaque sit renum fabrica, difficilimum est assignare, & cum naturæ operandi industria fecundissima sit, ejusdem ignotæ nobis reperientur machinæ, quas nec mente quidem assequi licet. Illud miror tam copiosa diversaque corpora per has glandulas separari in naturæ statu, exit enim substantia aquea cum salinis, sulphureis, & confimilibus particulis, & ex morbo etiam abscessuum reliquiæ, & totius quandoque corporis inquinamenta separantur detentis sanguineis partibus, quæ & ipsæ plures sunt, nec unicâ fortassè formâ constantes, & tamen minimam & simplicissimam, ut puto, harum glandularum structuram natura efformavit, ex quo dubitari possumus ea quæ per has urinæ vias excernuntur, in unam quâvis coire molem ita ut salium & similibus ad invicem subintrantes particulæ unum tantum efficiant determinatæ figuræ corpus, & quidquid majoris corporis, vel diversæ saltem figuræ meatulos, & minimas intercapedines excernendi corporis non subintrat,

illud non evacuari, ex quo etiam sequi potest per has urinæ glandulas elabi, quæ alioquin utilia animalis œconomix sunt; nam singulis his excretis similes adhuc portiones remanent in arteriis, & venis ad animalis usus, eaque tantum separantur, & veluti inutilia excernuntur, quæ liberiora, & plus justo exaltata ex intestinâ fermentatione à cæteris benè sejuncta effluunt necessario, dùm structuram hanc offendunt, indeque animali illud proficuum succedit, ut minores in corpore turbationes excitentur, faciliùs transpiratio celebretur, aliarumque animalis operationum impedimenta tollantur. In hujus confirmationem observavi interdum plus justo colliquato ebulliente sanguine vi prægressi motus, vel vehementis agitationis, urinam reddi sanguineam subsidente etiam grumescente sanguine, & in his sanguinis portiones ad testes, aliasque partes novâ sibi factâ viâ tumores excitasse; unde ad separandam urinam, præter renum structuram, perpetua concurrat sanguinis fermentatio, quâ solutæ, & liberiores redditæ salinæ, & aqueæ particu-

læ faciliùs occurrente structurâ exci-
piuntur , & à residuo separantur , &
his variatis urinæ qualitas , & excretio
immutantur.

Contingunt autem in urinâ vitia la-
be quidem minimæ hujus structuræ,
quæ à concrecente ibi tartaro , vel
pertranseuntibus salinis particulis lace-
ratur , sed ut plurimum à vitio appel-
lentis sanguinis dependent , & præcipuè
hæreditarii illi morbi , quorum diathe-
sis non in renum perpetuò structurâ,
sed in sanguine propagatur ; etenim re-
num hujusmodi morbus non rarò in
consimiles aliarum partium , scilicet in
podagram , immutatur. Et ut verum
fatear , in nostro corpore , præter pul-
mones , non est alia pars , quæ exun-
dantis sanguinis injuriis magis subji-
ciatur , ejusque vitia faciliùs indicare com-
patiendi possit , quales sunt renes.

Laborant Renum minimæ glandulæ
omnibus morbis glandularum propriis,
quos brevitati studentes omittimus.
Urinæ excretoria vasa, quæ fibras dixe-
re, pilorum per urinam excretorum
generationem promovent , etenim in
iis , quibus urina crassior , & compa-

Etior est, instar semiconcreti lactis, ureteris illæ minimæ propagines, dum affluentem hunc crassiorem succum admittunt, oblongam, & teretem eidem impertiunt figuram; quæ in eodem, licet in latiori pelvi recepto, adhuc conservatur, quare ex diversâ serositatis per renum has minimas glandulâs excretæ dispositione ad concrescendum pilorum promovetur generatio: accidere etiam potest, ut interdum portio concrescibilis seri vel fibrarum à minimis glandularum meatibus excidat, & dum per excretoria vasa in pelvim deferretur concrescendo teretem hanc figuram acquirat. Idem dubitare possumus de salibus & liquoribus, qui facilem ad concrescendum retinent figuram, vel quia à consociis sejunguntur quorum miscella fluxiles redduntur, vel quia aliquo de novo associatio fixantur, undè de facili in vasorum urinæ arctis tubulis in pilorum formam configurantur, quam etiam ulterius delati retinent, quod morbi genus mammillis familiare scimus. Vulgatum insuper est, exiguas carunculas à renibus excerni, quæ probabiliter sunt grumæ.

centis sanguinis particulæ cùm urinæ
fæce commixtæ, vel saltem excretorio-
rum urinæ vasorum tunicæ, quæ per-
transeunte sero erodi possunt, eidem-
que urinæ deorsum ferri.

Ureter etiam in pelvim expansus ver-
mibus, & ut plurimum calculis affici-
tur, si enim ex affluentibus perpetuò
tartareis, salinisque particulis ex illis
una à pelvi irretiatur, lapidis rudimen-
tum promovet; facile namque est, ut
pertranseuntibus occurrat, & confimi-
les detineat, ita ut ex conglobatis plu-
ribus hisce particulis lapis assurgat, un-
dè fortè natura pelvi pinguedinem sub-
jecit, ut continuò interior ejus super-
ficies lubrica redderetur.

Renibus seminis materiam præpara-
ri pluribus arrisit, quare in gonorrhœa
lumbis medicamenta apponuntur, ip-
sique libidinis sedes vulgò crediti fue-
re: hanc diù fovit sententiam vasorum
spermaticorum cùm renibus aliqualis
societas; quoniam tamen à renibus,
ejusque vasis nihil in seminis officinas
immediatè derivatur, ideò non viden-
tur renes, peculiarem præparare mate-
riam pro seminis generatione, sed uni-

versalem quandam & remotam, non spernendam dispositionem, pertransenti sanguini impertire, qui variis tandem cribrationibus ultimò semen efficitur; etenim probabile est seminis particulas ex appulsis ad testes succis separari, fierique diversarum, omniumque partium, quibus animalis corpus indè coalescit congeriem: & quoniam hæ partes ab arteriis rudem saltem, & primævam originem deducunt, ideò si defæcatios vi viscerum reddatur sanguinis massa, subsequens etiam coctiones eò perfectiores celebrabantur; quare nil mirum, si salinæ illæ particulae, aliaque per renes cribranda, & excernenda, dum remaneant, non solum suâ præsentia & libertate seminis materiam ibificere possint, ita ut infœcundum reddatur, vel saltem ad progignendam molam, vel abortum præviæ dispositiones, & incitamenta foveantur: sed probabile insuper est harum particularum detentione fixari quandoque seminis minimarum particularum deciduam, vel à toto, vel à sanguineâ massâ emanantem substantiam; quapropter ubicunque exacta

glandularum in renibus existentium
structura sanguinis massa sanguinis
massa hujusmodi ex allatis salibus &
inquinamentis liberatur, facilior fer-
mentatio perpetuatur, similiarium &
dissimiliarium partium rudimenta
ducuntur, & testium fabrica separan-
tur, indeque recollectum semen fœ-
cundus viget.





PRÆFATIO

DE

L I E N E.

Nescio quo fine ducta *Vetustas*, *lienem* risus causam extare evulgaverit, dùm longo *Literatorum* mœrore, ob nondùm affecutam hujus visceris naturam lugent *Academia*. Si enim *Anatomicorum* revolvas elucubrationes, quæ copiosæ præ cæteris occurrent, cùm in hujus indagine plus insudarint Auctores, quàm in reliquâ corporis machinâ, talem hesitantiam, & tam varia meditationum figmenta reperies, ut tan-

tum absit, ut hilaritas, ac voluptas illa sapientum risui affinis, re aliquâ compertâ suboriri possit, quin potius inde stomachus moveatur, cum inter tot conatus circa huiusmodi viscus, subsannandi nonnulli eruperint, à quibus sortè etiam in Superis, si hac illos tangerent, risus excitaretur; etenim tam altè philosophati sunt de Liene homines, ut neglectâ mirâ Lienis organicâ compage, merum crediderint pondus, quo sinistrum corporis latus, dextro, ob jecoris præponderantiam, æquaretur. Apud alios, nec ad ponderis munia est revocatus, sed inutile quoddam naturæ supervacaneum, veriùsque abscindendum reputatum est; & quoniam Veterum sollicita fuit cura naturam in multiplici excrementorum generatione, eorumque eliminatione perpetuò detinere, ideò

inter viscera , quæ copiosè ad hujusmodi operas destinarunt , non infimum habuit Splen locum , cùm ad terrestriorem separandum limbum damnarint. Nobiliori interim vitâ ut frueretur , è nonnullis ad vitalem auram regio cordi præparandam eligitur , mox vilioribus familiæ servis , consociis scilicet abdominis partibus , crudiori è chylæ coctam à se alimoniam distribuere cogitur : nec diù gavisus hoc panificio , unicum concoquenti ventriculo fermentum ministrat , quod temporis interim tractu deletum , dùm veluti subiectum focum calorem in ventriculum exhalare volunt , & parum ignei prestitit hoc lar effluvii ; etenim derivata à ventriculo , vicinisque partibus aquosâ colluvie . aquæ lacus Lien efficitur. Hæc & similia , quæ alicorum detexit sedulitas , me quo-

que ut circâ hujus visceris structura indaginem occuparer suaserunt, propterea solitas revocans anatomicas exercitationes, qualescunque sint, ut mortalis vite tedium natura abdita scrutandi dulcedine mitescat, in additamentum eorum quæ jam de quibusdam visceribus evulgavi, pauca hæc addam.





D E

L I E N E.

CAPVT I.

De Lienis membranis.

Membranarum generatio, proventus, & usus adeò in naturâ familiaris est, ut non tantùm singula corporis membra quoquomodo alicui dicata muneri circumducantur, sed quæ naturam ipsam oppugnant, eamque à rectâ operandi ratione deflectere cogunt, tam providè membranis ipsis donentur, sicuti in tumoribus præcipuè accidit, ut suspicari possimus aberrantem etiam naturam membranarum texturam non dediscere; undè nil mirum, si providè Lien, qui ne-

cessariò firmitudinem, certosque propriæ compagis terminos exigebat, binis membranis circumambiatur. Exterior itaque satis valida, totum ita ambit Lienem, ut veluti marsupio contineat, quod in ovis præcipuè apparet; in aliquibus autem non totus involvitur Lien, sed exigua ejus quædam portio, quæ ventriculum tangit non obvelatur, ex quo emergit dilucidatio sententiæ eorum; qui hanc tunicam asserunt expansione momenti esse, vel mavis peritonei productionem Lienem obvelantis, nam diaphragmati in bove hærens, communi ambitur involucrio.

Nervos hæc habet, venas & arterias quæ per longum excurrunt, & ab extremis arteriarum finibus internam Lienis substantiam perreptantibus irrigatur: undè avulsâ hac tunicâ, rubicunda quædam stigmata emergunt, quæ nihil aliud sunt, quàm arteriarum ora laceratis ulterioribus ipsarum per exterius involucrium propaginibus observantur venæ & ipsæ per modum laxioris retis implicitæ in conspicuos ramos degenerantes, quæ tandem ad

truncum ingredientis splenici vasis deducuntur, vel in omentum continuatæ ulterius elongantur.

An interiores lienis fibræ exteriùs productæ hanc attingant, & mediante ipsâ ultrà propagentur, non est conspicuum: certum tamen est, licet hæc absque vi à subjectâ separetur membranâ, filamenta quædam ad invicem implicita, & quandoque tunicæ fimbrias æmulantia lacerari, quæ quamvis certam inclinationem non habeant, nec ejusdem naturæ cùm penitioribus fibris esse videantur, attamen à rotundis quibusdam protuberantiis, à fibrarum ultimâ terminatione in membrana subortis erumpunt.

Lymphaticorum copiam his adnectere lubet, qui multiplici propagine sub exaratâ lienis membranâ excurrunt, suisque conspicuis truncis circa sanguinea vasa, hoc viscus ingredientia ludunt. Mira est istorum amplitudo & nexus, rete enim, cujus inæqualia sunt intercepta spatia, efformant. Contentus humor flavo, & interdùm subrufo saturatus colore fluit, & frequentibus valvulis fulcitur, postre-

moque conspicuis ductibus per omentum deductis in receptaculum irrupit.]

Detractâ exteriori tunicâ , quod facillimo succedit negotio , occurrit altera levis , & firma , totum lienem ambiens , nullibique perforata , præterquam ab vasorum ingressum , & egressum ; non adeò tamen densa est , quin per ipsam aeris portio non erumpat , dum vi in vasa intruditur , quæ tamen ab alterâ superextensâ membranâ coercetur. Componitur hæc non vago , & irregulari filamentorum contextu , ut solenne est in cæteris panniculis , sed eleganti & mirâ fibrarum implicatione contextitur , quæ fortè describi nequit , sed solo intuitu attingi potest ; in singulis enim suæ substantiæ particulis , ubi interiores fibræ transversim lienem excurrentes necuntur , tenuia quædam stamina hinc indè ab hoc puncto veluti à centro quodam diramificantur , donec continuis fibris à consimili exordio emanantibus occurrant , cum quibus implicatione factâ , totam hanc panniculi structuram efformant : hoc totum la-

ceratione mediâ emergit, si per longum in bovino liene fiat; faciliior namque contingit fibrarum ibidem integra separatio, cùm præcipuè versùs superiora rectitudinem habeant. Membranam istam osseam fieri à pluribus est observatum, & Boschius ita induratum versùs abdominis musculos vidit, ut schirrum in ipso subesse suspicaretur. Non rarò, in ovibus præcipuè, concretos calculos ex gypseâ materiâ, vel melicerides, aliosque tumores observavi, ex variâ fortè cructatâ ab extremitate vasorum concrecente materiâ.

Arteriarum finibus irrigatur hæc membrana; nam si atramento, vel aëre turgeat splenica arteria interiora lienis pervadens, extremi rami versùs omnem periphæriam, breviter tamen producti tribus, vel quatuor ramulis ulterius subdivisis assurgūt. Idem etiam observatur tumefacto ex aere, vel atramento, splenico ramo, etenim in membranâ investiente, ampli rami hinc inde dispersi, infuso humore referti attolluntur, & secto etiam per medium lienis, insignes veluti arborum radices deprehenduntur rami, colore infusi hu-

moris aspersi, qui probabiliter ex continuatâ viâ, quàm ater humor immisus designat splenici rami soboles sunt.

Taliter igitur circumdatâ lienis substantiâ propriâ, nondum tamen certa circumscribitur figura, quæ in homine ut plurimum oblongior, & latior est: in brutis autem diversissima; partium etenim vicinitas mollisque splenis natura varias impressiones, & protuberantias efficit, undè irregularis suboritur figura, nam aliquando globosa est, interdum in lobos finditur, & in quibusdam piscibus, ut in Squalo subrotundis eminentiis, racemi ad instar assurgit, quod idem in lacertorum liene observatur. Clarissimus Bartholinus in Delphino splenem multis globulis constantem vidit.

Deformem etiam & monstruosam tum figuram, tum molem acquirit, dum laxatis suæ structuræ meatibus, ex copiosâ affluente, nec derivatâ humorum colluvie, insigniter protuberat, ut passim historiæ apud Medicos produnt.



CAPVT II.

De Fibris per Lienem dispersis.

Fibrarum, quibus universus Splen stipatur, tantus est proventus, & mira implicatio, ut abundè naturæ solertia in custodiendis, fulciendisque propriis machinis innotescat. Harum structura usuque apud anatomicos controvertitur, nam antiquiores pro sanguineis vasculis habuerunt in innumeram ramorum sobolem diffusis; harumque cavitatem experienciâ conati sunt firmare nonnulli Clarissimi Viri, additis insuper rationibus. Nam sicuti hepatis vasorum implicatione sanguinem recipit, continet, ab impuritatibus defæcat, ipsumque tandem cordi subministrat transvehendo materiam per totum parenchyma vasorum ministerio, ita cum quid simile in liene succedat, vasorum eadem implicatio requireretur.

Famigeratissimus Glissonius novo

G

assignato usu cavas ita credidit, ut nervis in vehendo succo esset auxilio, oculatior tamen inspectio hujusmodi filamenta tantum esse tenuia & valida, nullam cavitatem habentia, prout sensus attingere valet, nec à venis, vel arteriis orta demonstrat, si diligenti indagine ipsarum exortus implicatio, & structura examinetur.

Enascuntur hæ fibræ ab interiori lienis membranâ, & per transversum producuntur in oppositam dictæ membranæ partem, seu capsulam quandam, sive commune involucrum vasorum per medium lienis perreptans. Non idem servant pianum, sed identidem sibi occurrentes subdivisæ propriæ substantiæ, vel fibrularum seu capillarum partium dimidiatâ portione consimilibus inosculantur ita ut mirus fiat nexus & rete, & dum membranæ accedunt, bifurcantur; undè multiplicibus veluti ramis in ipsam inferuntur.

Componuntur hæ fibræ filamentis, seu minoribus aliis fibris per longum ductis, etenim scissæ filamentorum elegantem implicationem, ramorumque productionem exhibent, extremis

autem finibus per latum extensis in membranam definunt, undè satius videtur credendum, fibras hasce productiones esse membranæ propriæ lienis, ejusque capsulæ propriis staminibus confarcinatas, ut sanguinea vasa, molisque lienis structura conservetur: eumque locum habere, qualem in ædificiis ferrea illa vincula, quæ arcubus ad robur subtenduntur.

An verò singula quæque filamenta fibram constituentia cava sint, interdum dubitavi, eò quia dum fibras componunt, eandem implicationem & productionem servant, qualis in fistulis arborum ramos componentibus observatur, & licet in membranam absumantur, adhuc tamen per aliquod spatium determinatam inclinationem retinent: Quoniam tamen Spigelius observavit interiorem lienis membranam hujusmodi fibram efformatam plexu, osseam fieri, & interdum cartilagineam, quod ego in bove semel vidi, non videtur vasorum natura de facili his competere posse. Huic accedat, me diù quæsisse, an hujusmodi fibræ à tunicâ erumpant, & in deter-

minatam partem ferantur , sicuti in cæteris vasis excretoriis præcipuè accidit , nec unquam præter exigua filamenta , quæ nervi potius propagines sunt , in omentum deductæ , observare potuisse ; hoc tamen sagacioribus , & felicioribus ingeniis determinandum relinquimus.



tensos tubulos in liene præ cæteris amplios prosequentes , hinc indè productis surculis , extremis tandem diramationibus ad nova quædam corpora , & ad lienis spatia desinunt : reliqui autem in exteriori tunicâ absumuntur , hoc totum in bovino , suillo , & ovino liene faciliùs innotescit , in homine tam flaccida est lienis substantia , & tantus est sanguinis coerciti proventus , ut vasorum alioquin exilium progressus de facili affugiat ; patent autem vasa injecto atramento , quo arteria denigratur , & scisso per longum venæ ductum , si hinc indè leviter abradatur lienis substantia : multaque aquâ abluatur ; sub venâ etenim à latere tam nervorum , quàm sub ipsis nervis exilis quædam arteriæ productio si superextensæ comparatur venæ , deprehenditur , quæ nervorum & venarum subsequens diramationem , minimas hinc indè promittit propagines , sicuti in aliis vasorum germinationibus contingit. Hujus extremi fines multiplices sunt , & recollecti equinam caudam efformant , quod in equorum etiam liene levi abrasione præ cæteris observatur. Hi multiplices

ramorum fines arctè amplexantur exigua quædam corpora per lienem dispersa ; inferiùs exponenda ; aliis autem ulterius productis propaginibus in membranam desinunt, quâ lienis spatia inferiùs lustranda excitantur, cæteri arteriæ fines ad investientem tunicam producuntur, ut patet inspecto liene, cujus arteriæ aere, vel atramento turgcant ; contingit etiam, ut arteriarum rami ad periphæriam lienis deducti reflectantur versus ejusdem superficiem, & contiguis propaginibus implicentur.

Venarum in lienem ingressus omnibus notus est, famosus namque est splenicus ramus venæ portæ soboles, qui unicâ productione, vel pluribus, ut de arteriâ dictum est, lienis cavum subintrat ; ulterior tamen progressus apud Anatomicos controvertitur. Doctissimus enim Higmorus, & alii in bove, damis, & ovibus censent, splenicum ramum, cùm primum attigerit lienis tunicam in poros ejusdem corticis statim desinere & obliterari ; in homine autem paulò altiùs splenis substantiam cùm arteriis penetrare. Quid

tamen mihi sæpiùs observare licuerit, brevibus exponam, & quoniam nullus est lien, qui minorem involvat suarum partium obscuritatem, quàm est boum: idèò exemplo Higmori hujus vasa examinanda assumam.

Lienis igitur vasa in bove membranèâ quada.n portione circumducta, vena scilicet, & arteria, & bini nervorum rami unitim interiora lienis intrant, ita ut antequam ipsum subeant levi divulsione separentur; ut autem jam ingressa manifestiùs pateant immis- sis in venâ perlongum forficibus aperiat oblongus, & amplius ille venosus sinus, qui per totum excurrit lienem; in diducto hinc indè canali (si fiat sectio in parte graciliori, ubi inter hunc ductum, & exteriorem membranam parum substantiæ lienis intercipitur) illicò emergit exigua quædam arteria; si præcipuè jam atramento repleta fuerit, quæ cum nervis à sinistris, vel hinc indè excurrentibus per longum expor- rigitur, & licet hæc primò oculos incurrat, & præ cæteris proximior videatur, attamen super hanc tenuis quædam, & diaphana, extenditur venæ tu-

nica, vel saltem ejus vicaria, etenim quamvis in ingressu foramina quædam, & quasi lacinias quasdam in splenici rami tunicis excitatas observemus, quibus ejusdem tunicæ uniri, vel terminari videantur cum lienis substantiâ; attamen levi factâ laceratione, seu extremo cultro separatione, vel ipsis etiam unguibus, continuatio hujus membranæ, impensè tamen gracilis observatur per longum ductus, & facillimo etiam negotio à subjectâ arteriâ, & nervis separatur. Unum tamen observatur, venam hanc propè lienis ingressum (exterius scilicet) duplici constare tunicâ; in ipso autem limine harum crassiores, & externam excipi ab interiori liene tunicâ, quæ vasorum involucrum efficit, cui arctè hæret, alteram autem ulterius produci. Membrana hæc venosi ductus non tantum superextenditur in eâ tubi parte, quæ excurrentes arterias & nervos fovet, sed in alterâ etiam parte opposita, quæ jam forcibus scissa est.

Multiplicia habet venosus hic amplus ductus foramina, dum arteriarum & nervorum elongatas hinc inde pro-

pagines sequitur , ideò necessariò ramorum hiatus in patenti trunco determinatis in spatiis observantur ex diametro sibi correspondentes , qui cum in geminatos ramos pateant , venosi tubuli ulteriorem progressum exhibent, qui hinc indè , ut mos est , sanguineorum vasorum subdivisionibus iterum productis usque ad externam membranam eandem ferè servat proportionem, quam in filice observamus. Aliis ulterius foraminibus pervia est hæc venosa tunica , nam inter patentia ramorum orificia , multiplicia quædam , veluti stigmata observantur , non in eà parte, sub quâ excurrunt arteriæ , nervi , sed in oppositâ , ejusque lateribus. In his licet tunica venosa ductus hiet , & pateat , non tamen comites arteriæ , & nervi rami propaginibus concomitantur , quod certè miro non caret artificio , cum ubique in cæteris animalis partibus ferè semper arteriarum , & venarum, quin & nervorum hiatus & productiones consociantur.

Nervi , ut superius expositum est , ut plurimum bini extrâ lienem mutuâ fibrarum implicatione inosculati , mox

subdivisi à latere arteriæ , & quandoque supra ipsam (in hoc enim est naturæ lusus) sub venâ excurrunt. In progressu amplius ductus subdividuntur , & an invicem inosculantur , veluti accidit in thoracico ductu. Divisiones postea & arteriarum bifurcationes sequuntur, ita ut totum lienis corpus pervadant. Investiuntur involucro quodam membranoso , de quo infra , nedum amplum venæ sinum excurrentes , sed etiam in reliquo lienis corpore , ita ut videantur veluti enses vaginâ conditi , quin & fibrulas reticulariter productas eidem involucro communicat.

Doctissimus Glissonius censet nervorum fines fibris reticulare opus in liene efformantibus copulari, ita ut mutuum adsit commercium ad determinatum revchendum succum à sanguine mediis fibris separatum ; Difficillimum tamen censeo , ut sensuum testimonio hoc firmemus , licet laboriosâ utamur indagine cum nervis , unâ cum sociis arteriæ ramis subdivisus ita gracilescat, ut extrema productio nequeat attingi. Hoc unum observavi , nervum subdividi unâ cum arteriis in minimos hinc

indè ramos , & cùm eadem comite arteriâ involucro ambiri , quod ut plurimum est portio capsulæ communis lancinatae , & in fibras gracilescentis ; undè nervus , & arteria minima dùm à capsulâ excidunt fibris involuta , & custodita , tandem desinunt ad exigua , & globosa quædam corpora , quorum accuratior historia inferiùs habebitur ; an verò nervi ulterius in fibrarum fasciculo conclusi unà cùm fibris in exterius lienis involucrum elongentur , non sum affecutus.


Avulsis , seu lustratis sanguineis vasis & nervis , occurrit considerabilis membrana quædam , à nullo , quod sciam , hucusque descripta , quæ suâ circumvolutione vasorum ductum involvit , undè commune involucrum , seu capsula dici poterit. Hæc exortum habet ab interiori & propriâ lienis investiente membranâ , quæ in vasorum ingressu reflexa subintrat cavum lienis ; & in tubum efformata concomitatur vasorum in fasciculum intrâ se collectorum diramationem. Neque in bove tantùm , sed in homine ipso , ove & similibus evidenter patet , facta levi

lienosa substantia abrasione, quâ etiam ejusdem continuatio cum exteriori tunica innotescit. Non ubique sibi similis est suarum partium compage, cum sub arteriâ & nervis, ubi crassius & altius est subjectum lienis corpus, valdè densa, crassaque vigeat, ut tubulos etiam efformet; in parte autem opposita tubi, vel splenici rami membranæ naturam, & structuram ulteriori progressu amittere videtur, retisque similitudinem acquirit; taliter enim crassioribus, & per longum sibi que occurrentibus fibris componitur, ut suborta oblonga spatia, & irregularia foramina, naturam membranæ obscurant. Iisdem foraminibus pervia est, ac vena jam descripta, cum venosi sinus, & arteriæ per lienem diramationes sequantur; in hanc desinunt, seu ab hac exoriuntur altè implantati plurimi extremi fibrarum lienis fines, qui per transversum lienem excurrentes, altero quidem fine in exteriori tunica radicanter, opposito autem in hanc capsulam veluti in centrum deducti, non diversâ ab eâ implantatione, quàm in circumvolvente membranâ diximus contingere,

propriarum fibrarum expansione absistuntur, quin ut verum fatear, si abrasâ levitèr lienis substantiâ capsulæ productionem rimabimur, vehementer dubitare poterimus: fibras quamplures ab ipsâ capsulâ veluti ramos à trunco oriri, cùm capsulæ fines in has fibras absumantur, ut in cæteris vasis contingit. Valido hoc involucro non tantùm firmatur vasorum progressus, sed arteriæ, & nervi præcipuè circumambiuntur, inductâ veluti vaginâ, non tantùm in insigni illo ductu, longum lienis excurrente, sed etiam in extremis capsulæ finibus, nam eadem in tubum recolligitur, quo arteriarum & nervorum extrema producantur, & custodiuntur, donec desinant in exigua illa corpora, vel in membranam appellant.

An hoc involucrum sit nervorum soboles, eò quia nervi dùm ipsius medium excurrunt, reticularem quendam plexum, qui capsulæ immiscetur, promunt, dubitari posset; quoniam tamen in utrisque substantiæ modus diversus videtur, & capsulæ arctior est continuatio cùm interiori lienis sub-

stantiâ , ideò videtur aliundè petendum exordium,



CAPVT IV.

De Lienis substantiâ.

PRæcipuè in animalium operibus officinæ sunt viscera , quæ naturæ micrologiam deprædicant , & foveant , undè lippientibus imponere possunt , quin & affuso sanguine , illuc copiosè irrumpente , veluti tenebricoso quodam velo naturæ mysteria obscurant ; quare tot de lienis substantiâ disceptationes prodire , quæ caliginem hucusque non deterfere. Hofmannus , & alii parenchymatosam lienis carnem appellarunt , solâ laxitate , & mollitie ab hepate dissimilem hanc doctissimus Hig-morus concreto inter fibras sanguine excitari putavit , ita ut unus videatur inter anatomicos consensus , lienis substantiam concretum quoddam corpus esse sanguineum , anchoram , fidumque fundum vasis ibi inexistentibus præ-

bens , communionem quandam habens cū cæteris visceribus , corde scilicet , hepate & renibus. Evidentiùs tamen mihi fortè innotuit longâ & laboriosâ indagine , ita ut substantia lienis aliqualem notitiam tenere incipiamus. Est igitur totum lienis corpus membranarum congeries in cellulas & concamerationes efformata , seu distincta ; & licet dissecta splenis substantiâ concretum sanguinem præ se ferat , & levi attritione in fluorem solvatur ; at tamen non dispari ratione ac in pulmonibus accidit , specie carnis nobis imponit , diluto scilicet colore & substantiæ laxitate. Et ut in propatulo res fiat , arteriæ ramus innodetur , deindè aer syringâ , vel ore ipso per ramum splenicum copiosè intrudatur , totus ita turgebit lien , ut excedentem acquirat magnitudinem , quod etiam , minori tamen incremento continget , si per arteriam inflatio fiat , coercito priùs venoso ductu ; in vitulorum præcipuè suum & caprarum turgido liene illicò in extremitatibus , & inductâ aliquali diaphaneitate , sinus & membranosi parietes emergent. Si autem jam tu-

mesfactus siccescat lien , mox secetur ,
vel ejus frustula gladiolo eximantur ,
totam ipsius molem membranis sinus ,
& cellulas veluti favos apum efforman-
tibus coagmentatam deprehendes ,
quod in ovis & suis liene ob facilem
exsiccationem promptius succedet ; in
humano etiam liene , aere turgido , &
repenti loco exsiccato evidenter ean-
dem structuram reperies , ita ut omnem
eximat dubitationem.

Quamnam configurationem , & com-
munionem habeant cellulae lienis , diffi-
cillimum est explorare , eò quia licet
exiguum sit hujusmodi viscus , inter-
dum tamen non totum secundum inte-
riores & profundiores sui partes exsic-
catur , eum putredine superveniente
corrumpatur : in exterioribus etiam
longo temporis tractu ita densatur , ut
sola cellularum vestigia hæreant , ut plu-
rimùm autem in ovis , & similibus si-
phone immixtus aer laceratis cellularum
gracilibus tunicis , minores sinus dis-
fringit , & ampliora reddit spacia. Prout
tamen in vitulorum & ovium exsiccato
toto interdum splene observare potui ,
talis videtur subobscura structura. Si-

nus ille venenosus amplius , & oblongus , communi involucri circumdatus , per longum excurrens hinc inde insignes promittit tubos , qui & ipsi ulterius laterales alios frequentissime geminant , ut foliorum filicis rudem nobis similitudinem offerant , & tanta est amplitudo , & fruticatio splenici hujusce sinus , donec in membranas investientes appellat , ut major lienis portio in hoc absumatur ; spatia autem illa , quæ inter ramorum productiones , & truncum ipsum observantur , cellularis , & membraneis finibus irregulariter replentur : hæ autem cellulae , excurrentibus per transversum fibris , & vasis nectuntur , & veluti parietes trabibus firmati , stabiliuntur miro naturæ artificio , fibras illas taliter deducendo , ut cellularum angulosos parietes firmet. Assurgunt autem exaratae cellulae ab investiente membranâ , non perpendiculariter elevatae , sed inclinatae , ita ut interdum latior sit area supra membranam à parietibus cellularum descripta , interdum verò angustior.

Figuram , & magnitudinem cellulae istae irregularem habent , prout situs,

& capacitas exigunt , quæ variâ ex-
tentâ aeris irregulari portione nobis
sefe offert. Mutuam communionem ha-
bent patenti orificio , undè in spleni-
cum ductum hiant non tantùm in ejus
extremos ramos , sed etiam in ampli
trunci latera mediis illis stigmatibus
superiùs descriptis , in quibus non in-
sinuantur arteriarum , & nervorum
rami.

Similitudinem habere videntur hu-
jusmodi cellulæ cùm testudinum pul-
monibus , & harum icones in equino
liene apparent ; in avulsâ etenim lienis
propriâ membranâ , assurgentium cel-
lularum fragmenta adhuc supersunt ,
quæ pluribus angulis scatent.

Ovium etiam , & consimilium ex-
ficcatus , & per longum divisus lien , fi-
num , & cellularum vestigia , dùm
ejus exterior tunica lustratur , lumini
objecta ostendit opaciores quasdam ve-
luti lineas exhibendo , seu portiunculas ,
quibus cellularum , & ductuum pro-
gressus haberi potest , ut in resiccatis
pulmonibus aliàs deduximus.

Circà hoc unum adhuc mihi dubi-
tandum remanet , an immissus per sple-

nicum ramum vel per arteriam aer solas cellulas extendat, an verò dilatatis glandulosis sacculis, de quibus inferius, cellularum minorum se invicem tumore comprimentium congeriem efformet, in quibus exturgente forasque erumpente flatu in contiguos sinus, hiatus aperiantur. Plura in hujus dilucidationem tentavi, & cum infusus liquor per venam & arteriam, prout videre potui, turgida nequaquam reddat hujusmodi globosa corpora, vel colore ipsa inficiat, probabile credidi cellularum seriem, quæ in liene ex immisso aere emergit, totam ex solâ membranosa lienis substantiâ taliter concameratâ dependere.

Irrigantur hæ membranæ arteriis, nam interdum reticularem plexum visus sum observasse, qualem in ranarum cellulosis pulmonibus aliàs descripsimus, & affuso per arteriam atramento emergit, quin & immisso mercurio minores rami cellularum membranas pervadentes turgent.


A quamam parte exortum ducant membranosi parietes, quibus concameratur lien, effect inquirendum: Ho-

tum arcta & intima continuatio cum propriâ lienis investiente membranâ, & cum elongatis indè fibris, istis prima conferre videntur, cum facile sit naturæ, levi ipsarum texturâ membranofos in liene parietes efformare. Substantiæ tamen modus, & gracilitas venosi ductûs undequaque similis exaratis jam cellulis, immediatus ejusdem etiam hiatus (eandem enim diceres ulterius protractam membranam) non levem inferunt conjecturam, membranofas lienis cellulas ab extenso venoso ductu efformari, sicuti à gracilesciente clacheâ pulmonum sinus excitari non incongruè aliàs dubitavimus.

Sed sese offerunt quidam Hippocratis oracula, antiquorumque Anatomicorum monumenta sollicitè pervolventes, ut exarata hanc lienis historiam in Hippocrate objiciant, mihi que plagarii notam inurant, nec deerunt in tam involutis, obscurisque Auctorum sensibus, quæ objiciant. Illud enim occurreret, lienis parenchyma rarum, spongiosum, & pumicis instar esse, quibus illicò, ut de pulmonibus à quibusdam deductum video, eviden-

ter demonstratum videbitur , lienem membranosum esse viscus. Non est tamen , qui ignoret raritatem aliis competere posse corporibus , quæ membranosa nequaquam sapiunt naturam , cum foramina & spatiola quibus raritas constituitur in osse , cartilagine , carnibus , & aliis à naturâ membranarum longè diversis observentur , quin cellularum elegans structura continuatis , & densis membranarum tunicis ita conflatur , ut distincti assurgant parietes , & intercepta spatia inde efformentur ; quare improprie & remotè semper rari nomine appellabitur. Accedat aliud , me ab Auctorum scriptis consimilem structuram nequaquam discere potuisse , cum quotidie doctissimorum virorum manibus terantur , qui tamen hæc silentio prætereunt. Scio quidem facile esse , docente Cicerone , ut cum facta sint , ad conjecturam aliquâ interpretatione revocentur , quod & familiare Epimenidi fuisse dicunt , qui præterita divinabat. Multa sanè debemus Antiquis , & potiora etiam , si illorum extarent inventa. Hoc unum non laudo , vetera quocunque modo

farciendo , & refarciendo retinenda esse , cùm appositè monente magno viro , veterâ emendatione potiùs deteriora fiant , quàm meliora.



CAPVT V.

De quibusdam corporibus per Lienem dispersis.

Miram naturæ industriam in componendo liene jam observavimus , & quoniam ejusdem ut plurimum una solet esse operandi norma , hæcque simplex , qualem à principio proposuimus , ideò in lienis structurâ alia addidit non dissimilia cæteris viscerum parenchymatibus. In splene igitur glandularum , vel mavis vesicularum , sive sacculorum racemi copiosissimi observantur per totum lienem dispersi , qui uvæ botrum graphicè æmulantur. Minimæ hæ glandulæ figuram habent ovalem , & magnitudine parùm distant à renum glandulis ; colorem habent , ut perpetuò observavi , album ;

& licet lienis sanguinea vasa injecto atramento turgeant, & circa ipsas ludant, hæ tamen eundem servant colorem. Earum substantia quasi membranæ videtur, sed mollis, facileque friabilis; ejus cavitas ob exiguitatem oculorum aciem effugit, conjectura autem attingitur, dùm scissæ in se ipsas concidere videntur. Numero copiosissimæ, & ferè innumeræ sunt, & in descriptis universi lienis cellulis, ubi vulgariter ejusdem parenchyma statuitur, mirè locantur, pendentque à propaginibus capsulæ, sive à fibris ab ipsa ortis, & consequenter ab extremis arteriarum & nervorum finibus; quin & arteriarum fines, capreolorum instar, vel serpentis hæderæ circa ipsas producuntur, quod in recenti adhuc liene denigratis arteriis observatur. Appenduntur ut plurimum racematim, cùm septem, vel octo singulus quique botrus conglobetur. Non equè facile sese produnt in quocunque animalium liene; immò solâ lienis laceratione innotescunt, in bove, ove, caprâ, &c. levî factâ cultro abrasione, vel longâ communi aquâ ablutione patent. In homine difficiliùs

faciliùs emergunt, si tamen ex morbo universum glandularum genus turgeat, manifestiores redduntur, auctâ ipsarum magnitudine, ut in defunctâ puellâ observavi, in quâ lien globulis conspicuis racematim dispersis totus scatebat. In piscibus autem, licet ob substantiæ compactam molem non illicò emergant, si tamen eorundem lien longo tempore maceretur, vel sensim siccescat, tandem subalbidæ manifestantur hujusmodi glandulæ, velut ac in cæteris animalibus. Memini me in amœno Messanæ Faro cursim observasse Carchariæ lienem, quem ut diligentius scrutarer, custodiendum curavi, sed frustra; asservantium enim incuria pulcherrimi spectaculi raram mihi sustulit occasionem, dùm tamen à quibusdam piscatoribus oblatus occurrit, deductâ interiori membranâ, vasorum & fibrarum super extensos, quasi parallelos plexus, mox placentulam carneis quasi globulis conflata visus sum intueri, ni memoria me fallat. Hoc inuisse volui; ut hi quibus ad manus esse potest hujusmodi sectio, ipsam non omittant, etenim fortassè in hoc ani-


H

nali simplicior, & manifestior occurreret lienis structura, & exinde usus.

An circa minimas enarratas lienis glandulas, præter cellularum membranas, aliud circumlocetur corpus, diù apud me dubitatum est, cum secto liene non in omnibus statim occurrant glandulæ, sed post diligentem abrasionem affusæ tenaciter subrubræ substantiæ. Susplicandi ansam ulterius faciebat cocti lienis inspectio, quæ infinitam penè congeriem rotundorum, rubrorumque corporum exhibebat, cum tamen albæ illæ & insignes glandulæ in crudo antea observatæ, ne minimum quidem sui vestigium relinquerent. Omne tandem exemi dubium, dum in elixato cujuscunque animalis sanguine, eandem configurationem deprehendi; concrevit enim calore in globulos, pomorum figuram redolentes, quare probabiliter deduxi, substantiam illam, quâ teguntur glandulæ, sanguineam esse, quæ in sinibus, & cellulis copiosè stagnat, cum immixta multa per longum tempus per arteriam aqua infecta sanguine exeat, secumque plurimum sanguinis extrahat,

Cellularum etiam collapsæ membranæ nobis imponere valent, ut in pulmonibus accidit, undè cum in liene flatu turgido nihil aliud pateat præter pelluculas, fibras, sanguinea vasa, & exaratas glandulas, satius videtur hæc, quæ glandularum speciem coctione inducunt, sanguinis concreti particulas esse. Ex quibus omnibus conjectari licet, glandulas hæc locum, & situm sibi nancisci in sinibus & cellulis membranosis, quibus lienis substantia integratur, cum ad has adducantur arteriæ, & in has hient: quicunque enim affusus humor, vel flatu ab arteriis in cellulas erumpendo ab his in ramum splenicum patentem viam adinvenit. Conjecturam firmat inspectio, licet subobscura semi exsiccati lienis, in cujus cellulis extremi arteriarum fines cum appensis glandulis, quæ licet siccitate quasi oblitterentur; attamen adhuc conspiciuntur; quare in naturæ statu fortassè in cellularum spatiis cum circumpositis arteriosis propaginibus pendebunt, vel saltem lateraliter cellularum parietibus hærebunt, quod nequaquam est in naturâ novum, ut de

mammis & confimilibus aliàs fortè dicendis patebit.



CAPVT VI.

*Cogitata quadam circà lienis usum
dubitativè enuntiata,*

Licet sit præter institutum nostrum, qui quarundam tantum partium structuram exponendam assumpsimus, circà lienis usum laborare, de eo tamen aliqua, negativè saltem habebimus, à sagacioribus ex descriptâ à nobis historiâ verum expectantes usum. Partium munia & actiones non perpetuò ex diligenti & atomâ etiam organi inspectione innotescunt, cùm natura exiguis machinis, hisque simplicibus miras, ultrà humani ingenii captum edat operationes, ut contingit in musculis, ex quorum simplici structurâ tanta impellendi vis emergit, ut nisi eam sensibus attingeremus, incredibilis videretur. Aliud etiam occurrit, quod magis dolendum; cognitionem,

quam hucusque homines instrumentorum etiam ope tenent, adeò hebetem & rudem esse, ut minimum illud organicum, quo naturæ maximum emergit adhuc nos lateat, quare difficillimum videtur ex accuratâ etiam partium inspectione emanantem usum prædicere. Illud tantum nobis relinquitur, ut in cæteris humanis progressibus accidit, phænomenorum, & effectuum variâ observatione agentium vim, & determinatam causarum energiam colligere; solent autem ob multiplices, quæ conjunctim in animali promuntur operationes, mixturam habere, idè non rarò nos fallunt. In viventibus ergo vigente salute, ita natura operatur, ut nobis non imperantibus, & quasi perennanti illo habitu consopitis, variæ nostrarum partium operationes emergant. Venter nobis etiam nolentibus concoquit, commixto liquido adhuc ignoto; dormientibus nobis, bilis separatur, renes cribrant, & musculi moventur; vigilantes, eorum quæ etiam nolumus recordamur, multorum nolentes obliviscimur, ita ut sit locus Pliniano dicto: *Ignota nobis sunt per*

que vivimus. Ubi verò partium animalis solutâ compage, vel concitato, seu retardato liquidorum motu, membrorum tonus, & humorum immutatus fluor, tam diversa & implicita excitantur symptomata, ut difficillimum, multumque indaginis requiratur, ut singulorum germana causa cruatur. Quapropter Plato ad erudiendum medicum peropportunum, qu' & necessarium jussit imbecillam Medici naturam, perpetuum cum ægris contubernium, & omnium morborum frequentem passionem.

Morbi igitur lienis vitio suborti; ejusdem usus veluti digito indicare possent, nisi aliorum syndrome implicarentur. Huic additur, lienem viscus esse, quod ut probabiliter suspicor, aliarum partium vitiis compatitur; interdum enim determinatæ nostri corporis particulæ, vel etiam totius vitia, Lieni communicatâ labe, productorum inde morborum speciebus nos ludunt. Unum relinquitur, ut inculpato reliquarum partium habitu, sola lienis labe sit in confesso, vel animalis œconomia hujus visceris ope distituatur,

quod ut succederet , eximendo viventi cani lienem in ipsius superstitie vita nova expectando , lumen aliquod cogitationibus sperabam ; sed quod sæpè in humanis accidit , compertum habui plus nempe in facie nævum offendere ; quam prægrandes in reliquo corpore maculas , ideoque partium abjectarum vitia , licet ingentia , in conspicuo non esse , quemadmodum in principibus accidit. Quæ tamen observavi , ut satem de quibusdam hucusque dictis dubitemus , brevibus exarabo.

In cane adhuc tenello excitato in sinistro hypochondrio vulnere , erumpentis lienis , & appensi omenti sanguinea vasa ad lienis portas filo innodata sunt ; mox repositis in pristinum singulis , consuto peritoneo , & musculis , & laxè etiam unitâ cute , brevi dierum spatio curatum est vulnus : paucas post hebdomadas ad pristina obeunda munia lætabundus convaluit , ita ut quo temporis spatio vixit , nullum læsæ sanitatis vestigium observaretur. Voracior redditus peravidè cibum capiebat , ossa , & cujuscunque naturæ alimenta vorabat ; in excretis illæsus næ-

turæ status servabatur. Illud unum animadverti, indeficienter scilicet, plurimum, & frequentissimè mingere, quod licet familiare sit cæteris canibus, in hoc tamen excedere videbatur. Corporis habitus undequaquē saluber, & pinguis; in cæteris promptitudine, & alacritate quadam consimilibus æquabatur. Hoc peculiare in externo corporis habitu deprehendebatur, tumor scilicet dextræ hypochondrii, ita ut. extremæ costæ præ cæteris protuberarent. Spe igitur conceptâ opem ferentibus Præclarissimis Viris DD. Carolo Fracassato, & Silvestro Bonfiliolo, quorum industriæ, & arti maximè debeo, cum huic observationi amicam manum contulerint, canis iterum sectioni destinatur. In secto. itaque abdomine lien cujus vasa arctè erant ligata gracillimus apparuit, ut cum omento complicatus, vix sui vestigium relinqueret, referebat enim exiguum folliculum membranis contextum, sanguinea vasa ad ventriculum, & per omentum copiosè dispersa integrè florebant, & sanguine erant referta: ramus splenicus patens, & secundùm naturæ leges erat,

circumaffusâ ibi naturali pinguedine :
Jecur, prout oculis permittitur, sub-
stantiâ, colore, & vasorum propagini-
bus optimè se habebat ; mole tantùm
excedere dixisses, cùm sinistrum etiam
hypocondrium amplè occuparet. In
reliquis nec in thorace, nec in abdo-
mine & carnosò genere quicquam mu-
tilum repertum est ; sanguis totus flori-
dus & rubicundus, & ubique fluxilis.
Hæc sunt, quæ in cane reperta ne mini-
mum quidem lucis ad erudiendum nos
circâ lienis usum contulere, & cùm de
singulis etiam dubitare sit sapiëntiæ pars,
vel saltem via, ex his aliqua colligemus
circâ recensitos vulgares quosdam usus.

Et primò non est, cur diù laborem in
refutando antiquo illo placito de humo-
ris melancholici, & terrei ab hepate in
lienem derivati per ramum splenicum ;
sat enim ligaturæ, vasis natura observa-
tio sanguinis in lienem erumpentis evin-
cant. Apud plerosque probabilissimum
adhuc censetur in liene crassiorẽ san-
guinem à propriâ arteriâ transductum
dissolvi, & attenuari, ut perfectior ei
sanguinis natura communicetur, ne
residuum sanguinis ab hoc inficiatur.

H y

Dubitandi tamen nobis ansam præbet diligens sanguinis consideratio ab arteriâ splenicâ excreti, qui non majorem quàm reliquus crassitiem possidet. Ulterius natura separationem aliquam molitura glandularum utitur ministerio, & tanta est ex perpetuo & intestino motu miscella in sanguine, ut solo vasorum hiatu qualis absque glandulis in arteriâ splenicâ ramo observatur, nequeat subsequi crassioris à tenuiori sanguinis portione separatio.

An verò lien, veluti alterum hepar, ex chylo in ipsum deducto sanguificet pro infimi ventris visceribus, apud quosdam inconcussum video. Floridus tamen fuit in nostro dissecto cane viscerum abdominis habitus, nullæque lacteæ lienem ingrediuntur, quæ in hoc præcipuè animali ob interceptum hiatus, si quæ forent, ampliores & patentiores fuissent. Nec juvat derivata aliqua chyli portio per arterias; etenim jam commixtus sanguini chylus in præcordiis & pulmonibus; dùm ab arteriâ aorta indiscriminatim in splenicam propellitur, & ab hac in lienis cavitates non minus ad sanguinis naturam immutatur, quam in carnibus, pan-

create, & cæteris venulis per ambitum disperfis.

Diù apud Antiquos & Neotericos viguit placitum, separatum in liene acidum succum per vas breve in ventriculum eructari, vel saltem fermentantem spiritum in ipsum inspirari, ut ejusdem coctio roboretur, & perficiatur, simulque appetitus excitetur. Certum tamen videtur, sanguinem qui lienem attingit, ab eodem unà cum commixto quocumque corpore, quod ibi separatur & immiscetur à membranosis sinibus, & cellulis, in continuatum splenicum ramum exprimi, qui cum patentem in jecur viam inveniat, arduum videtur in vas breve, quod ab arteriis propulsum sanguinem impetu revehit insinuari posse, & hujus impossibilitatem licebit præsentì experimento explorare. Ligato splenico ramo, libera adhuc comes arteria permaneat, ita ut propulsus sanguis à liene refluens, impeditam inveniat viam in itinere ad jecoris portas; ligentur interim portiones vasis brevis propè tunicas ventriculi, ne sanguis à comitibus arteriis in ipsum irrumpat, vel majoris digitis com-

presso vase brevi versus splenicum truncum, sanguis exprimatur ; etenim licet impensè turgeant lien & ramus splenicus, non tamen unquam à liene ascendet sanguis per continuatum vas breve in ventriculi fundum, sed impediēte valvulâ in hiatu ejusdem vasis in splenicum ramum detinebitur, donec soluto vinculo in jecur rapiatur, vacua semper & flaccida interim permanente vasis brevis inter valvulam & ligaturam, seu digitorum pressuram, portione.

De inspirato autem fermentativo halitu, seu famelico spiritu à cavo licetis per vas breve in ventriculi cavitationem dubitari insuper potest : difficillima est per sanguinea vasa semita, cū sanguis urgeat contrario motu, & sua miscella fermenti vim obtundere possit. Insuper adhuc latent peculiaria vasa, per quæ halitus in ventriculi fundum deducatur, & in quibusdam pennatis splen multū distat à ventriculo, & proximior est hepati ; noster insuper canis longè voracior absque liene vixit, coctionem optimè omnium solidorum etiam peragendo, ut ex exaratis con-

jectari licuit, undè sufficienter aliundè haberi potest appetitus, & coctionis causa.

Quid igitur de tam artificioso viscere sentiendum sit penitus ignoro, ea tamen ut probabilia colligam, quæ ex organicâ illâ structurâ, prout nobis ruditer innotescit, deduci possunt, illud semper admonens primas esse cogitationes, quas promptè, melioribus occurrentibus rejiciam. Quoniam itaque lienem innumeris constare glandulis, vel sacculis, hoc est ovalibus corporibus, quæ à similitudine eorum, quæ in renibus, & alibi etiam observantur, taliter appellare licuit, ex dictis patet, videtur naturæ institutum, separationem, vel saltem collectionem in liene celebrari, neque hanc parum facessere negotii, cum in maximâ quantitate sint. Hanc conjectaram firmat aliorum viscerum structura, & glandularum natura, quibus videtur peculiare aliquod liquidum cribrari, & secerni aliò deferendum, vel miscendum. Tota difficultas interea est in indagine vasorum à quibus separanda, vel recolligenda materia deferatur; etenim, licet occur-

rant arteriæ, quæ totum lienem pervadentes extremis finibus desinant in has copiosissimas glandulas; cum tamen hucusque sensu assequi nequiverim, injectis liquoribus commercium inter glandularum interiora, & arterias, quæ exterius veluti capreoli serpunt, nec ita arctè hæreere videntur, dubitandi remanet locus. His accedat, quod ubi natura ab arteriis materiam ministerio glandularum, separat peculiari excretorio vase, ut plurimum derivare solet, at in liene, cum hucusque hujusmodi desideretur, videtur superfluum. Naturam ab arteriis determinatum quoddam secernere, quod mox in venas est propulsura, cum aliàs hæc fit consuetata via, ita ut labor undequaque videatur irritus. Scio nervos occurrere, qui continuati in glandulas, quæ membranosa, vel analogæ quædam corpora sunt, succum vehere possunt in glandularum cavitatibus colligendum, & ab his in cellulas, quod placitum firmare videtur positionem Famigeratissimi Deleboe Sylvii, statuentis animalem spiritum nervis delatum in liene, sanguini per arterias deducto committi.

ceri. His tamen non obstantibus , pro arteriis illud militare videtur , ad glandulas exporrigi arteriarum ramos , qui licet liquoribus ipsas non inficiant , non tamen sufficienter excluditur inter vasa , & glandulas intimus commeatus , cum idem in renum minimis glandulis accidat , quarum interior pars , atramento per arterias injecto , nequaquam inficitur. Ulterius ingens est numerus glandularum , magna est cellularum , & ductuum lienis amplitudo , & capacitas , copia insuper separati humoris probabiliter non est exigua ; ideò cum nervus , qui naturâ suâ succum serò , & parcè vehit , non per se sufficiat ad subministrandum glandulis , & successivè lienis sinibus liquorem : eò quia in centro lienis , & ubi præcipuè glandulis nequitur exutus involucreo gracillimus sit , & solo microscopio vix attingatur , recurrendum erit ad arterias , ut ab ipsis debita suppeditetur humoris quantitas. Conditio etiam separatæ materiæ in liene sui exortum non undequaque à nervis trahere videtur , cum acrior nervoso succo probabiliter credatur. Superiori anno , ut deferens vas

& excreti succi naturam explorarem, pluriès, incassum tamen, hoc tentavi experimentum. In oye adhuc vivente ligatâ arteriâ splenicâ, & immissâ vitreâ fistulâ in venam splenicam, cujus alterum caput recipiens habebat, liberè hiantibus nervis, seri vel alterius consimilis humoris collectionem in longum protracta animalis vita expectavi, nec quicquam in vase recollegi, aut in liene ex apparente tumore quicquam stagnavit. Quare ex his omnibus non incongruè dubitari potest, ab arteriis principaliter in lienis glandulas, liquorem deferri, cui etiam aliquid nervi immisceant. Nec obest supervacaneam videri naturæ industriam, separandi scilicet ab arteriis peculiarem succum, qui mox in venas est deferendus; etenim multum discriminis intercedit inter communionem consuetam arteriarum & venarum, & inter arterias in lienem hiantes, & venam splenicam, cum in arteriis & venis vel adsit anastomosis inter minimas illas propagines, vel tertio quodam, meatibus tamen minimis pervio jungantur. In liene autem licet vena

eavum lienis pervadat insigni trunco, multiplicata tamen in amplos sinus, & cellulas venarum tunicâ efformatas definit, quæ ex amplitudine & irregularitate figurarum, eò quia glandulas & arteriarum propagines continent, videntur diversum à venâ ministerium sapere, & apertè inservire pro meatu quodam inter glandulas, arteriarum fines, & ramum splenicum locato, qui fortè excretorii vasis, sinusque promiscellâ officinæ vices præstare poterit.

Taliter igitur delatus ab arteriis & nervis fortè succus in extremas glandulas ibidem separatur meatibus minimis propriæ structuræ, ut contingit in singulis glandulis, & cribratoriis vasis, etenim membranæ sunt, cum scissæ concavitatem quandam præ se ferre videantur, & dùm exsiccantur, ita in se collabuntur, ut nullum tumoris vestigium remaneat. Separatus autem & cribratus humor ab iisdem necessario revehitur in sinus, & ramum splenicum; an verò venarum ope hoc contingat, ita ut minimæ ipsarum extremitates hujusmodi glandulas attingant,

diù dubitavi, quia inflato liene in exteriori superficie, immixtus per venam splenicam aer ipsius extremos fines per membranam productos turgidos reddit, & interdum videntur hujusmodi venarum ramuli exterioris quasi in orbiculos continuatos hiare: quoniam tamen in partibus interioribus hoc nunquam contingere vidi, & orbiculares productiones sæpè vi aeris inter investientes membranas sese insinuantis producuntur, ideo ad glandulas nequaquam exporrigi venarum fines probabiliter credidi; hoc idem firmat in singulis cellulis glandularum existentia, ad quas tamen cellulas venæ splenicæ ramus evidenter non exporrigitur. Huic meditationi conjecturam addunt foramina illa frequentia, quæ in ductu lienis venoso observantur, in quibus non deprehenduntur venarum, & arteriarum comites rami, ut est perpetuum in cæteris sanguineorum vasorum productionibus; ex hac etenim probabiliter deduci potest per hæc stigmata in venæ tubum exonerari sanguinem & quemcunque succum à circumjacentibus partibus refluxum: quæ nihil aliud

sunt, quàm patentes lienis cellulae ad invicem sibi communicantes, in quibus locantur glandulae, seu sacculi, & ad quas desinunt arteriarum & nervorum rami, ita ut in hoc casu, cellulae & sinus venarum vices gerant. Si tamen sectione evinceretur venae productio usque ad intima glandularum, necessaria sequeretur ipsarum dilatatio, & extensio ex coacervato succo ab arteriis & nervis deceduo, unde tumefactae glandulae continerentur, & foverentur à circumstantibus cellulis, & tandem transductus minimarum venarum ope, earum liquor ab his in amplos rami splenici sinus miscellam subiret. Cum igitur probabilius sit ad glandulas non deduci venas, ideò necessariò separatus, & contentus in glandulis humor, vel excernetur transcolatione factâ per inferiorem ipsarum partem, veluti in manicâ Hippocratis contingeret, si circum exteriora multiplices humores affunderentur, ipsius enim interiorem cavitationem penetrarent cribratione mediâ, & inferius iterum per fundum foras erumperent; vel fatendum erit, ut contingit in singulis mi-

nimis conglobatis glandulis, vas adesse, breve tamen, quod à penitiori concavitate foras derivet secretum succum. Consimilis nobis structura in mammis sese offert, quarum universam molem ampli sinus & tubuli invicem hiantes pervadunt, his lac proximè per papillam emittendum asservatur; circa eosdem tubulos inter reticulares nervorum & lymphaticorum plexus, qui mirabiles sunt, minimæ quædam glandulæ, seu sacculi ovales, inæquali tamen magnitudine pollentes locantur, quibus mammarum moles protuberat. Hi sanguineis & cæteris vasis appenduntur, & lac separant, quod tandem in tubulos exprimunt.

Quoniam autem, ut ex dissectione habitâ patet, ingens est cellularum, sinuum, quin & ipsius venosi ductus amplitudo, ut arteriarum molem & capacitatem longè superet, & sanguis ab angustis arteriarum tubulis impetu pulsus, dum in has erumpit cavitates, interceptâ continuatione, & retardato motu, videatur aliquantulum ibidem necessario commoraturus, ideo dubitari potest, lienis capacitates ad hoc fabre-

factas , ut sanguis ibi detentus novam
miscellam nanciscatur , ut sensim po-
steà in splenicum ramum pulsus , vel
expressus , massæ sanguinariæ affunda-
tur , quare hæc concausa fortè est , ut
frequenter tumores in liene excitentur
præter adventitiam sanguinis naturam
non sufficienter ad fluorem redactam ;
nam sanguis , qui singulâ quaque pul-
satione ab extremis arteriis propellitur ,
per continuatas venas , vel per consimi-
lem meatum ulteriùs propulsus , ascen-
dere quidem potest , at si arteriarum of-
culis occurrens capacitas sit maximè
ampla , ita ut longè excedat ipsarum
proportionem , non illicò excidens ab
arteriis sanguinis particula , cursum
prosequendo , ulteriùs propelletur , sed
divagata in multiplicibus , & amplis il-
lis sinibus , quasi flexuoso cursu , alia-
rum particularum expectabit urgentem
societatem. Confusæ igitur hæ sangui-
nis portiones circumambiente cellula-
rum tunicâ coercitæ , juvantibus adja-
centium viscerum & intestinorum mo-
tibus , contrà firmum costarum obsta-
culum exprimentur , & ita ipsarum im-
petus juvabitur , ut tandem sanguis as-

cendat. Et hinc natura parallelum dorso in brutis propè diaphragma lienem locavit, ut faciliùs exprimeretur compressione respirationis & musculorum: aliàs sanguis nequiret ascendere, ut in aliis visceribus succedit.

Taliter commoratus, & commixtus in liene sanguis novam necessario sapientiam, vel saltem immutatur; undè cum in singulâ portione sanguinis in lienem propulsi hoc contingat ob successivam miscellam, & morulam, quæ perpetuatur in irruente sanguine, videtur rationi consentaneum, sanguinem à liene egredientem vim aliquam reliquo, cui proximè miscetur, vel in sui, vel in alterius gratiam imprimere. Quid sit autem illud, quod in liene sanguini affunditur, aliisque cõmunicatur, adhuc est obscurissimũ, multaque eget indagine; etenim separatus à glandulis succus sejunctim recolligi, & ad sensum trutinam revocari nequit; undè sicut in cæteris fermentantibus visceribus, ut passim de ventriculo experimur, complexus ille humorum, scilicet glandularum & lienis cellularum expenden-

lus est; hic igitur mediâ distillatione liquorem exhibet empyreuma spirantem, quod plurima distillata etiam ex carnibus, rebusque sulphureis concomitatur. Sanguini recenter ab animali extracto, & concreto, distillatum miscui humorem, ut lux aliqua mihi affulgeret, & illicò excitatâ quadam bullâ, nigrefactus est sanguis, quod tamen cæteris destillatis aquis, oleo, sulphuris, & salis spiritui familiare postremo deprehendi, & tandem aspersus ille cruor quasi cocturâ quadam superaffatus riguit. Alia in super, extracto ex liene sale, tentavi, quod consimili fæteret empyreumate, & si gustetur, primò aciditatem exhibet, & tandem amaritiam, quæ profusè linguam inficit. An aciditas illa, quæ primò occurrit, sit soboles activitatis ignis salem elicientis, ut passim hæsitantes video Chymicos, an verò à constitutivo principio emergat, ignoro; scio tamen lienis carnem, cellularum scilicet membranas acorem sapere, qualis à ventriculis quorundam brutorum erumpit, unde aciditas ei connaturalis fortassè erit. Ut autem ejusdem vires rimarer, lasti

adhuc fluido affundi curavi , & tanta lactis subsecuta est deturbatio, ut amisso propriæ substantiæ modo & coloribus , fætens redditum fuerit , quod idem in sanguinis sero eadem ratione commixto accidit. Pluribus miscui, spiritu nempe vini , oleis , & diversis etiam salibus , nec quicquam novi excitatum vidi ; quare ex adductis non incongruum fortassè est censere in exarato sale , multum sulphurei , summèque activi contineri , quo aliorum etiam compages solvatur , & spirituosioribus aliqualis libertas , & exaltatio doneatur.

Potiora à peritis Chymicis, qui plurimo otio , & experiendi affluunt peritiâ , dùm expecto , brevibus hoc complexus negotium inchoatas meditationes prosequar , inquirendo cujusnam partis gratiâ activus iste succus in liene separatus sanguini commisceatur , & cum raturum hucusque fuerit elaboratum seu lienoso succo turgentem sanguinem per proprium vas , scilicet per splenicum ramum , non in cavam , ut accidit sanguini è renibus & testibus refluo , sed in jecur deferri , non leve occurrit

occurrit argumentum , eatenus in liene alterari sanguinem , ut suam scilicet operam hepati præstet , quod præ cæteris visceribus primum occurrit , & in quod veluti in peculiarem latum splenicus ramus immediatè lienosum sanguinem eructat ; aliàs si sanguineæ massæ opem esset prestiturus , frustra hepatis ambages , & sanguinis turbatam ibidem compagem , quæ bilis separationem præcedit , subiret , cùm proximior occurreret venæ cavæ truncus , in quem immediatè exonerari posset hujusmodi lienis cruor , & ita tota sanguinis massa , quin & præcordia citiùs & promptiùs hoc succo irrorarentur , evitatâ hepatis aliundè difficili & tardâ viâ ; idèò fortasse natura tam in latum & longum per omentum splenici rami furculos extendit , ne scilicet solitarius in jecur lienis activus iste sanguis irrueret , sed sensim commixtus refluxo ab omento , ventriculi fundo , & adjacentibus partibus cruori in itinere ipso commisceretur , & tandem in portâ residuis meseraicarum ope deductis humoribus affunderetur . Quod si nequaquam nos fallat levis hæc conjectura , cùm præ-

capuum hepatis ministerium sit bilis separatio ; lienosus iste succo sanguini commixtus hunc ad faciliorem bilis exaltationem ipsum refermentando , vel mavis ad ejusdem separationem dissociando , quæ postremo bilem componunt , novo inducto motu , & deturbatis firmis & mutuis adhæssionibus , ut facilè occurrenti hepatis structura separetur , ut passim in mechanicis observamus.

Unum hic transeunter , probabile tamen , recolligendum puto , bilis , seu humoris per cholidocum , vel communem ductum in intestina derivati componentem scilicet materiam multiplicem esse , quæ fortè variis etiam excidit è vasis , & organis , nam major copia , quæ fluidior est , erumpit à glandulis hepatis , in ipsas delata à venæ portæ ramulis , & non improbabiliter etiam ab extremis arteriarum finibus , quæ à ductu hepatico excidentes , tandem in hepatis glandulas terminantur. Altera portio constitutiva bilis , crassiuscula tamen , nisi verius dicere velimus alteram bilis speciem , ex his , quæ post diutinos labores deprehendi

in suillâ & ovillâ vesicâ probabiliter:
evomitur à minimis glandulis miliari-
bus per tunicam biliarîæ vesicæ disper-
sis, ad quam arteriæ desinunt, & licet
porus biliarius purum videatur vas, est
tamen veluti coarctata & ramificata ve-
sica, undè quamvis sub ipsius tunicâ
adhuc latentes glandulas non observa-
verim, ipsarum tamen existentiam im-
possibilem non arbitror. Quare bilis
copia, quæ ab hepatico ductu fibra-
rum carnearum ope, ipsum arctè am-
plexantium: exprimitur non dispari ri-
tu ac intestinis contingit, principaliter
ex glandulosâ jecoris carne in poti ra-
mulos extremos hiantes, partim etiam
ex propriis ductus hepatici glandulis
probabiliter emanat, cui dùm commu-
nem meatum subit, continuò & sen-
sim ex biliarîâ vesicâ reliquum affundi-
tur. Huic positioni favent observatio-
nes in viperis & consimilibus factæ, in
quibus oblongus à jecore producitur
in intestina porus biliarius, cujus ex-
tremitati in duodenum hianti necitur
meatus cysticus à propriâ vesiculâ
emanans, quæ multo intervallo ab he-
pate dissociata, proximo intestino hæ-

ret. Ligatus igitur hujusmodi biliaris porus à jecore prodiens impensè turget versus superiora, gráciliscit autem versus intestina, & cystici meatus insertionem. Hoc idem illustrat experimentum sæpiùs repetitum, dùm scilicet in brutis ligata arteria hepatica propè truncum cæliacæ, laceratoque bilis folliculo, vel etiam avulsis ejusdem tunicis, coercitoque pancreatis vase, superstite per diem animalis vitâ, per portam in jecur irruente sanguine, bilis ingens copia è poro biliario, & cholelodo in duodenum transducta colligitur, quæ colore nequaquam consimili pollet, cum dilutior sit, nec tantum lentoris & amaritiei obtinet, quantum passim bilis vesicæ possidet, & si igne vel alio consimili exagitetur, vehementissimum exhalat odorem, aliaque longè diversa à cysticæ bilis natura patitur. Non dispar etiam operandi naturæ norma in aliis partibus hoc idem firmat; etenim oris capacitas quæ veluti extensum & toncameratum vas est, recipit salivam, non tantum à conspiciuis vasis in ipsum patenti orificio hiantibus, sed etiam è quibus-

dam sublingualibus glandulis liquorem admittit, & tandem membrana totam hanc oris concamerationem efformans, minimis scatat glandulis, à quibus mucosus exprimitur, qui cæteris unitus salivam efficit, quæ injecto cibo commixta proprium explet usum; Idem etiam suspicari possumus de duodeno, fundoque ventriculi, quorum licet cavitates ab adjacentibus partibus fermentativos, vel alterius naturæ recipiant humores, sub ipsarum tamen membranis peculiare etiam glandulæ, vel quid analogum sæpè latitat; & si pori biliarii, & vesicæ in bove, sive equo, piscibus, & homine ipso accurata habeatur inspectio, parùm hujusmodi differre à ventriculo, & intestinis piscium & boum constabit, in quibus cellulæ quædam, seu inæquales aræ ex parum assurgentibus, & sese interfecantibus parietibus observantur quæ impliciti graminis productiones æmulantur. Hæc interim probabilia in additamentum, & moderationem à me dictorum de hepate, benignè excipias velim, dum meditationem iterum de succo lienis assumens, novam:

ex hujus mixturâ in sanguine subsequi constitutionem verisimile puto, quâ bilis facilius exaltetur, & in jecore separetur. Hanc energiam in sanguine adhuc conservari credibile est, ita ut dum cor cavam & pulmones subit, toti massæ chylo, lymphâ, & aliis peculiaribus fermentis ditatæ, eandem vim imprimat, undè virtute etiam hujus celebratâ fermentatione, & nobili illâ in pulmonibus & præcordiis miscellâ, singula, quibus sanguis ipse instruitur pro nutritione, sensu, motu & fermentorum peculiarium reparatione exaltata, & liberiora ita conserventur, ut occurrentibus consimilibus structuris, excepta faciliè separentur sub debitâ, verbi gratiâ, salivæ, sudoris, succi pancreatici, nervei, similium formâ, & hac ratione necessaria sanguinis compages principaliter splenico hoc succo foveatur.

Dubitare insuper possumus, in quibus luxuriat plus justo lienosus liquor, in his ichores exaltari, & sales fixos liberiores reddi, hosque in palati & oris regiones, in crura, & consimilia copiosius confluere, vel per urinam de-

turbâri , & interdum in interioribus cavitatibus congestione , vel irruptione factâ Ascitum excitare.

Vulgatum , & inconcussum video apud ferè omnes , salium , & ichorum colluviem , quæ in quibusdam Ascite laborantibus abundat ortum trahere perpetuò à vitiosâ lienis cœctione , deficiente scilicet illâ sanguinis maturitate , quâ fixantur , & colligantur sales , ita ut inductâ in massâ debitâ compage , incongruâ tamen dominante naturâ per vias excrementorum excernantur ; quod licet probabile sit , non videtur tamen semper admittendum , etenim , ut observant qui talibus morbis ægrotantium cadavera secant , lien non scirrosa tentatur duritie , ita ut compactior ejus substantia , & angustata vasa consuetam ipsius functionem impediunt , sed laxum , & ut plurimum amplum à contento humore efficitur viscus , & cum in cæteris digerentibus , vel fermentantibus visceribus , quale est ventriculus , os & pancreas , non unica tantum contingat morbosa constitutio , defectus scilicet & egestas peculiaris illius succi , qui secundum in-

digentiam separari debet , sed interdum , & sæpè improporcionata , & copiosiori ipsius separatione , seu congestione animalis functiones oblædantur , ut contingit in caninâ fame , in catharro in os irruente , & similibus , dubitationi meo iudicio , locus erit , in liene etiam exaratorum ægrorum separati liquoris copiam nequaquam desiderari , sed vel vitio proprio vel deferentis vasis , & appulsæ materiæ energia , plus iusto interdum congeri , multiplicarique succum , cujus incongruâ tandem copiâ & activitate animal lædatur , quod facillimè in tumefactione hujus visceris , in quâ tamen continuatur sanguinis commeatus , contingere potest. Pau- cula hæc de liene acrius ne urgeas , sed quæ nondum inventa sunt , detege , vel semi perfecta absolve ; hoc enim mo- mente Hippocrate *Scientia votum* , ac- *apud esse videtur* : . . .





D E

P O L Y P O C O R D I S

D I S S E R T A T I O.

MOrbosas constitutiones, quas naturæ ludentis, vel vi morbi aberrantis frequenter in animalium corporis excitationes miramur, plurimum lucis pro rimandâ ejusdem genuinâ operandi normâ & methodâ conferre perpetuò credidi, quandam enim materiæ necessitatem & determinatam inclinationem demonstrant, quæ in compingendâ animalium mole elucescit, ita ut monstra, ceterique errores faciliùs & tutius nostram erudiant insipientiam, quam mi-

I. v.

rabiles, & perpolitæ naturæ machinæ; hinc plura didicit præsens hoc seculum insecta, pisces, primaque & rudia nascentium animalium stamina lustrans, quàm antea præscorum ætates circà sola perfectorum corpora sollicitæ. Inter ea, quæ non rarò in cadaveribus comproducta vi morbi occurrunt, non infimum sibi vindicat locum Polypus, utpotè qui funestissimos concomitetur morbos, & corporis regiam teneat, & cujus indagine aliqua fortè adhuc obscura dilucidari possint. Scio Polyporum generationem in corde præclarissimorum Bartholetti Tulpis, Bartholini & aliorum sedulâ patuisse industriâ, multaquæ etiam de ipsius causis exarata extare, præcipuè à Clarissimo Piscino, ita ut irritus futurus sit iste conatus; pro faciliiori tamen veritatis investigatione licebit hæc pauca addidisse.

Polypi nomen à substantiæ piscis similitudine ortum, peculiari cuidam tumori in naribus excitato adaptari cæpit, donec observatâ quadam in præcordiis luxuriante materiâ, novus hic cordis & vasorum morbus hominum mentes ad se trahere cæpit; qui licet

superioribus sæculis sese in sectionibus obtulerit, neglectus tamen delituit. Polyporum figuram & icones graphicè descripti occurrunt à Tulpio, & Bartholino; & licèt ut plurimum elongatis multiplicibus, & oblongis pedibus cordis, ventriculos, & adjacentium vasorum cavitatem quasi repleat, varium tamen situm nanciscitur, & rudem etiam configurationem: interdum enim placentulæ instar, ventriculorum medietatem occupat, & elongatis ramosis productionibus per venas & arterias hinc indè excurrenti sanguini præbet spatium, interdum tamen ut in eadavere Nobilissimi & Religiosissimi Juvenis observavi, ita circà cordis columnas, & carnosos lacertos hæret, & quasi radicibus implantatur, ut alterum ventriculum intrà cordis claustrum efformatum dicas. Talem habet densitatem & continuitatem, ut intrà se receptum per foramen ab auriculâ sanguinem vi circumstantis cordis ipsum immediate urgentis foras protrudat, quo casu etiam productæ per vasa Polypi appendices ita perforantur, ut vasorum lateribus hærentes sanguinis com-

mëatum intrà se admittant, quod etiam in cordis articulis frequenter observatur. Hæc Polypi moles in dextro præcipuè ventriculo amplior est, ac in sinistro, ut multotiès observavi, & Bartholetus in dextrâ auriculâ idem accidisse recitat, quod Riolanus confirmat, quin & color etiam non rarò diversus observatur, nam ut plurimùm Polypi in dextro cordis thalamo excitati color subalbidus est, laridi instar, seu excreti succi, quem vulgò pituitam appellamus, & interdum rubra quædam, vel subnigra stigmata conspersa habet: in sinistro autem genitus colorem, ut plurimùm atrum, & densiorem obtinet substantiam.

Morbosa hæc excreſcentia suam quoque structuram habere videtur, etenim præ se fert congeriem superpositarum, extensarumque pellicularum, quæ substantiæ modo nervosum corpus cum aliquali tamen mucositate referunt, & si eadem laceretur, solvi videtur in oblonga & solida filamenta, hæc manifestiora redduntur in ejus appendicibus, quæ fasciculi instar in fibras quasi nerveas resolvuntur.

A quamam materiâ excitetur Polypus obscurum adhuc video. Pluribus pinguedinis frustulum esse arrisit ; alii autem pituitam in corde concretam credidere , ignotam tamen in Scholis hucusque video pituitosi humoris existentiam & proprietatem , cum passionibus quæ huic vi quaternariæ humorum divisionis assignantur , non congruant succo , qui dum sensus nostros incurrit ; pituita appellatur ; & licet ut alimentalis humor in massa sanguinis potentiâ contineri credatur , velut idealis tamen entis sensum effugientis , proprietates deprædicantur. Non minor etiam hæsitantia occurrit apud illos , qui portionem quidem sanguinis esse negant , sed crudum putant humorem à jecore cordi suppeditatum , qui declinante cordis calore , absumentis tenuibus partibus soliditatem acquirat ; his & similibus cum non integrè aquiescerem , sollicitè inquirendam duxi Polypi materiam. Quam plurima mente revolventi occurrere , inter quæ vi ignis concreta sanguinei seri substantia , quoniam tamen Polypi materia , ut sæpius expertus sum , calore non tota con-

crescit in consistentem substantiam eandem molem retinentem, sed excitationis bullis serò, & tandem flatu turgidis impensè gracilescit, & elixata admodum tenuis redditur, quod concrecibili serò non accidit, aliena quærenda è sanguine prognata duxi; & tandem pellea crusta in supremâ extracti & refrigerati sanguinis parte concrecens ultimo sese obtulit, ex cujus indagine, cum persimilia sint in utrisque phænomena (Polypi fortè minera & productionis modus emerget. Scio varia de hac sanguinis crusta prolata fuisse; pro chyli enim portione apud plures est habita; mox pro nerveo succo: puriorem sanguinis partem credidere nonnulli, quæ dum sanguis superassatur ex rubrâ & tenerâ ejusdem parte in albam & tenacem excoquatur substantiam. Tantorum virorum positionem impugnare non audebo, sed quæ mihi occurrere, licèt levia, probabiliter enunciabo. Video Clarissimis Viris, quibus pro Polypi generatione vel chylus, vel nerveus succus arridet, hoc præcipuè persuadere, quia scilicet in utrisque est communis substantiæ mo-

Color, color confimilis; assignatæ insuper materiæ, venis quibus sanguis continetur, admittuntur; quare si philosophandi hæc semita mihi calcanda sit copiosior, & similior fortè occurret materia è sanguinis massâ pro excitandâ hac crustâ, tota scilicet concreti sanguinis moles, quæ rubra sanguinis portio seu melancholia appellatur, hæc enim licèt affusâ purpurâ lippientes nostros fallat oculos, si multiplicibus tamen litionibus aquâ comuni factis rubicundæ illæ implicitæ particulæ deturbentur, totus concretus sanguis, qui impensè rubescebat, vel nigrescebat, tractu temporis albescet, rubefactâ aquâ, quæ secum inscientes particulas rapit. Et si pulchrum exoptas spectaculum, microscopio hunc perlustra sanguinem, contexturam namque fibrosam, & quasi nerveis fibris compaginatam rete videbis, in cujus exiguis excitatis spatiis & sinibus, veluti cellularis rubicundus stagnat ichor, qui aquâ deterfus subalbidam reticularem hanc implicationem relinquit, quæ nudis oculis mucosæ membranæ speciem exhibet. Hanc verò reticularem san-

guinis portionem cum innatante crusta eandem sortiri materiam, quin & naturam probabiliter tibi indicabit diligens sanguineæ crustæ exploratio; etenim si concretus sanguis, cui copiosè crusta alba, & densa innatat, quæ tamen concrescibili sero non turgat, sed quasi pellea, mollis, & comblicabilis sit, per longum scindatur, & per iteratas vices abluatur, in superiori ejus parte subalbis pelliculis contextam crustam meatibus, & ferè vesiculis perviam observabis, quæ diaphano & minùs gravi succo replentur; & si ulterius hujus substantiæ prosequatis productionem, mox ubi concreta sanguinis moles rubescere incipit, in fibrillas divisam, & laciniatam deorsum elongari reperiēs, & harum elegantī implicatione meatulos, & sinus excitari iterum observabis, qui coercitis rubris atomis, turgent & inficiuntur, & in quibusdam etiam grandioribus spatiis substavum serum coercetur, vel cum rubro confunditur ichore; quare sensus ipse nobis indicare videtur sanguineum hunc album, & reticularem plexum, totum concreti cruoris corpus.

firmare , & potiori ipsum donare corporaturâ , eamque discriminis radicem quæ tantopere diversarum rerum imaginibus nos ludit , dependere à contento in minimis sinibus diverso inficiente ichore ; in superiore namque superficie , ubi approximatis , intimeque unitis albis illis sanguineis flaminibus minima vix sunt intercepta spatia excitatæ extremæ crustæ color subalbidus maximeque compacta consurgit tunica ; ubi autem laxatis sensim porulis levioris seri sub flavi portionem , vel quid simile admittit , laxior , facileque solutioni cedens subsequitur structura ; tandem ampliores redditæ meatus , dum rubrâ substantiâ turgent , illicò crustæ illa larva obliteratur subsequente fibrosi sanguinis elongata deorsum implicatione , quæ dum circa fundum vi superioris molis compressas rubras illas atomos continet , novum substantiæ modum & colorem exhibet , nam flacciditas ex lacinia fibrarum ultimis productionibus subsequitur , & color ater addensatis contentis particulis excitatur , quæ melancholiæ specie plures decipiunt , cum tamen mutato situ.

veluti purpura reddantur. Ex quo unum hic monendum duxi, in crustæ interstitiis quin & in toto fibrosi sanguinis ambitu interdum in quibusdam ægritudinibus concrescibile serum ibidè detentum inspissari, hincque cinereum & pallidum emergere colorem, eamque mucositatem, & substantiæ modum, qualem in concreto sero & ovi albumine observamus. Non rarò elongatas quasdam appendices per totum sanguinem promi, quibus hinc indè minores stiria reticulariter productæ appenduntur, quas interdum absque microscopio licet intueri. Dilutus autem hujusmodi sanguis multis aquæ aspersiõibus, excusso semi-concreto sero, conspicuum rete illud efformante, canaliculos fibrosa, albaque sanguinis portione excavatos exhibet, quod in minimis superiùs expositis fibrosis implicationibus non accidit, etiam si longo tempore abluantur, cum novi plexus, majorque perpetuò subsequatur albedo.

Ut autem dictorum veritas illustretur, & proximius rem ipsam attingamus, Polypum in sinistro cordis ven-

triculo concretum, qui rubrâ, ut plurimum habet stigmata, vel subnigro pollet colore, multâ aquâ ablue, emergentibus enim exiguis spatiosis speciem sanguinis omnimodam præ se feret, interdum etiam exiguus cordis Polypus ampliore sui parte crustam sanguinis albam æmulatur, reliquisque excrescentiis impensè rubet; aliquandò exteriores Polypi portiones albescunt, veluti extensa membrana, reliquum verò ita rubet, ut videatur sanguis portio, quæ circumambiente ventriculo, vel vasis, veluti cyatho detenta, concreverit, ita ut dubitari etiam possit nonnumquam Polypum à portione totius sanguineæ massæ suscitari, ex continuo tamen pertranseuntis sanguinis impetu, veluti affusâ aquâ relictis abstantibus albis fibris rubras particulas rapi. In horum dilucidationem alia licebit in utrisque similia experiri. Sanguineæ igitur fibræ aquâ dilutæ, vel dum sanguis exit è venâ, in calente aquâ receptæ, dum elixantur, gracilescent, & si superassentur, in tenuem evadunt membranam, quod ad amussim in Polypo accidit, hæc item om-

nia oleo sulphuris affuso colorem rubiginosum acquirunt.

Concreſcunt Polypi, & in amplio-rem etiam molem extuberant, ut plurimum facilius in dextro cordis ventriculo, ac in ſiniſtro, cæteriſque venoſis pulmonum & capitis vaſculis, ubi non raro produciuntur, fortasſe quia redux ſanguinis maſſa halituoſis & tenuibus, quales ſunt præcipue ſulphuræ illæ rubicundæ particulæ, ex perenni partium nutritione & tranſpiratione jam depauperatur; & dum chylo, aliisſque à naturâ ſanguinis adhuc alienis novifſimè confunditur, filamentosæ albæ ejus particulæ à diſſimilium contiguitate præcipitatæ, in amplis dextri ventriculi vel auriculæ ſinibus, qui proximi occurrunt, ex ipſorum ſcabritie, ex rimulis irretiuntur, undè præterfluentibus ſimilibus associatæ, in ulteriorem molem extendi poſſunt, ut contingit in calculorum generatione in pelvi, vel in tartarorum in aquæ ductibus concretionè, ex affluente enim aquâ alioquin clara tartareæ quædam particulæ tubulorum aſperitate, & ſuperficierum ſimili, & mutuo contactu detentæ

cognatas præterlabentes ita detinent, ut novus circumductus tubus extendatur; undè nil mirum, si pulmones, & caput etiam pervadere possint excitati Polypi, sunt enim veluti novum superinductum vas, quod ideò excavatur, quia ex sanguinis motu canalis conservatur patulus, ut in aquæ ductibus accidit, & in biliario ipso poro non raro observavi. Cujus interioribus cellulosis lateribus tartarea affunditur crusta, quæ in fistulam degenerat, aditumque pertranseunti bili permittit: & sicut in lapidis Bezaïar, & consimilium concretione accidit, ut ex multis superpositis veluti laminis tractu temporis coagmentatio subsequatur, ita Polyporum generationem contingere probabile est; nam extensis multiplicibus constare videntur pelliculis, inter quas ichor, & alia sanguinis portio quandoque mediat, & ex mutuo fibrarum contactu, & excurrentis sanguinis pressione & ictu, ita ad invicem approximantur, ut in solidum corpus compingantur. In hujus confirmationem licebit hic exarare mirabilem Polypi structuram & magnitudinem Flo-

rentiæ in seise sexagesimum quartum annum agente inopinatè defuncto observatam, & à Doctissimo Viro Jo. Alphonso Borellio mihi humanissimè communicatam. In aorta prope cor, quæ in tumorem excreverat ad mensuram duorum pugnorum, Polypus consimilis magnitudinis repertus est, absque appendicibus & caudis, ejus autem moles membranosis tunicis ad invicem superpositis absque continuitate consurgebat, quæ crassitie non superabant vulgarem chartam hædinam: super his producebantur filamentata quædam alba, quæ foliorum fibras, seu vasa æmulabantur, quæ omnia ab albidiori trunco dependebant. Tunicarum Polypum efformantium color cinereus erat cum rubicundis quibusdam maculis, ita ut tota hæc structura brassicam capitatam æmuleretur. Ex hac historiâ patere potest Polypi productio ex superpositis membranis, quarum interstitia, si sanguis suo motu patula reddat, sejunctæ, foliorum instar, permanent; si autem unico canali per medium aperto rectâ pertranseat sanguis, vel exteriora Polypi suo impetu urgeat,

concrefcit velut lapis. Scio quorundam placitum effe per Polypi tunicas interdum fanguinea propagari vafa, quod licet mihi hucusque videri non contigerit, adhuc tamen impoffibile non cenfeo; nam ex feſe inſinuantibus fanguineis particulis, dum hinc inde fibrarum concretione coercentur, tubuli efformari poſſunt, ut in colliquamento, cæterisque excreſcentiis carneis accidit. In aortâ exterius tamen adefſt venâ conſpicua, quæ ipſius tunicas minimis ramulis penetrat, quæ in bove propè cor præcipuè patet.

Ex exarata inſuper obſervatione, ni dicere velimus plantam in nobis interdum oriri, & vegetare, ut quibusdam accidit animalibus, non deficientibus in fanguine plurium rerum conſopitis ſeminibus ſatiùs credendum albas illas fibras communi trunco ortas, fuiſſe prima Polypi ſtamina, cum Polyporum caudæ, quas obſervare potui, ſciſſæ referant, nervearum fibrarum faſciculum, his enim ab invicem ſe-junctis, quia pertranſeuntis ſanguinis fibroſæ particulæ agglomerari & hæ-rere poſſunt, ideò foliis ſimillimæ ex-

tenduntur tunicæ , quæ ex pertranseunte sanguine , & circumstante arteriæ aortæ continente tunicâ talem configurationem & adaptationem sortitæ sunt. Nec levia hæc mirabitur qui in assiduâ animalium sectione naturæ industriam in morbofis tumoribus , æquè ac in partium ducendis staminibus depræhendit , cùm ferè eadem incedat methodo. Ita memini ferream acum extrâ gallinæ carnosum ventriculum erumpentem bino membranoso , hocque valido involucro , inductâ etiam pinguedine , munitam vidisse ; & dubitare insuper possumus solâ materiæ necessitate , & motu hæc omnia contingere , nullo in animalis usum dirigente motore ; ita in quibusdam tumoribus in pulmonibus , in hepate & alibi excitatis , circumvolutiones seu multiplices vesicæ , quarum amplior minorem continet , & ita successivè coagmentantur , consimilium tumorum , conglobatio ad Polyposam naturam reduci potest , cùm eadem probabiliter materia , & productionis ratio in utrisque consimilis sit , nam ex filamentorum implicatione ex consuetâ naturæ

naturæ lege multiplices tunicæ efformari possunt ; inter quas si mediet non concrefcibilis, sed aquosus ichor , qualis in hujusmodi tumoribus abundat , solutæ undequaque tunicæ permanere valent. Probabile etenim est erumpentem extrâ meatus , & vascula propria sanguineam portionem , quia illicò non eadem celeritate per novam viam motum prosequitur , stagnare , & unâ cum subsequētibz novis particulis aliquāliter fixari , & ex impetu , & obstinantium partium pressione conglobari ; interim tamen tenuiores & spirituosiores viam sibi facientes ulterius progrediuntur , albæque remanent fibrosæ particulæ excurrentibus rubris , aliisque minùs implicationi subjectis : & quoniam meatus iste de novo patulus sanguinem in venarum surculos non tantâ felicitate exonerat , ut irruentem sanguinem ex circulari motu admittat, ideò nova fit congestio circâ primum globulum , in quâ fibræ pari ratione ex quiete implicitæ tunicam efformant , & quò magis intimè sibi uniuntur , serum exprimitur, ejusque portio versùs interiora profilit,

& ita subsequente sanguinis affluxu novæ iterum circumvolutiones fiunt, detentis albis fibrulis à consimilibus jam in tunicis contextis. Hoc totum firmari potest sanguinis excreti, & condensati indagine, etenim tota moles illa referre videtur reticularium tunicarum conglobationem instar cæpæ sese invicem continentium, quæ eò magis coarctatis reticularibus illis spatiis, rubris atomis, serosaque sanguinis portione refertis, solidior redditur textura, ichor autem extrà exprimitur, & ita temporis tractu conglobata fibrosi sanguinis moles durior & compactior redditur, cum, membranarum instar, densa subsequatur implicatio.

Polyporum generatio quibusdam in morbis contingit; in tentatis enim venercâ labe frequenter subortos Polypos cadaverum sectionibus edoctus testatur Severinus, quos tamen pituitam albam appellat: eosdem insignes etiam in præcordiis illorum; quos improvisus concussit timor, bis observavi, & memini ægrum, alioquin robustum, ex timore impulsus inæqualitatem, ejusque obscuritatem præcipuè

in sinistro carpo incidisse absque febre, & recurrente respirandi difficultate insigni, sed brevi tandem persputa quandoque rubri sanguinis portionem, quandoque copiosa alba quædam frustula veluti Polypos excrevisse, & postremò turgentibus superioribus excoercitâ sanguinis copiâ suffocatum interiisse. In apoplexiâ pariter in vasis tum majoribus, tum minoribus per cerebri meninges extensis coalescunt Polypi, ut multorum testantur observationes. In cardiacâ syncope cujus symptomata apoplexiæ simillima sunt, de facili in præcordiis & pulmonibus luxuriant, ut novissimè etiam observavit Clarissimus, meique amicissimus D. Silvester Bonfiliolus in florentino quodam juvene, qui sensu, & motu illicò privatus brevi interierat; secto etenim cadavere in utroque cordis ventriculo Polypi erumpere, universaque pulmonum substantia albis frustulis ita repleta apparuit, ut impensè ponderaret. Pleuriticorum cadavera non in præcordiis tantum, sed in hepate, & venoso genere hujusmodi copiosè continent, quod & tabidis, & quibusdâ asthma-

ticis etiam familiare est, & iis, in quibus glandulæ, & præcipuè conglobatæ ita duritie laborant, ut animalis œconomia harum ministerio privetur, ut in virgine novissimè deprehendi, cui cum perpetuò defuissent menstruæ purgationes, ejus pancreas, cæteræque minores per abdomen, & thoracem dispersæ glandulæ ex turgente, concretaque materiâ insignes & duriores redditæ fuerant, in hujus corde Polypi, & aqua in cavitatibus mediæ, & infimi ventris copiosè stagnabat. Quod simile in puellâ observavi, in quâ sub ventriculo ad pancreas, & in toto abdomine aderant glandularum racemi, nucis instar, & in corde globuli velut avellanæ fractus gypsea quasi materiâ excitati; in hujus etiam corde Polypi stagnabant. Sileo febres, pestem, aliosque sævissimos morbos ex aeris, & soli myasinate ortos, in quibus Polypi concresecunt, ut hujusmodi defunctorum cadavera testantur.

Ex his & similibus conjectari fortè licet, Polypos suscitari, quotiescumque sanguinis massa non in totum debito gaudet fluore & compage, sed

præcipitatis quibusdam , albis scilicet particulis, quæ præ cæteris fortasse graviores sunt vel saltem conglobatione, seu multiplici coacervatione & aggregatione tales reddi possunt , contexturæ quædam subsequuntur , quæ ex continentium partium , & reliqui sanguinis viribus , figuram & molem sortiuntur , quas Polypos appellare placuit ; etenim probabile est insignes hæc fibras sensibus obvias minimis capillamentis excitari , ut passim in diversarum rerum , & præcipuè salium concretionem , observamus , quorum minoribus & minimis moleculis eadem omninò inest figura , ut microscopii usu deprehenditur , quæ in conspicuâ mole ipsarum aggregatione excitatâ nudis oculis attingitur. Et quoniam in sanguinis massa ultrà exaratas albas & fibrosas particulas , quæ prima & tenuissima sunt stamina , præcipuamque sanguini præbent molem , minimæ quædam rubicundæ particulae ita attenuatae , ut liquoribus associatae , quemcunque situm longo etiam tempore servant , continentur ; sales item fusi , aliaque consimilia , peculiarium fer-

mentorum viscerum constitutiva ; serosa tandem quædam copia , cujus major portio calore in sapidam cogitur substantiam , reliqua verò in aqueum & salinum funditur humorem , ex naturæ legibus deprehenduntur , ut rudi factâ resolutione sensu percipimus : ideò probabile est , cum hæc ferè omnia ex se ipsis soliditatem , & dissotiationem affectent , naturam in horum miscellâ adfluore destinatâ miro uti artificio , ut tam diversæ sanguinis partes libertate quadam gaudentes circumvolutionem ex adjacentibus aliquibus spatiois pati possint , neve peculiare quædam à cæterarum dissimilium contubernio præcipitatæ mutuis implicationibus , & immediatis contactibus implicentur , & solidescant. Ad hoc igitur assequendum non parum conducit localis ille sanguinis motus per vasa perpetuò à corde celebratus , quo minima illa & lubrica filamenta cæteris confusa , & præcipuè rubris atomis urget & exagitat , ut ex ranarum sanguinis per diaphana vasa excurrentis inspectione deduci potest. Et licèt cessante hujusmodi locali motu post anima-

lis interitum, quandoque liquidus videatur sanguis, si tamen examinetur ejusdem compages, luti fluiditatem æmulatur, hoc est exiguis quibusdam globulis cum sero confusis componitur, quod ex saturato, nigroque colore, qui densatis rubris particulis perpetuò accidit, indicatur. Quid simile in caseo & oxigala contingit, quorum moles cum minoribus globulis coagmetur, manuum pressuram, vel proprii ponderis, & continentis vasis energiam exigunt, ut tandem excluso sero invicem hærendo in solidum compagineatur corpus. Fluorem etiam, & compagem sanguinis juvat intestinus propriarum particularum motus, qui singulis fermentatis liquoribus competit; hic enim ita cuncta agit, ut attenuatis singulis, ad minimaque reductis mobilioribus, impetuosioribus particulis motum impertiat, undè ex earum perpetuo, sed moderato effluvio, irrequietâ agitatione singulorum libertas, & diversorum etiam congrua societas conserventur. Hanc fermentationem fieri, vel saltem juvari liquoribus & succis separatis, vel filtratis per glandulas,

præcipuè conglobatas, ex quibusdam exaratis superius historiis probabiliter elici potest. Postremò fas est credere, naturam circa hunc fluorem sollicitam, tenue quoddam, summeque activum, cujus motu, & figurâ expofitarum sanguinis partium miscella, & ad volutationem dispositio conciliuntur, assiduè affundere & miscere hoc assequuntur videtur acutissimus Thomas Cornelius Progym. 7. de Vitâ, dùm tenuissimum quendam halitum in sanguine agnovit, non mente tantum, sed sensu ipso; ex calente enim adhuc cruore, acri, & falsâ quâdam mordacitate exhalans hujusmodi halitus palatum & linguam ferit, hincque salern, seu vitæ balsamum appellandum censuit, cum sanguineæ parti hujus munere liberè fluant, reliquumque corporis vigeat. Hoc vitæ sal pulmonum ope, vel à deductis cum sanguine liquoribus, & præcipuè lymphâ, fermentatione mediâ eruitur, vel ut satius credo, ab externo aere, cum pulmones ipsi propriâ structurâ glandulam æmulentur; etenim probabile est pulmones corpuscula quædam, quæ antiquitus

brutalium animarum portiones credebantur, cribratione facili pertranscunt sanguini commiscere, indeque in propriis vasorum plexibus deductorum succorum attenuationem, agitationem & miscellam promovendo, rubram illam suscitare in sanguine portionem, cum in cruore, ubi Polyposa hæc abundat crusta, pariter rubri observetur, & ubi rubrum abundat, illa non luxuriat. Huic meditationi favent observationes in aeris mutationibus, præcipuè aquilonaribus, in quibus pleuritides, quæ uno verbo ultra acutum febrem sunt Polyposæ concretiones in pulmonibus, ut ex cadaveribus & extracto sanguine patet, facillimè excitantur impedita, vel vitiata hujus salis cribratione. Scio gravissimos Viros censuisse tunc temporis copiosorem nitri partem colligi, & sanguini misceri, quo ita figatur & concreseat, quod apud me dubium est, quoniam in cane, nec admodum robusto per venam jugularem infusum nitrum in florem redactum ad uncias sex, nullam sensibilem peperit mutationem præter urinæ copiam, cum adhuc integrè vi-

vat; undè probabile est nullam fuisse subsequutam sanguinis concretionem. ut ex injectis quibusdam aquis regiis contingit.

In expositis igitur superiùs morbosis constitutionibus Polypos gignentibus fas est credere naturæ artes pro sanguinis fluore, & compositione ruditer à nobis designatas labefactari, deficiente interdum debitâ fermentatione, quâ partes non ita attenuantur, ut cuique situi adaptari possint, & vegetiores particulæ non exaltantur, cum in dies observetur, ubi vitio refermentantium viscerum, & præcipuè glandularum & pulmonum fermentatio non completur, polyposam hanc abundare materiam.

Nec Polyporum tam sterilis censenda est causa, ut ab indicatis hætenus tantummodò procreentur, cum pateat in quibusdam epotis venenis, in febribus lethalissimis ex aeris præcipuè myasinate, in peste, aliisque morbis ex pravo contactu genitis Polypos produci, quo casu probabile est halitus, seu peculiare succos ex corruptis viscerum fermentis sanguini misceri, qui per-

turbatâ ejusdem compage, vel novam solutionem, & attritionem sanguinearum particularum pariant, tollendo nexus quosdam, quibus minima albarum frustula suspenduntur & dissimilibus associantur; vel quasi hamata corpora dispersas fibras ita nectant, ut in exiguum plexum vel racemum colligatæ præcipitentur, & dùm reliquæ sanguinæ massæ adhuc fluentis motu transferuntur, rationi consonum est de facili angulis & irregularibus eminentiis ventriculorum & auricularum cordis vel vasorum diramationibus irretiri, ibique reliqui sanguinis assiduo impetu densari, ut in fluminibus accidit. Scio apud Clarissimos Viros inconfesso esse ægrorum sanguinem in hujusmodi exaratis constitutionibus veluti lac acescere, & ideò fixari acidis impensè dominantibus. Pro hujus & similium dilucidatione plurimùm conferre potest. Infusoria, quam à studiosissimis viris abundè administrata in scio: ut injectionum autem labores, & æquivoca evitare, & oculis obvium pararem experimentum, calenti adhuc sanguini antequam concreveret

plura super affundi , & indè subortam, vel præcipationem , vel tenaciorem soliditatem , vel flacciditatem observarem. Affusum igitur oleum sulphuris partes , quas immediatè tangit , & quibus innatat , turgidas reddit , & tandem coctas & atras in solidam crustam compaginas , quod idem accidit affuso oleo vitrioli. Alumen etiam in pulverem redactum , & supremæ sanguinis parti adhuc fluidæ aspersum atrum reddit , & quasi ustum ipsum cruorem. Nitrum autem , vel in pulverem , vel in aquam per deliquium solutum dùm sanguini affunditur tenuem quandam substantiam purpura rubicundiorē excitat , quod idem aqua vitæ , sal communis , sal gemmæ , armoniacus , sulphur & cornu cervi præstant , & videntur ferè hæc omnia per aliquod breve tempus sanguinis coagulationem impedire. Quare si horum & consimilium exemplo philosophandum esset circa causas , quæ in peste , &c. coagulant , vel totum sanguinem , vel ejus portionem , Polypos gignendo , ex analogis alumini , vitriolo , & similibus essent petenda , nequaquam autem

ex nitro, spiritibus volatilibus, & cornu cervi, quæ pro refermentando fluitandoque sanguine loco potius remedium essent usurpanda. Calamus plura de Polypo quam mens destinaverat, cumulavit; hæc enim antiqua sanguinis conditio est, ut licet fecundâ rerum productione indicis polleat, mortalium tamen ingenia propriæ licentiæ sterilitatē fatiget.

FINIS.



D E

PVLMONIBVS

EPISTOLA I.

Præclarissimo, & Eruditissimo Viro
 JO. ALPHONSO BORELLIO,
 PISIS MATHESIOS
 Professori Celeberrimo.

MARCELLVS MALPIGHIVS
Medicinae Professor Bonon. F.

INter sectiones, quas in dies avidius prosequor, fors tulit, ut aliqua circa pulmones diligentius perscrutarer, quæ aliàs mihi visus eram veluti in umbrâ deprehendisse; hæc qualiacumque sint tibi reor communicanda, poteris enim, quo polles ingenio, & in anatomicis contemplatione, geometricum oculum, qui ictu solo veritatem aut falsitatem è rebus

colligit, observationibus istis adjicere, Tuum erit, hæc inventa, vel ad usum meliorem dirigere, vel nutantem adhuc meam mentem tuo asserere in verbo.

Pulmonum SUBSTANTIA vulgò censetur carnosa, utpotè quod sanguini suum debeat ortum, nec hepati, nec lieni absimilis creditur, & ideò rubere pulmonem in fætu, cum solo sanguine nutriatur, & consequenter, ut carnosum viscus, calidâ & humidâ pollere temperie, omnes fatentur. ; diversam tamen substantiæ naturam accuratior sensus & ratio videntur ostendere, diligenti enim indagine adinveni totam pulmonum molem, quæ vasis excurrentibus appenditur, esse aggregatum quid ex levissimis & tenuissimis membranis, quæ extensæ, & sinuatæ penè infinitas vesiculas orbiculares, & sinuosas efformant, veluti in apum favis alveolos ab extensa cera in parietes conspiciamus; hæ talem habent situm & connexionem, ut ex trachea in ipsas mox ex unâ in alteram patens sit aditus, & tandem desinant in continentem membranam; Hoc demonstrat sensus

in pulmonibus mox ab animalibus erutis , in quibus aere turgentibus perspicillis observantur in extima superficie infinitæ penè vesiculæ aere turgidæ, easdem etiam in eodem sc̃cto per medium pulmone , & aere exinanito observare est , licèt minores & minus conspicuas ; clariùs & feliciùs in pulmone inflato , & mox exsiccato reperiuntur , quia in extimâ superficie protuberantes emergunt orbiculi , & in sc̃ctâ quolibet parte foveæ , & sinuosæ propagines levi extensâ membranâ efformatæ videntur ; & ut dubiam mentem omninò in certam fidem afferas , crues è vivente adhuc animali pulmones , & immissâ simphone aquâ per arteriam pulmonarem sanguinem , totum foras protrudès , & vasa pulmonaria pertranseunte aquâ dilues , illicò totam pulmonum substantiam ad quam pertingit aqua , & undè sanguis exhauritur , subalbidam & ferè diaphanam efficies. , hæc eadem , si levi priùs factâ compressione , ut imbibita jam aqua extrudatur , mox aere immisso per tracheam , turgida ad umbram , vel solem exsiccetur , non tantùm lumini objecta

exteriùs diaphanos exponit orbiculos, sed & interiùs secta candidam vesicularum molem tutò oculis exhibet. Horum imaginem, tùm in internâ, tùm externâ pulmonum regione, prout potui, auctâ magnitudine, ut facilius me explicarem, in postremis tabulis exaravi, ubi secunda ex his, quæ summâ cum diligentâ colligere potui, membranæ istæ vesiculæ videntur ciformari ex desinentiâ trachæ, quæ extremitate & lateribus in ampullosos sinus facessens, ab his in spatia & vesiculas inæquales terminatur.

Sensuum imbecillitati opem ferre videtur ratio, cùm aer qui à trachæâ in pulmones irrumpit, continuatum extergat tramitem ad facilem & subitum ingressum & egressum, undè fortassè tunica illa interna trachæ in sinus & vesiculas terminata consimilem inchoatæ vulgò spongiæ vesicularum molem efficit; quod mihi etiam indicare videntur in resiccato pulmone æqualis substantia, color & splendor qui reflectitur æquè à scisso trachæ extremo canali, & ab appensis orbiculis & finibus; immò interna trachæ superfi-

cies levi oblinitur humiditate , quæ necessario propagari debet eadem servatâ proportionem in orbiculos , ubi aër postremò recipitur , & excluditur , ne calore per transeuntis sanguinis exsiccantur (tenuissimæ enim & rarissimæ sunt membranæ) & ut possint in majorem molem dilatari , & statim etiam comprimi , quod in resiccatis membranis nequaquam accideret , ut constat in morbosis constitutionibus.

Hic unum sese objicit indagandum ; in frustulo enim extimo pulmonum lumini objecto mirabile quoddam rete videtur extensum , quo emergentes & extuberantes diceres singulas vesiculas ~~vinciri~~ ~~et colligi~~ ; quod idem etiam obscure tamen , in secto interiùs pulmone observatur ; an verò hoc rete sit vas , vel quid nerveum extensum ad vesiculas , an verò sint ipsi parietes membranosi vesicularum terminantes ad extimam membranam investientem ; dubium apud me est , quia tamen in internis vel evolantibus particulis in resiccatione , vel leviter cultro abrasis videntur quandoque remanere nerveæ quædam hujusce retis propaggines , &

in extimis splendor quidam , & substantiæ modus nervorum proprius observari videtur , ideò non absonum credam , nerveum esse ligamentum vesicularum parietibus unitum & immixtum, veluti semicirculos illos cartilagineos in asperâ trachæâ propagatos videmus, & præcipuè cùm probabile sit , ut superius posui , vesiculas esse propagines membranæ internæ trachææ.

Pulmonariæ molis **DIVISIO** communiter sumitur à *figurâ* & *situ*; duas enim habet partes intercedente inediastrino , quæ iterùm in duos lobos in hominibus præcipuè non rarò subdividuntur , in brutis autem multiplicantur.

Mirabiliorem & altiore observavi divisionem , pulmonum enim moles lobulis penè infinitis propriâ membranâ circumseptis , communibus vasis donatis , propaginibus asperæ arteriæ adnatis conflantur , attingi autem possunt lobuli , si semiinflatus pulmo solis radiis , vel lumini objiciatur , interstitia enim quædam quasi diaphana emergent , quæ si levi incisione prosequaris lobulos , utrinque asperæ arte-

riæ, & vasis adhærentes sejunctos reddes, & propriâ involutos membranâ inspirato aëre per tracheam experieris; illa & diligenti sectione sejungi potest, & luci opposita splendet, clarius tamen hos tibi contingit videre, factâ levi pulmonum elixatione, & elaboratâ interstitiorum sectione.

Lobulorum figuram delineatam videbis; horum insertionem & variam situationem non in totum mihi licuit exprimere, quia varia est secundum diversam exigentiam, cùm enim ad quamcumque partem trachea cùm apensis vasis ad modum arboris ramificetur, & hujusmodi ramificationes modò desinant in superficiem pulmonum extimam, quæ plana, & æqualis esse debet; modò in angulos eorundem extremos, rursus cùm debitæ neçti debeant contiguïs, & circumpositis ramificationibus, ut servantur debitus situs, nexus, æqualis capacitas, & interstitium, ideò vario modo situantur isti lobuli, ut quandoque basi uniantur trachæ, modò costâ, modò cono, processuum horum in extimis similitudinem in cupressi nuce adum-

braram videbis , præcipuos & simplices prout licuit , in postremis sub-
obscure collegi tabulis.

Post lobulos occurrent observanda
tacta superius *interstitia* , non unde-
quaque nudæ vacuitates & intercepta
inania spatia , plures enim habent ex-
tensas membranas , modò sibi paralle-
las , modò angulares , quæ non tantùm
ab extremâ superficie lobulorum late-
raliter positorum , verùm & ab internâ
lobulorum substantiâ propagantur ,
inter hæc membranas excurrunt plu-
rima vasa minima à lobulis egressa , quæ
in eisdem oppositos ingrediuntur , hisce
membranis recipitur , & ejicitur aer ve-
luti in amplioribus sinibus , qui mu-
tuam habent communionem , ut aer ex
uno in oilum comprimi possit , ita ut
interstitia sint eadem membranæ ve-
siculæ pulmonum , diaphanæ tamen &
tenuissimæ.

Interstitia talem habent propagatio-
nem , qualis relinquitur à situatis lo-
bulis , quæ in grandioribus animalibus
penè æquant latitudinem semi digiti
per transversum , hæc non ad solam lo-
bulorum distinctionem & nexum fa-

brefacta à naturâ cenfeo, sed fortassè aëre intercepto coarctant undequaque investitos lobulos, & ita multiplicant impetum pressionis, & consequenter juvant miscellam sanguinei corporis; Ulterius cum frequenter vesiculas, quæ à Græcis hydatides dicuntur, in istis interstitiis observaverim, item in animalibus & aliis quibusdam morbo extinctis, puncta quædam nigra, quæ veluti linea tenui protracta, totam interstitiorum propaginem signant, probabile credam, diverticula esse, & veluti emunctoria minimorum lobulorum; eadem quoque denigratioprehenditur in glandulis lateribus asperæ arteriæ continuatis.

Per pulmonum substantiam *triplex* VASORUM *genus* disseminari innotuit; varius tamen creditus est usus, cujus quidem varietatem, & longum & absonum exarare in præsentī esset, idcò suppositâ sobole asperæ arteriæ, venæ & arteriæ pulmonariæ, quæ nexu quodam pari ramificatione totam excurrunt pulmonum substantiam, hoc solum tibi sum ratus communicare, quo modo liceat sinceram & eviden-

tem vasorum divisionem , usque ad minima assequi, quæ quidem licet aliàs levi parenchymatis abrasione subobscurè habetur , mihi faciliè tamen , & summâ cum oblectatione contigit eam colligere ; In pulmone igitur canis minoris , sed gracilis, & oblongus assumatur lobus, compressione factâ aëre omnino exhaustus radiis solaribus expositus aperiet ductus asperæ arteriæ, item propagines arteriæ , utpotè sanguine vacuas, quæ omnia cum adjunctis lobulis polipodii similitudinem dabunt , & quia crassus hic sensus est , levi cum impensâ , & labore , iterum licebit exquisitiorem habere delineationem ; hoc autem tibi accidet , si inflaveris arteriam mediante evidenti trunco in principio ejusdem lobi , deindè nodo illigaveris ; videbis enim urgentem arteriam , veluti anaglypticè sculptam sese minimis etiam prodeuntibus vasculis , ramorum arboris ad instar , vel si lubeat formosiorē habere delineationem immisso mercurio argenteæ emergent ramificationes , usque ad minima.

An hæc vasa in finibus , vel alibi, mutuam habeant anastomosis , ita ut

sanguis à venâ resorbeatur continuato tramite, an verò hient omnes in pulmonum substantiam, dubium, quod adhuc mentem meam torquet, pro quo enodando, in cassum licet plura, & plura molitus sum aëre, & liquidis variè tinctis, sæpius enim immissam aquam nigram syphone per arteriam pulmonarem à pluribus erumpentem vidi partibus, nam factâ levi compressione solet exsudare à membranâ investiente, partim etiam coacervari in interstitiis, major vero copia cum commixto sanguine erumpit per venam pulmonarem, & quod mirabilius est per tracheam diluta, & minùs colore tincta cum levi spumâ, & ex quacumque pulmonum compressione per eandem foras exit; in eodem item resiccato pulmone parietes Vesicularum, & sinuum denigrati omnes videntur, simile quid etiam immisso mercurio accidere videtur, nam repleta arteriâ pulmonaria mercurius excurrit ad extimas propagines bifurcatas, quæ si leviter etiam comprimitur foras è membranâ investiente vomitur, quandoque facto aditu in interstitiâ, ibi penè totus colligitur

ligitur ; In resiccatis etiam pulmonibus variè & inordinatè rubescences conspiciuntur vesiculæ , aliis albescentibus. Undè ex his omnibus sicuti naturalis via non habetur , quia immixtus humor plures , & plures sibi parat vias , quæ in sanitatis statu insuetæ sunt , ita edocemur ex levi quocunque conatu , & humorum mutatione regias istas vias frangi , quare nil mirum , si hydropes , sanguinis expositions , phthises , asthmata , & empyemata levibus etiam ex causis in pulmonibus contingant.

De pulmonum usu scio plura ab antiquis haberi , & circà illa plurimùm etiam ambigi , & præcipuè circà refrigerationem , quæ pro principali fine usurpatur , cùm nitatur excedenti imaginato cordis calore , qui exquirat evanescationem , quare hæc curiosum in alterius usus indagine fecerunt , & ex his quæ subnectam , probabiliter credam , pulmones à naturâ fabrefactos esse ad *sanguinaria molis miscellam* ; pro sanguine autem non intelligo aggregatum ex quatuor vulgatis humoribus utraque bile , sanguine & pituitâ , sed totam illam corporaturam , quæ per ve-

nas & arterias continuò fluit , quæ licet penè infinitis constet particulis, omnes tamen sub duplici parte comprehendi posse videntur , ad rudem nostrum sensum quodammodo similari, *sub albâ* scilicet , quæ vulgò dicitur *serum* , & *sub rubrâ*.

Et primò non est , quod tibi persuadeam longâ verborum serie in naturâ dari corpora, quæ à proprio exortu non sint sortita fluxilitatem, sed partes etiam minimas ad facilem nexum , & unionem ita paratas habeant , ut nisi summâ cum vi disjungi possint, & aliquandò disjuncta mutuam moliantur unionem , hæc iterùm corpora facillimo etiam negotio mixtione alterius interpositi corporis fluida fieri , hoc primò videmus in metallis , & aliis igne fufis, deindè in partibus tartareis , quæ fusè & cum aquâ commixtæ sunt fluxiles, & inconspicuæ, unitæ autem constituunt lapidis soliditatem , rursus aquis regiis, acidis , & similibus interpositis , & discontinuantibus fluxilia reddimus solidiora metalla , quin immò , quod mirabilius est, ex solâ partium discontinuitate in ficcissimis contingit fluxus , ut

in plumbo & stanno adusto mox à figulo molâ contrito, ea enim est nostri sensus crassities, ut facilè credat minima arenularum grana instar aquæ, & ipsa fluere.

Nec dubium est in sanguinis massa partes esse, quæ ad facilem unionem sint proclives, & ad tantam deveniant soliditatem, ut lapidem duritie quandoque æmulentur; Hujus indicium sit sanguinis pars rubra, quæ à sero sejuncta ita reficcatur, ut præ se ferat lapidis speciem, licet in frustulâ determinatæ tamen figuræ sit friabilis, portio item serosæ substantiæ, levi calore ad ignem concretæ, quæ vehementiori nexu procedente tempore ossea fit, & diaphana: hæ igitur particule debite ad invicem commixtæ fluidum quoddam in totum efficiunt, sit enim primò fluxile serum tùm ex mixturâ aqueæ substantiæ, cujus existentiam ostendit, sensibilis evaporatio è fartagine erumpens dùm serum concrevit & clarius humor quidam odore & sapore urinam repræsentans à sanguinis sero medio alembico sejunctus, qui solet æqualem penè servare mensuram cùm con-

creto sero, tùm ex bile, & salibus diversis, quæ copiosè à sero aqueo extrahuntur, fula enim, & cùm sero debite mixta majorem partium solutionem, & fluxilitatem efficiunt. Ex serosâ, seu hac albâ parte contingit fluxilitas alterius, scilicet rubræ, hoc expressè videmus à contrario in exarato sanguine ex sectâ venâ, sejuncta enim minima rubra jam commixta fortassè ad motum excitata ex calidis particulis foras erumpentibus sibi similibus uniuntur, & serosâ substantiâ undequaque expressâ in circuitu separatur, hoc idem accidens in viventibus observatur, ubi scirrhostumores coacervantur, & nigri muci quorum originem vulgus videtur recognoscere à melancholiâ, vel atrâ bile; firmatur hoc totum ex vulgari experimento, mulieres enim, ne sanguis exiens à vivente adhuc animali in suas concrecendo dividatur partes solent digitis, vel baculo conterere & exagitare, ut scilicet perpetuetur fortis illa miscella albi & rubri.

Ut igitur hæc miscella optimè succedat & minimum albi intercidat, & tangat minimum rubri & stabili factâ

mixtione sanguinis massa instauretur, natura pulmones fabrefecit; His lucem ferunt, quæ ex anatomicis circumferuntur, nam constat in pulmones derivari mediâ arteriâ pulmonari sanguinem serò minus dilutum è toto ambitu redeuntem, item mediis vasis thoracis chylousam materiam, & *Bartholini* lympham, quæ eadem est cum sanguinis albo, quæ omnia cum dextro cordis ventriculo nequeant, nisi rudem subire miscellam ulterius in appensos pulmones propagantur. Pulmonum *structura* talis est, ut exactè miscere possit; perreptant enim per pulmonum molem ad minima usque vasorum rami, adeò ut inclusæ substantiæ, dum hinc indè propagantur, indivisionibus fractæ, & veluti ab allisu devaricationum vasculorum mixtæ, simul melius in unam confluant naturam, subigente quodammodò illas substantias aëre in vesiculis incuneato, quæ undique vasa stipantes, dum modò vacuantur, modò implentur, totam materiam continuatâ per suas vices pressione penitus miscere possunt. Simile quod in dies videmus, dum fa-

rina in massam compingitur, ut enim eam exactè misceamus crebrâ tundimus manu.

Hanc veritatem è piscium pulmonibus, qui in branchias efformantur, petimus; in his branchiæ componuntur plurimis radiosus semicirculis, sibi invicem incumbentibus, vasa pulmonaria suis minimis propaginibus, usque ad radiorum apices excurrunt, qui ita sunt dispositi, ut aquam majoris corporaturæ, quàm sit aër, undequaque recipiant, hæc enim vi pressâ ab osseo operculo, radios ista coarctat, ut in propagatis vasis, & humoribus miscella, & motus sufficienter habeantur; quin immò, & quia mucus continuè indè facillimè abraditur, non incongruum est censere, quod ea, quæ in aliis per renes & transpiratum exirent, hac compressionè excludantur. In ovis item incubatis argumentum habemus, ex extremâ nempè umbilici ramificatione in albumen, & vitellum, quæ ita in minima multiplicatur, ut efformatum rete delineet, hac namque infinitis ramis in humores, seu colliquamentum terminante miscetur mini-

muni delati sanguinis cum succo mox adducendo. Ex his & consimilibus, ut aliàs tibi per litteras exposui, cum necessariam in animalibus sanguineis pulmonum opem conspicerem, & his oriantibus in foetu quandam molem in mulieribus uterinam placentam dictam, in quam ultimò terminantur umbilicalia vasa, viderem, non incongruè fortasse credidi, hanc esse pulmonum vicariam, per hanc enim consimili ramificatione occurrunt propagata vasa, & à matre exsudans humor albus adveniēti copioso sanguini per umbilicales arterias, ita exactè miscetur, ut jam factus sanguis ad cor iterum revehatur, & indè in universum corporis habitum.

Ad minimorum unionem non tantum sequitur stabilis miscella & fluxitas in sanguine, sed eodem tempore ex deductâ materiâ, intercedente fermentatione, sanguineæ massæ instaurationo contingit, calor emergit, & major inducitur particularum libertas; horum indicium sit, colliquatio, & turgentia cum in albumine, tum in vitello in ovis incubatis ex miscellâ immixta

sanguinis per vasa umbilicalia, in quorum mæandris novus progignitur sanguis ope appulsi, & fermentantis sanguinis, nondum adhuc vigente hepate, quam eandem motionem in nobis ipsis experimur, dùm brevi à cibo turgentiam in pulmonibus ex affluente alimento perſentimus, subsequētibz calore, pulſu aucto, & crebrâ respiratione, & præcipuè in me ipſo ex oleribus & leguminibus talem perſentio tensionem, ex quâ per vicem insinuante se quodam acri, & turgente humore, mihi ipsi & adstantibus prænuntio palpitationis ictum mox in corde futurum, quo mox sequuto vagus ille morsus tollitur. Manifestiùs sese exerit hæc fermentatio in hecticis, ubi plus justo acrior est sanguis, ut non tantùm partes, in quas influit per arterias delatus, solvat, & fundat; verùm & ulteriùs procedente fermento, talem inferat in partibus sanguineis libertatem & motum, ut posthabitâ unione & nutritione foras evolent innumeræ particulae per cutim insensibiliter, per renes, nares, & alvum sensibili & copiosâ evacuatione; quin immò & pulmones ipsi,

in quibus totum hoc agitur negotium, fere primi sunt, qui hujus sævitiam persentiunt; quare nil mirum, si solis impensè incrassantibus, & motum cohibentibus, ut lacte, ptisanâ, cochleis, balneis, oleis & similibus pro reprimendâ hujus fermenti activitate sit incedendum; in his igitur à cibo, novo adveniente chylo in pulmones, talis increfcit calor, ut sensibilibus tunc febricitent, & attenuato sanguine magis sese insinuante genæ præcipuè rubeant, & tandem quod in consimilibus etiam accidit, pulmonum compages & meatus, vel erodantur, vel plus justo aperiantur hiantes in pectoris capacitatem, vel in asperas arterias, & ita modò sanguis, modò sola pars alba levi concreta calore per sputum erumpat, modò in thorace recolligatur. Tanta est demum hujus fermentationis necessitas & præstantia, ut in sceminis quibusdam, quibus aliquâ ex causâ non debite excitatur alba, & serosa sanguinis pars non sine pulmonum affectione adeò excrescat pereunte penè rubrâ, quod & infectione sanguinis è sectâ venâ quilibet experiri potest, & colore, corpore,


L y

& corporis cachexiâ etiam confirmare, quin immò statò tempore ex naturæ instituto in sanis fœminis, ita turget, ut vias sibi aperiendo singulo mense menstruas celebret purgationes. Ex his omnibus non est difficile caloris actualis originem agnoscere, cùm aliundè sciamus particulas calidas solutas, & ad motum excitatas actuales in nobis inducere caloris sensum, quod benè præstatur à fermento.

His usibus possem alium æquè necessarium addere, pulmones scilicet fabrefactos esse à naturâ veluti sanguineum penu, ut continuò per vices suppeditent sanguinem cordi, qui ab eo in universum perpetuò circuitu impulsus, & vitam, & motum omnibus impertiatur, quoniam tamen ab aliis tactum est, ideò transeunter solum subnectam, quod in animalibus adhuc viventibus secto thorace, si jam collapsi pulmones iterùm immisâ fistulâ aëre inflentur, restituitur motus cordi, jam penè extinctus irrumpente sanguine in sinistrum ventriculum ex factâ aeris compressione; Praxis etiam hoc idem comprobat, obstructis namque pul-

monum vasis, vel auriculis, pulsus inæqualitas primò emergit, & tandem mors: & tantâ dignitate pollent ad vitam in animantibus pulmones, ut perpetuò hoc verum sit, morbos ut plurimum vel ab ipsis pulmonibus, vel tandem in ipsos definere.

Hoc licuit ex observationibus factis ad usum anatomicum comparasse. Ista quoad aliqua certiùs determinassem, nisi labor hic in minimis, & penè visum effugientibus esset. Solitâ tuâ humanitate me prosequere, & Nestoreos ducas annos.



DE PULMONIBUS EPISTOLA II.

Praclarissimo, & Eruditissimo Viro

JO. ALPHONSO BORELLIO;

PISIS MATHESEOS PROFESSORI

CELEBERRIMO

MARCELLVS MALPIGHIVS

Medicinae Professor Bonon. F.

EA est inveniendis in rebus physicis obscuritas, ac difficultas, ut aliquid determinare integrum non om-

ninò sensibus nostris esse videatur , & licet improbo pervicaces in labore, suis in fœtibus , veluti in exarato per mysteria volumine , naturam parentem contemplemur , & obscura magis in effosis animantium visceribus recludere tentemus , nostris demùm conatibus nonnisi per immensa observationum tædia veritatem constare colligimus, dum modo insectorum , modo perfectorum animantium sectione veluti per gradus lucem mutuamur , solet enim quibusdam , licet vilioribus, magnis & omnibus numeris absolutis naturâ præcludere , & in imperfectis rudimenta perfectorum animantium ponere , ut proprius tamen, Vir. præclarissime, rem rangam, duo erant , quæ in meâ de Pulmonum observationibus epistolâ, ut dubia , indaganda exactiori studio reliqui. Primum erat, quodnam sit rete illud descriptum , quo singulæ vesicæ & sinus quodammodo vinciuntur in pulmonibus , alterum erat, an pulmonum vasa mutuâ anastomosi jungantur, an verò hient in communem pulmonum substantiam , & sinus : Problematæ , quæ soluta ; majoribus sibi viam

agent , & ob oculos naturæ operationes clariùs sunt positura , pro quibus enodandis ferè totum ranarum genus perdidì , quod non contingit in efferâ illâ Homeri batrachomyomachia ; in ranarum enim anatome , quam favente *Excellentissimo D. Carolo Fracassato*, Collegâ meo , institueram , ut certior fierem circâ membraneam pulmonum substantiam , talia mihi videre contigit , ut non immeritò illud Homeri usurpare possim ad rem præsentem meliùs.

Magnum certum opus oculis video.

Nam in hac propter structuræ simplicitatem , vasorumque , & ferè totius diaphaneitatem , quæ oculos in penitiora admittit , evidentius res ità demonstrentur , ut cæteris obscurioribus lucem sint tandem allaturæ.

In ranâ igitur scisso per longum abdomine erumpunt pulmones utrimque cordi adhærentes , qui non ut in cæteris animantibus illicò flaccescunt , sed tensi ad animalis libitum perdurant , hi nil aliud sunt , quam membranea quædam vesica , quæ primò intuitu minimis conspergi videtur maculis ex ordi-

ne dispositis instar eorum corii piscis squatinæ vulgò dicti *Sagrino* figurâ, & extimis protuberantiis æmulatur conum pineum; colligatur autem interior, & exterior texturâ quadam vaporum diversimodè propagatorum, quæ ex pulsu, contrario motu, & insertione venæ, & arteriæ pulmonares sunt; in ejus concavâ & interiori parte tota ferè facessit in inane spatium aëri recipiendo dicatum, non undequaque tamen levis est, sed intercipitur occurrentibus alveolis, qui ex elatis in pusillam altitudinem membranosis parietibus conflantur, non sunt verò omnes ejusdem figuræ, sed dùm parietes in longum & latum ducuntur & nectuntur, ferè in hexagonos sinus efformantur; ad angulos sinuum, dùm flexa aliquantisper, extenditur membrana, infundibulum veluti constituitur, & ita minorum ranarum pulmones effinguntur: in grandioribus autem in majorem altitudinem elevantur parietes, & à medio contentæ areæ tres ut plurimum sensim augescendo excurrunt, sibi que occurrunt parietes in minoribus ranis ferè inobservabiles, hi dùm sibi

invicem & majoribus neſtuntur in tres alios ſinus , ut plurimùm ſinum majore partiuntur. Sinuum arca , ſeu fundus vaſa ſuperiùs tacta admittit , & quoad arteriam ipſa aliquando non conſpicuo deſinit in medium ſurculo , ſed ulteriùs ſuo majori ductu exporrigitur , & aliquandò manifèſtè unum vel alterum ramum depromit , vena autem parietum interna faſtigia allabatur, hiſque immiſcetur , & demiffis inferiùs ramis per parietem tandem excurrit in aream.

His viſis ad meram ſtructuram & compagem attinentibus , mirabiliora microſcopica detegit obſervatio , nam pulſante adhuc corde ſanguinis contrarius motus , licet difficulter , in vaſis obſervatur , ita ut evidenter detegatur ſanguinis circulatio , quæ & feliciùs etiam in Meſenterio , cæterisque venis majoribus abdomine contentisprehenditur ; ſanguis itaque hoc impetu per arterias in quaſcunque cellulas uno vel altero ramo conſpicuo pertranſeunte , ſeu ibi deſinente per modum effluvi in minima depluit , & ita multipliciter diviſus rubrum colorem exuit , &

sinuosè circumductus , undique spargitur , donec ad parietes , angulos & venarum ramos resorbentes appellat.

Non ulteriùs vis oculi in vivente animante aperto potuit extendi , hinc credideram sanguineum corpus in spatium inane erumpere , & hiantè vase & parietum structura recolligi , huic ansam præbebant tortuosus & in diversa diffusus sanguinis motus , & ejus ad determinatam partem unio : fidem tamen meam dubiam fecit exsiccatus ranæ pulmo , qui fortè in minimis (ut postea deprehensum vasculis) sanguineam rubedinem servaverat , ibi enim perfectiori vitro , oculis non ampliùs puncta efformantia corium , quod dicitur *Sagrino* , sed vascula annulatim immixta occurrebant ; tanta est horum vasculorum divaricatio , dùm hinc inde à venâ & arteriâ prodeunt ; ut non ampliùs vasis ordo servetur , sed rete conflatum ex duorum vasorum productionibus appareat , hoc rete non solum totam aream occupat , verùm ad parietes extenditur , & excurrenti vasi adnascitur , prout copiosius , licèt difficiliùs potui in testudinis oblongo pul-

mone pariter membraneo & diaphano observasse; hinc patuit ad sensum, sanguinem per tortuosa vasa divisum excurrere, nec in spatia effundi, sed per tubulos semper agi, & multiplici flexu vasorum disjici; Nec novus est naturæ mos extrema vasorum ora invicem jungere, cum in intestinis, aliisque partibus idem ipsa servet; quin immò, quod mirabilius videbitur, venarum fines superiores scilicet cum inferioribus spectabili invicem necit anastomosi, ut optimè observavit *doctissimus Fallopius*.

Ut autem proposita faciliùs obtinere possis, & vis assequi, sectæ ranæ emergentem, turgidumque pulmonem, dum copioso undique alluitur sanguine, filo, quâ jungitur cordi, necites, etenim hic exsiccatus servabit vasa sanguine turgentia, quæ tunc optimè videbis, si contrà horizontalem solem exposita publicari unius lentis perscruteris microscopio, vel aliam instituire poteris in his videndis methodum, suprâ laminam crystallinam pulmonem pones subtus lucernæ lumine per tubum illustratam, huic microscopium duarum

lentium admovebis , & ità annulationem propagata vasa tibi aperientur , eadem instrumentorum & luminis dispositione motum sanguinis per tacta vasa observabis , & ipse ex te alia comminisci poteris per diversos lucis gradus , qui calami subterfugiunt descriptionem , circa verò motum sanguinis tuâ dignum speculatione unum se promit ligatis enim auriculâ & corde , & ita sublatis motu & impulsu , qui posset à corde in appensa derivari vasa , adhuc sanguis per venas movetur ad cor , ut vasa suo conatu & affluente copiâ distendat , & hoc per plures perseverat horas , in fine tamen , si præcipuè solaribus exponatur radiis non eodem continuato agitur motu , sed veluti per vices impulsus , fluctuans eadem simul progreditur , regrediturque viâ , quod & accidet avulsis corde & auriculâ.

Ex his igitur ad prima problemata resolvenda ex analogiâ , simplicitateque , quâ utitur natura in suis operibus colligi potest , rete illud quod aliàs nervum credidi , vesicis & sinibus immixtum vas esse deferens sanguineum corpus , seu idem efferens , & quamvis

in perfectorum animantium pulmonibus in medio annulorum retis , aliquando vas desinere , & hiare videatur ; probabile tamen est , prout fit in cellulis ranarum , & testudinum , illud vas minima ulterius propagata vasa ad modum retis habere , quæ propter exiguitatem suam exquisitum etiam sensum effugiant.

Ex his etiam summâ cum probabilitate illud solvi potest de mutua vasorum unione , & anastomosi ; etenim si semel intrâ vasa natura sanguinem volvit , & vasorum fines in rete confundit , probabile est , etiam in aliis anastomosis jungere , hoc evidenter deprehenditur in ranarum vesicâ ab urinâ turgente , in quâ citatus sanguinis motus per diaphana vasa mutua invicem anastomosi uncta observatur , quin & vasa ista illum sortita sunt nexum & progressum , quem in foliis omnium ferè arborum illarum venæ , sive fibræ perpetuò designant.

In quem verò finem hæc omnia fiant , ultra ea quæ superiori epistolâ tetigi de pulmonariâ miscellâ , tu ipse visus es apprimè deprehendisse , nec ce-

leberrimo tuo hoc invento mens est fraudanda, quod humanitate tuâ ad me exaratis literis commisisti; quibus subtiliter philosophabaris mira in vegetabilibus portenta naturæ observando, dùm miramur poma ex trunco non suo pondere, plantarumque adulteria jucunda mixtura legitimis notos superinduxisse partus: videmus enim unam eandem arborem in ramis suis diversos induisse mores, dùm hîc gratâ aciditate gustum penduli prolestant fructus, illîc nectareâ dulcedine omne desiderium implent, & ipse fidem veritati adstruis, dùm Romæ miratus es è Massilici mali trunco vitem, & jessimum prodiisse; hæc ingenia, qui viridaria excoluit levi indito furculo grandioribus ramis fecit, & ad diversarum rerum foeturam non reluctantes arbores erudivit, nam in hanc rem appositè cecinit Virgil. in Geor.

————— *Alienâ ex arbore germen*

*Includunt, nudoque docent inolescere
libro.*

Miri hujus effectus tuâ philosophandi methodo secretum aperis, existimare enim debemus, eatenus Massilicâ

mali acidum succum in meri naturam dulcescere, quatenus particulæ illius succi, licet sæliciter excurrant per exiles meatus proprii trunci, non eodem tamen modo possunt continuatos vitis tubulos subire, hinc suo percitæ motu & subsequenti impulsu extrâ suum ordinem divulsæ & fractæ, necesse est ut ad superinductam meatus figuram se componant, & novam induant naturam, quâ & vitis & jesimum producit. Similem operationis modum in pulmonibus natura perficit, redit enim ab ambitu corporis viduatus alibilibus particulis turbatus sanguis, cui novus è venâ subclavia humor additur ulteriori naturæ actione perficiendus: Hic igitur, ut in particularem carnis, ossis, nervi; &c. naturam disponatur, & præparetur, dum subit pulmonarium vasculorum myriades, veluti in diversa minima stamina ducitur, & ita sanguineis particulis conciliatur nova figura, situs, & motus, quibus carnes, ossa, & spiritus possint efformari; cumlatur tui dicti fides à consimili seminalium vasorum structurâ, ac si ani;

mantis nutritio quædam esset ejusdem regeneratio.

Hæc paucula in epistolam coëgi, ut inventa jam de pulmonibus augerem; si punctum tuli hoc totum mearum observationum additamentum ranæ debui. Istis rebus tuâ auctoritate & invento pretium concilias & dignitatem. Interim lætè philosophare, pergasque me omninò felicem reddere has minimas cogitationes meas tuorum scriptorum de animalium motu, particulâ adaugendo. Vale. Bononiæ 1661.





FIGURARUM EXPLICATIO.

Tab. 1. Fig. I. Frustulum extimum pulmonis exsiccati, continens delineatum rete.

Fig. II. Interna vesicula, & sinus adumbrati cum appensâ particulâ interstitii in parte superiori scaterum exortus, & integra propagatio icone oculis subjici non potuit.

Fig. III. Lobulorum varia adoptatio suprâ tracheam & pulmonaria vasa qui etiam à naturali situ distracti exhibentur ad faciliorem intelligentiam.

Tab. II. Fig. I. Exhibens ranarum pulmones cum appensâ tracheâ.

A Larinx, qua semicartilaginea est.

B Rimula, qua exactissimè clauditur & aperitur ad animalis libitum, & clausa, aere turgentes servat pulmones.

C Cordis situs.

D Pars exterior pulmonis.

E Cellularum propagatum rete.

254 *Figurarum Explicatio.*

F. Arteria pulmonaria propagatio.

G Pars concava pulmonis per medium scissi.

H Vena pulmonaria parietum apices excurrentis propagatio.

Fig. II. Continens cellulam simplicissimam absque intermediis parietibus aucta in magnitudine.

A Cellula area interior.

B Parietes divulsi, & inclinati.

C Arteria pulmonaria truncus cum appensis ramis, quasi reticulato opere desinentibus.

D Vena pulmonaria truncus parietum fastigia pererrans suis decurrentibus ramis.


E Vas in fundo & angulis parietum commune lateralibus & continuatis retis ramificationibus.


FINIS.

A01 1460.807









K 58.

xxx
A-17